

Milik Departemen P dan K
Tidak diperdagangkan
Untuk umum

Hikayat Mara Karma

Drs. Ramli Harun



ktorat
yaan

dan Kebudayaan

Milik Dep. P dan K
Tidak diperdagangkan

Hikayat MARA KARMA

Diterjemahkan oleh
Drs. RAMLI HARUN



TANGGAL	No. INDEK
10 SEP 1984	1214

Departemen Pendidikan dan Kebudayaan
PROYEK PENERBITAN BUKU SASTRA
INDONESIA DAN DAERAH
Jakarta 1981

**Diterbitkan oleh
Proyek Penerbitan Buku Sastra
Indonesia dan Daerah**

Hak pengarang dilindungi undang-undang

KATA PENGANTAR

Bahagialah kita, bangsa Indonesia, bahwa hampir di setiap daerah di seluruh tanah air hingga kini masih tersimpan karya-karya sastra lama, yang pada hakikatnya adalah cagar budaya nasional kita. Keseimuannya itu merupakan tuangan pengalaman jiwa bangsa yang dapat dijadikan sumber penelitian bagi pembinaan dan pengembangan kebudayaan dan ilmu di segala bidang.

Karya sastra lama akan dapat memberikan khazanah ilmu pengetahuan yang beraneka macam ragamnya. Penggalian karya sastra lama yang tersebar di daerah-daerah ini, akan menghasilkan ciri-ciri khas kebudayaan daerah, yang meliputi pula pandangan hidup serta landasan falsafah yang mulia dan tinggi nilainya. Modal semacam itu, yang tersimpan dalam karya-karya sastra daerah, akhirnya akan dapat juga menunjang kekayaan sastra Indonesia pada umumnya.

Pemeliharaan, pembinaan, dan penggalian sastra daerah jelas akan besar sekali bantuannya dalam usaha kita untuk membina kebudayaan nasional pada umumnya, dan pengarahan pendidikan pada khususnya.

Salin pengertian antar daerah, yang sangat besar artinya bagi pemeliharaan kerukunan hidup antar suku dan agama, akan dapat tercipta pula, bila sastra-sastra daerah yang termuat dalam karya-karya sastra lama itu, diterjemahkan atau diungkapkan dalam bahasa Indonesia. Dalam taraf pembangunan bangsa dewasa ini manusia-manusia Indonesia sungguh memerlukan sekali warisan rohaniah yang terkandung dalam sastra-sastra daerah itu. Kita yakin bahwa segala sesuatunya yang dapat tergali dari dalamnya tidak hanya akan berguna bagi daerah yang bersangkutan saja, melainkan juga akan dapat bermanfaat bagi seluruh bangsa Indonesia, bahkan lebih dari itu, ia akan dapat menjelma menjadi sumbangan yang khas sifatnya bagi pengembangan sastra dunia.

Sejalan dan seirama dengan pertimbangan tersebut di atas, kami sajikan pada kesempatan ini suatu karya sastra daerah Aceh,

dengan harapan semoga dapat menjadi pengisi dan pelengkap dalam usaha menciptakan minat baca dan apresiasi masyarakat kita terhadap karya sastra, yang masih dirasa sangat terbatas.

Jakarta, 1981

Proyek Penerbitan Buku Sastra
Indonesia dan Daerah

RINGKASAN HIKAYAT MARA KARMA

Di negeri Antah Berantah hidup dua orang suami isteri yang sehari-hari bekerja sebagai pengemis. Sang suami lebih dikenal dengan nama si Miskin. Pada suatu hari ketika di istana kerajaan sedang berlangsung suatu pertemuan si Miskin dan isterinya datang meminta-minta. Tetapi bukan pemberian yang diperoleh oleh si Miskin malahan ia dipukuli oleh orang banyak dan lebih malang lagi, atas perintah raja yang berkuasa di negeri itu, si Miskin dan isterinya diusir ke hutan.

Sebagai penghuni baru hutan itu si Miskin mendapat banyak kesulitan. Namun pada suatu ketika ia sangat gembira. Isterinya yang sudah hamil tua itu melahirkan seorang anak laki-laki. Anak yang baru lahir itu mereka namakan Mara Karma. Kelahiran Mara Karma mendapat perhatian dari kalangan wanita sekitar itu. Mereka datang mengunjungi tempat si Miskin dengan membawa berbagai hadiah. Oleh karena para tamu yang berdatangan kian hari bertambah banyak, si Miskin memperluas sedikit tempat tinggalnya. Tatkala ia sedang menggali tanah untuk keperluan itu ia menemui sebuah guci berisikan emas permata. Si Miskin menjadi kaya raya dan dengan kehendak Tuhan, tak lama kemudian daerah itu menjadi sebuah kerajaan besar dengan si Miskin sebagai raja dengan gelar Indra Angkasa dan isterinya bergelar Ratna Dewi. Kerajaan itu diberi nama Puspa Sari. Beberapa waktu kemudian permaisuri melahirkan lagi seorang anak perempuan dan diberi nama Nila Kasom.

Dari hari ke hari Mara Karma dan Nila Kasom semakin besar. Raja Indra Angkasa mulai gusar. Baginda ingin mengetahui nasib kedua anaknya kemudian hari. Maka bagindapun mengutus dua orang menterinya ke negeri Antah Berantah untuk menjemput beberapa ahli nujum. Raja Indra Diwa di negeri Antah Berantah yang tidak senang atas kejayaan si Miskin telah lebih dahulu memanggil semua ahli nujum yang ada di negerinya untuk mendapat keterangan tentang si Miskin.

Dari keterangan para ahli nujum mengertilah ia bahwa kejayaan si Miskin adalah berkat dua orang anaknya. Oleh karena itu Raja Indra Diwa meminta kepada semua ahli nujum untuk tidak memberi keterangan yang sebenarnya kepada si Miskin bila se-waktu-waktu ia meminta keterangan perihal anaknya.

Utusan raja Indra Angkasa telah pulang dari negeri Antah Berantah bersama dengan beberapa ahli nujum. Dalam perjamuan di istana baginda Indra Angkasa menjelaskan maksudnya kepada para ahli nujum. Sesudah membolak balik lembaran kitab, ahli-ahli nujum itu berkata, "Sayang nasib kedua putra putri tuanku. Mereka tidak boleh dibiarkan tinggal di kerajaan ini. Merekalah nanti yang akan membawa kehancuran negeri ini dan tuanku sendiri."

Dengan sangat sedih raja Indra Angkasa menyampaikan berita dari para ahli nujum itu kepada isterinya. Sebagai ibu yang sangat mencintai kedua anaknya, Ratna Dewi tidak mau melakukan kehendak suaminya. Ia tidak sudi mencelakakan kedua anaknya. Ia berusaha menyadarkan suaminya untuk tidak terpengaruh oleh ucapan ahli nujum itu. "Kehadiran anak kita di tempat ini telah membahagiakan kedua ibu bapanya. Rimba raya telah menjadi negeri, ayahnya telah menduduki singgasana." Demikian kata Ratna Dewi kepada suaminya. Berita para ahli nujum itu membuat pula wajah seluruh penghuni istana menjadi muram.

Akhirnya Indra Angkasa sebagai raja yang berkuasa memaksa isterinya untuk memilih satu diantara dua, mengusir kedua anaknya atau menyaksikan mereka dibunuh. Mendengar ancaman suaminya Ratna Dewi menangis sejadi-jadinya sehingga ia tak sadarkan diri. Dengan pakaian yang melekat ditubuh disertai isak tangis, Nila Kasom dan Mara Karma menatap wajah baginda yang sedang geram itu sambil memohon belas kasihan. Tetapi beliau tetap pada keputusannya. Mara Karma dan Nila Kasom merasa takut lalu segera bersujud mencium kaki ayah mereka. Sesudah itu ke tempat ibunda yang sedang berbaring lemas karena tak sanggup melihat keadaan kedua anaknya. Setelah berpeluk cium dengan ibunya dan sambil menggendong

adiknya yang masih kecil Mara Karma mohom izin kepada kedua orang tuanya. Mereka pergi memenuhi kehendak ayahnya. Pergi tanpa tujuan.

Setelah tiga hari Mara Karma dan Nila Kasom menghilang, kerajaan Puspa Sari ditimpa mala petaka. Seluruh kota dan negeri musnah dimakan api dan akhirnya kerajaan Puspa Sari menjadi hutan rimba kembali. Barulah raja Indra Angkasa menyesali perbuatannya. Ia pergi bersama isterinya mencari kedua anaknya, namun tidak diketemuinya.

Setelah berbulan-bulan Mara Karma dan Nila Kasom menghangungi rimba raya mereka tiba di sebuah padang dekat gunung Jindra tempat tinggal Mambang Pari. Di tempat itu kedua kakak beradik itu di pelihara oleh Mambang Pari dan diajari berbagai ilmu sakti. Setelah beberapa lama mereka tinggal di sana Mambang Paripun memperkenankan mereka pergi dengan dibekali sebuah azimat sebagai tanda mata.

Dalam perjalanan selanjutnya Mara Karma dan Nila Kasom bersua dengan sepasang raksasa. Mereka ditangkap dan dibawa kerumahnya. Isteri raksasa yang menaruh kasihan kepada mereka melarang suaminya untuk memakan kedua anak itu. Di tempat itu mereka juga mendapat pelajaran berbagai ilmu sakti. Setelah beberapa lama mereka bersama raksasa itu merekapun bermohon diri untuk pergi lagi. Dengan tujuan yang tidak menentu Mara Karma dan Nila Kasom tiba di sebuah batang air. Sesudah mandi-mandi mereka mengaso di atas sebuah batu besar di bawah sebatang pohon beringin yang rindang. Tiba-tiba seekor burung hinggap pada sebuah dahan di atas kepala mereka. Burung tersebut dapat ditangkap oleh Mara Karma dan segera disembelihnya. Untuk memenuhi keinginan adiknya supaya burung itu dipanggang, Mara Karma harus mencari api.

Dengan berpedoman kepada suara ayam berkокok yang sayup-sayup kedengaran Mara Karma sampai di sebuah gubuk petani. Ia menghampiri gubuk itu dengan maksud meminta api. Rupanya Mara Karma bernasib sial lagi, bukan api yang diperolehnya tetapi pukulan-pukulan yang tak kenal belas kasihan. Ia dituduh mencuri oleh petani itu yang sering kehilangan ta-

namannya. Dalam keadaan tidak sadar kedua kaki tangannya diikat lalu dibuang ke dalam sungai.

Nila Kasom yang ditinggal sendirian menangis tersedu-sedu. Seorang pemburu rusa yang mendekati tempat itu mendengar suara tangisan anak kecil dan setelah mencari ke sana ke mari mereka menemukan seorang gadis kecil sedang duduk menangis dan ditangannya seekor burung yang sudah disembelih. Melihat wajahnya yang cantik itu mereka menduga bahwa gadis itu putri seorang bangsawan. Mangindan Sari, pemimpin rombongan itu membawa pulang gadis kecil itu ke negeri Pelinggam Cahya.

Raja Puspa Indra dan permaisurinya Manda Ratna dengan gembira menerima kedatangan putra tunggalnya Mangindan Sari dari berburu dengan membawa seorang putri. Dengan penuh kasih sayang baginda dan permaisuri memanggil gadis itu dengan nama Mayang Mengurai. Dibawah asuhan Manda Ratna gadis itu dibesarkan di istana kerajaan Pelinggam Cahya hingga ia menjadi remaja. Akhirnya putri Mayang dinikahkan oleh raja Puspa Indra dengan putranya Mangindan Sari. Kedua anak raja itu hidup damai diistana negeri Pelinggam Cahya.

Tersebutlah seorang putri cantik anak raja jin yang diculik oleh raksasa sewaktu ia masih kecil, dan hidup disebuah daerah terpencil yang dikelilingi oleh laut dan gunung berhutan lebat. Putri yang bernama Cahya Khairani itu telah menyelamatkan jiwa Mara Karma yang terdampar di pantai. Dengan tidak diketahui oleh raksasa yang jarang ada di rumahnya itu putri Khairani mendapat kesempatan hidup bersama dengan Mara Karma di tempat itu. Meskipun mereka berdua hidup dalam suasana kasih sayang mereka selalu berusaha meninggalkan daerah yang terkurung itu. Demikianlah pada suatu hari setelah Mara Karma berhasil membunuh raksasa serta membakar rumahnya, dengan sebuah kapal yang telah sudi memenuhi lambaian tangan mereka berangkatlah Mara Karma dan putri Khairani meninggalkan tempat itu.

Pada suatu malam tatkala kapal sedang berlayar datanglah angin ribut yang membuat kapal itu terombang ambing. Nakhoda kapal itu rupanya tergiur oleh kecantikan putri Khairani.

Ketika Mara Karma keluar hendak membantu juru mudi ia di-dorong ke laut oleh nakhoda.

Seekor ikan nun yang melihat Mara Karma timbul tenggelam dalam laut segera membantu dengan membawa Mara Karma mengikuti kapal tersebut. Putri Khairani mencari Mara Karma ke sana ke mari di atas kapal. Nakhoda menghampirinya dan membujuk Khairani dengan berbagai cara supaya mau menjadi isterinya. Hal ini membuat putri Khairani benci kepada nakhoda itu. Ia mengancam akan bunuh diri kalau ia berani mendekatinya. Karena ia kuatir putri Khairani binasa maka ia pun tidak mengganggunya lagi.

Setiba di pelabuhan negeri Pelinggam Cahya nakhoda turun menghadap raja Puspa Indra, dan meminta agar baginda merestui perkawinannya dengan seorang putri yang dibawanya dari jauh. Pada waktu yang sama Mara Karma dilepaskan oleh ikan nun yang membawanya. Seorang perempuan tua Nek Kebayan namanya menemukan Mara Karma terbaring di tepi pantai dalam keadaan lelah. Nek Kebayan membawa Mara Karma ke rumahnya yang tiada berapa jauh dari pantai.

Setiap hari Mara Karma membantu Nek Kebayan merangkai bunga sebagai mata pencahariannya. Pada suatu hari Nek Kebayan menjual bunganya kekapal memenuhi saran Mara Karma. Ternyata bunganya habis laku. Hari berikutnya Mara Karma merangkai sekuntum bunga dan menyelipkan didalamnya sepucuk surat dan sebentuk cincin. Bunga itu diberikan kepada Nek Kebayan untuk dijual khusus kepada seorang putri yang berada di atas kapal itu. Pesan Mara Karma itu dijalankan oleh Nek Kebayan. Putri Khairani merasa heran tetapi yakin bahwa karangan bunga itu berasal dari Mara Karma dan sebagai balasan ia menyerahkan sehelai kain panjang sebagai harganya dan sebagai pertanda bahwa mereka sudah saling maklum.

Seluruh rakyat negeri Pelinggam datang berduyun-duyun memenuhi undangan raja Puspa Indra yang akan meresmikan pernikahan nakhoda kapal dengan seorang putri. Putri Khairani yang memenuhi undangan raja sebagai calon pengantin didudukkan bersama putri Mayang dan putri Manda Ratna di istana kerajaan. Tatkala itu dengan airmata berlinang Khai-

rani menatap wajah putri Mayang dan atas pertanyaan Manda Ratna yang melihat peri laku itu, Khairani menjawab, "Wajah putri Mayang sangat mirip dengan wajah suami saya". Mendengar jawaban itu Manda Ratna segera menyampaikannya kepada baginda Puspa Indra.

Disaat keramaian itu Mara Karma datang ke istana bersama empat puluh penunggang kuda sakti yang wajah mereka hampir sama. Raja dan rakyat yang menyaksikan merasa heran. Kepada putri Khairani baginda meminta untuk melihat apakah ada diantara mereka suaminya yang sebenarnya. Putri Khairani mula-mula ragu untuk menentukan yang mana diantara mereka suaminya, tetapi akhirnya sorotan mata Mara Karma meyakinkannya. Ia lari dan menjatuhkan dirinya di kaki suaminya. Suasana ketika itu menjadi haru dan penuh tanda tanya. Dari pembicaraan raja Puspa Indra dengan Mara Karma maka tersingkaplah semua rahasia. Dua orang pelaku yang telah menganiaya Mara Karma yaitu petani dan nakhoda kapal di hukum gantung. Kemudian baginda menghadiahkan sebuah istana kepada Mara Karma dan Khairani. Demikian pula kepada putranya sendiri Mangindan Sari dan isterinya putri Mayang.

Disana mereka hidup tenram dan rukun dalam lingkungan istana kerajaan Pelenggan Cahya.

Tiada berapa lama kemudian Mara Karma mohon izin kepada raja Puspa Jndra serta kepada isteri dan adiknya untuk pulang ke negeri Puspa Sari menjenguk kedua orang tuanya. Setiba di negeri Puspa Sari Mara Karma sangat terkejut melihat negerinya sudah berubah menjadi hutan rimba. Ayah dan ibunya tidak ada. Setelah di carinya beberapa hari didapatkan kedua orang tuanya sedang mencari kayu api. Mara Karma tidak segera memperkenalkan dirinya. Baru dua hari kemudian ia menyebut namanya. Mengetahui anaknya Mara Karma, ibunya jatuh pinggang. Dengan berkat doa Mara Karma dan dengan izin Tuhan, Kerajaan Puspa Sari akhirnya berdiri kembali dengan megahnya. Ayahnya kembali menduduki tahta kerajaan seperti semula.

Tak lama kemudian Mara Karma mohon diri untuk kembali ke negeri Pelenggam Cahya untuk menjemput isterinya dan adik-

nya Nila Kasom. Sesudah beberapa waktu tinggal di negeri Pelinggam dan sesudah mendapat izin dari baginda Puspa Indra dan permaisuri Manda Ratna, maka Mara Karma, Nila Kasom, Khairani dan suaminya Mangindan Sari berangkat ke Puspa Sari. Mereka diantar oleh sepasukan bala tantra dibawah pimpinan seorang pahlawan terkenal bernama raja Rom. Di negeri Puspa Sari rombongan Mara Karma disambut dengan upacara kerajaan.

Adapun raja Indra Dewa di negeri Antah Berantah yang mengetahui negeri Puspa Sari sudah menjelma kembali dan Mara Karma masih hidup, mengerahkan pasukannya ke perbatasan. Mara karma yang mengetahui maksud raja Indra Diwa itu segera pula memberitahukan kepada raja Rom untuk bersiap-siap. Maka pecahlah perang besar antara negeri Antah Berantah dengan Puspa Sari. Mula-mula Mara Karma kewalahan menghadapi pasukan Indra Diwa yang lebih banyak jumlahnya. Tetapi sesudah mendapat bantuan dari negeri Pelinggam Cahya dan dibantu pula oleh Mambang Pari dari gunung Jingga dengan tujuh pahlawan saktinya akhirnya pasukan negeri Antah Berantah kalah dan Indra Diwa tewas dalam pertarungan dengan Mara Karma.

Negeri Antah Berantah jatuh ketangan Mara Karma. Putri raja Indra Diwa bernama Nila Cahya dinikahkan dengan Bajingga yaitu adik putri Khairani, kemudian ia deserahkan memimpin negeri Antah Berantah yang sudah menjadi daerah takluk negeri Puspa Sari.

Jakarta 31 – 3 – 1981

Diterjemahkan dan diringkaskan

oleh

Drs Ramli Harum

**Hikayat
MARA KARMA**

HIKAYAT MARA KARMA

Bi-smi l-lahi r-rahmani r-rahim

Bismillahi lon puphon surat
Ngon nama zat Tuhan Nyang Esa
Alaham dulillah laju lon sembah
Pujoe hadarat Wahidulqahhar
Sigala pujoe milik Rabbi
Nyang Maha Suci Allah Taala
Pujoe awai dan nyang akhe
Baten dan lahe barang masa

'Oh lheueh lon pujoe Allah nyang Ahad
Akan Muhammad seulaweuet lon ba
Seulaweuet saleuem atueuh Muhammad
Pangulee umat dum sineuna

Ya Tuhan ku neutamah rahmat
Ateueh Muhammad Saidil Anbiya
Ateueh wareh seureuta sahbat
Bandum umat Nabi Mustafa

Insya Allah beutroh hajat
Lon meusurat saboh haba
MARA KARMA nama hikayat
Haba mangat hana tara

Cit jeuet tatueng keu peuingat
Nyoe hikayat MARA KARMA
Sinan tatueng dum ibarat
Saket mangat Tuhan peuna

Kaya gasien hina meugah
grak bak Allah seumuanya
Saket mangat seunang susah
Lam iradah Po Nyang Esa

Ladom ureueng na weueh hate
Sabab sabe lam seungsara

Ingat untong pike keudroe
Beurang kasoe ro ie mata

Bah keueh 'oh nan nyan khuteubah
Alkisah jinoe lon mula
AMMA BAKDU musyawarah
Deungo lon peugah sidroe raja

Dalam nanggroe **ANTAH BEURANTAH**
Nan khalifah **INDRA DIWA**
Sangat kaya lagi meugah
Keurajeuen luah hana tara

Padum-padum raja laen
Taklok keunan ubak **INDRA**
Rakyat rame hana lawan
Dum sibarang geusyhik panglima

Bak siuroe raja daulat
Duek meusapat dum sineuna
Indra Diwa musyawarat
Jihadap le rakyat dumna

Huleebalang meuntroe wazir
Sigala biek keunan teuka
Jeueb-jeueb nanggroe ka troh ili
Ubak doli raja raya

Raja taklok habeh jitren
Dum meuron-ron keunan teuka
Jihei habeh dum meuhimpon
Jeueb-jeueb duson deungan banda

Raja suroh yue bri teumpat
Ban nyan adat reusam kada
Yoh nyan bandum duek meupiyoh
'Oh tho reuoh hidang teuka

Macam-macam asoe hidang
Perjamuan hibak raja
'Oh lheueh makeuen pinah hidang

Duek meurantam peungah haba
Suka hate mangat tuboh
Sampoh reuoh ija sutra
Piep ngon rukok saboh-saboh
Raja beudoh teuma sigra

Musyawarat raja nanggroe
Pakri jinoe tabicara
Teungoh pike dum khabaran
Si miseukin keunan teuka

Jak geumade dalam nanggroe
Lakoe binoe gob nyan dua
'Oh sare troh keunan sampoe
Wazir meuntroe kalon rupa

Ban jikalon deungon peukayan
Nibak badan brok lageena
Ruya-rayoe ija beukah
Sang muntah jikalon rupa

Ban jikalon meunan lagoe
Ureueng nanggroe khem teutawa
Sira jikhem jikheun meunoe
Pane keunoe ureueng teuka

Ladom seuot han lon tusoe
Pane nanggroe ho jiteuka
Teuma jikheun sabe keudroe
Kacok beusoe kageulawa

Ban jideungo meunan lagee
Jilet teuntee ureueng dua
Jilet laju deungon kayee
Poh bak ulee deungon muka

Ladom jurhom dengon batee
Nyang ngon kayee han peue kira
Ladom jirhom peue meuteumee
Kayee batee aleen nuga

Si miseukin yoh nyan reubah

Teubiet darah dum teupanca
Nibak badan teubiet darah
Han ube drah sayang jina

Maken jipoh ngonjisurak
Sang meuhayak bumoe donya
Raja tanyong peuejisurak
Musoh jarak keunoe teuka

Yoh nyan seuot sidroe meuntroe
Ampoñ kamoe po meukuta
Si meseukin teuka keunoe
Lakoe binoe jih ban dua

Peukayan brok nibak tuboh
Keumeung jak troh bak meukuta
Nyankeuh sebab kamoe riyoh
Meuparoh laju u lúa

Bek jitamong troh u mideun
Kamoe eumpeueng ngon geulawa
Ban geudeungo haba meunan
Raja yoh nyan pi sireuta

Kalet laju jih beujioh
Aneuk biyoh kureung aja
Dalam huteuen kalet beutroh
Bah jipiyo dalam rimba

Meunan sabda raja nanggroe
Rakyat deungo hate suka
Yoh nyan jikheun bak rakan droe
Kakiloe beujeued keu sira

Jilet laju sampoe u gle
Geuplueng sabé ureueng dua
Habéh nanggroe troh dalam gle
Rakyat sare ka jigisa

Maseng-maseng woe rumoh droe
Yoh nyan uroe pika sinya

Huleebalang wazir meuntroe
Maseng dum woe rumoh tangga
Maseng-maseng woe u teumpat
Raja daulat woe lam kuta
Rakyat nyang woe teuduk siat
Lon riwayat ureueng dua

Duek meupioh di dalam gle
Geumoe sabe hana reuda
Badan tuboh sang ka reule
Darah ile jeueb anggota

Bak malam nyan sinan teutap
Lam huteuen that le beuluka
Hana teungeut meung sikeujab
Asoe urat saket raya

Hana teungeut bak malam nyan
Hingga datang uroe faja
Sare beungoh uroe siang
Geukheun yoh nyan ubak nisa

Wahe judo ureueng binoe
Izin kamoe jak u lua
Tinggai gata lam uteuen nyoe
Ulon jinoe jak meumita

Lon jak mita peue nyang mudah
Tanyoe susah lapar dahaga
Sira geumoe nyan geupeugah
Peunoh limpah ngon ie mata

Ban dua droe moe meu'u'u
Meuna taeu insaf teuka
'oh lheueh izin nibak judo
Teubiet laju dalam rimba

Habeh huteuen harong padang
Sampoe u blang tanoh data
'Oh habeh blang tamong gampong
Jeueb-jeueb jurong jak meumita

Jikalon le ureueng gampong
Si miseukin lom ka teuka
Jiteubiet le dum meuron-ron
Dalam jurong jikeulua

Jipoh sinan pithat riyoh
Sang seunujoh ureueng kaya
Si miseukin plueng that sunggoh
Hingga ka troh plueng u banda

'Oh ban sare troh u peukan
Nyan pi sinan jipeunuga
Jitrom sipak hana reunggang
Hanjisayang ube seuma

Nyang ladom rhom deungon kayee
Ladom batee jigeulawa
Ladom jikheun poh beumate
Bek leumah le taeu rupa

Jipoh laju hana jisyen
Si Miseukin jienaya
Plueng u jalan si miseukin
Badan tangieng ban keusumba

Ka meulabo deungon darah
Hana leumah taeu rupa
Plueng di sinan meuhah-meuhah
Saket leupah jeueb anggota

Geumoe bae taloe jalan
Geukheun yoh nyan ya Rabbana
Ya Tuhan ku ulon sidroe
Jeueb-jeueb nanggroe jienaya

Han ek lon theun saket asoe
Bak saat nyoe neubri fana
Neubri mate ulon sidroe
Bek meunoe jienaya

Sira geujak sabe geumoe
Hanco asoe beukah rasa

Bak rasa nyum karab mate
Sang-sang reule jeueb anggota
Sira geumoe geujak leugat
Geupeuteupat ho langkah ba
Leumoh atot jeueb-jeueb urat
Sebab sangat lapar dahaga

Laju geujak sira~~r~~geumoe
Sang geumanoe ro ie mata
AMMA BAKDU teuma dudoe
Sira geumoe hana reuda

Geujak sidroe meusok-meusok
Han saho trok bak geukira
Trok bak teumpat geuboh-boh broh
Ka geupiyoh sikeutika

Geujak kireueh di dalam broh
Nyang ka gob boh peue-peue nyang na
Ka meuteumeung pulot basi
Geucok le geumakeuen sigra

Atot teubee nyang sidom piep
Nyan pi geujieb dua tiga
'Oh lheueh pajoh dua lhee ariet
Gadoh meugriet han le dahaga

Geukeubah na padum atot
Deungan pulot saboh geubawa
Ban dua peue ka geubalot
Woe meusyob-syob lam rimba

'Oh sare nyan troh geupuwoe
Bak judo droe geujok sigra
Sireuta geukheun sira geumoe
Keudeh keunoe lon jak mita

Nyankeuh nyang na ulon teumeung
Cok tamakeuen uleh gata
Ka ulon jak dalam gampong
Lon jak junjong ureueng kaya

Hana meujan lon lakee tulong
Ulon-ulon jipeunuga
Jupoh ulon le jikiloe
Hana sidroe insaf teuka

Ban geudeungo uleh binoe
Laju geumoe ro ie mata
Sira geumoe laju pajoh
Geusampoh tuboh judonya

Sampoh darah seukalian
Nibak badan suaminya
Darah ka tho nibak badan
Teuma lheueh nyan meuseuniya

Sinan geu-eh ban dua droe
Lakoe binoe dalam rimba
Habeh malam teuka suboh
Lalu beudoh ureueng dua

Kheun suami teuma meunoe
Sambinoe saket lon raya
Jeueb anggota sang ka reule
Bak lon pike habeh nyawa

Han ek lon theun he sambinoe
Saket asoe nyum san fana
Meunan narit bak suami
Si isteri moe meu'a-'a

Sayang jithat keu suami
Darah ile jeueb anggota
Sira jimoe jikheum pantah
Bek that gundah he keukanda

Khendak Tuhan tapaban bah
Neubri susah geutányoe dua
Adat neubri jeued keu putroe
Tuhan sidroe han tathee na

Meunyo neubri mangat jinoe
Meuhat dudoe susah teuka

Meung talupa Tuhan sidroe
Meuhat dudoe lam neuraka

Meunyo neubri susah jinoe
Uroe dudoe seunang teuka
Beuta saba dum geutanyoe
Ban khendak po beuta rela

Beuta syukur nekmat Tuhan
'Oh keumudian lam syeureuga
Meunan narit ureueng binoe
Seungab lakoe han le haba

Teuma jak pot le on kayee
Nyang mangat bee ka jiupa
Jugusuek bak badan teungku
Na sigeutu mangat rasa

Lom jigeusuek teuma lagi
Sang-sang rasi ubat luka
Bak peunyum na mangat asoe
Teuma dudoe jak meumita

Geujak laju dalam huteuen
Mita makanan peue-peue nyang na
Peue na mudah nyang jeued pajoh
Mita sunggoh dalam rimba

Dalam huteuen laju geubloh
Mita peunajoh hana reuda
Boh kayee gle rusep pupu
Pajoh laju mameh rasa

Boh birah deungon boh kundo
Geupot laju boh kam ija
Peue-peue nyang na dalam huteuen
Nyang jeued makéuen geucok sigra

Dalam ija geupasoe dum
Mameung-mameung geuwoe lanja
Troh u rumoh keudeh geuwoe
Geupeujaroe ubak nisa

Nyan rezeuki geunap uroe
Ban dua droe lam beuluka
Padum lawet teuma dudoe
Teukeudi po Tuhan Nyang Esa

Yoh nyan hame ureueng binoe
Indah bagoe hana tara
Cahya muka lang geumilang
Ban buleuen trang malam jula

Cahya gigoe tamse intan
Cahya badan sang purnama
Sare hame po nyak Siti
Hana sakri indah rupa

Sang-sang bagoe budiadari
That beureuhi rumeh muka
Na Lhee buluen hame sudah
Cahya limpah hana tara

Padum na treb sinan dasyah
Grak potallah Nyang Kuasa
Khendak Allah Maha Suci
Po nyak Siti ro ie mata

Ureung binoe nyang juhari
Moe meu 'i-'i hana reuda
Meusok-meusok teungoh geumoe
Tanyong meunoe suaminya

Pakon meunoe wahe nyak Ti
Peue na takbi lam rahsia
Peue na leumah dalam lumpoe
Kheun bak kamoe po jroh rupa

Hantom nyang ka meunan bagoe
Bak uroe nyaoe peue keureuna
Teuma seuot ureueng binoe
Sira jimoe ro ie mata

Wahe teungku ureueng lakoe
Hajat kamoe nyang that raya

Peue meuhajat he judo droe
Peugah jinoe bak keukanda
Peue nyang nafsu kheun bak kamoe
Hai sambinoe peue na hawa
Ureueng binoe seuot pantah
Deungo lon peugah he keukanda
Wahe teungku nyang meutuah
Hawa leupah mamplam raja
Ureueng lakoe seuot rijang
Pakri jalan lon bicara
Takheun hawa keu boh mamplam
Dalam taman lampoh raja
Bek antara tajak lakee
Hana jan bee jipeunuga
Wahe judo bungong keumee
Tayue poh kee mangat fana
Han taingat masa dilee
Deungon kayee jipoh bak muka
Hanjisayang ube gutee
Jipoh kee sang-sang musoh ma
Ban jideungo uleh binoe
Maken jimoe ngon meu'a'a
Maken leubeh lom that jimoe
Ngon meulangoe ro ie mata
Teuma marit ureueng lakoe
Bek le tamoe po jroh rupa
Lon jak mita jinoe rijang
Boh mamplam nyang gata hawa
Adat mate peue lon paban
Ka grak bak Tuhan meunan kada
Teuma geujak laju yoh nyan
Boh mamplam nyan geujak mita
Laju geujak taloe jalan
Trok u peukan ka geuhala

Troh u rumoh ka geupiyoh
Sebab tuboh payah rasa
Puleh payah tho ngon reuoh
Teuma beudok jak meumita

Geujak le bak ureueng meukat
Geudong teutap hana haba
Geumeung lakee han meureunggot
That teumakot jipeunuga

Rakyat kalon si miseukin
Ji meukheun-kheun dum jirata
Dumna ureueng yoh nyan jingieng
Si miseukin lom ka teuka

Kacok kayee kapeukaru
Kalet laju nak jigisa
Ladom jikheun bek kapeukaru
Kadang na peue jijak mita

Teuma tanyong sidroe ureueng
Cuba kakheun peue hajat na
Peue jak mita he miseukin
Peugah bak lon laju sigra

Lon eu teudong got that teutap
Peue na hajat tajak mita
Si miseukin seuot leugat
Raya hajat lon han tara

Meung na gaseh deungon sayang
Keu lon tuan ureueng hina
Neubri saboh nyan boh mamplam
Nyang ka leumbam han le guna

Nyang ka neutiek u dalam broh
Neubri saboh teungku raja
Ban jideungo meunan tuto
Ureueng nyang le duka cita

Ureueng bandum teuka sayang
Sang leukang hate lam dada

Bandum ureueng insaf hate
Yoh nyan jibri peue-peue nyang na
Ladom bri breueh ladum bri bu
Ladom bri u ladom saka
Nyang bri pisang dum boh kayee
Ladom sukee jibri ija
Bri siluweue ija bajee
Ladom teuntee peue mudah na
Ka meutamon dum makanan
Macan-macan le that rupa
Si miseukin hireuen mandang
Geukalon nyan dum peukara
Dalam hate pike dilee
Meunoe lagee hantom nyang ka
Nyang baroekon han jan rab kee
Deungon batee jigeulawa
Pakon jinoe banci han le
Meunan pike dalam dada
Ucap syukur pujoe Rabbi
Geujak woe le teuma sigra
Hana macam mangat hate
Woe kembali dalam rimba
'Oh sare troh keudeh u gle
Peujaroe le ubak nisa
Teuma bandum ka geupeugah
Masa sideh yoh di banda
Habeh geukheun hai di peukan
Gaseh sayang ureueng dumna
Teungoh-teungoh geupeugah proe
Ureueng binoe ro ie mata
Sira geumoe peugah meunoe
Mamplam nyoe kon mamplam raja
Mamplam laen neuba keunoe
Meunyo nyoe beuthat bek na

Mamplam laen hana hajat
Nyang hawa that·mamplam raja
Neubri mate lon ya Tuhan
Keureuna nafsu han ek saba

Meunan narit po nyak Siti
Di suami susah raya
Geungieng judo jimoel sab
Sang hana le leumah cahya

Teuma geukheun uleh lakoe
He sambinoe bek le rugha
Bahle lon jak laju jinoe
Boh mamplam nyoe lon jak mita

Sira geumoe geujak leugat
Troph bak teumpat rumoh raja
Bak uroe nyan rame rakyat
Jak meuhadap deungon raja

Teungoh peugah dum khabaran
Si miseukin keunan teuka
'Oh troh keunan bak sultan
U dalam geutamong lanja

Ban geukalon si miseukin
Marah yoh nyan Indra Diwa
Pajan keunoe he miseukin
Peue na ingin tajak mita

Si miseukin laju seuot
Nyum teumakot hate lia
Sireuta deungon sembah sujud
Bak teuot geudaulat raja

Ampon tuanku meuribee katoe
Hajat lon nyee sangat raya
Hajat patik keunoe datang
On mamplam lam taman raja

Meung na gaseh tuanku droe
Keu kamoe ureueng that hina

Nyang ka luroh sret bak karang
Hajat laman laen hana

Teuma tanyong le sultan
On mamplam nyan keupeue guna
Peue kapeugot nyan on mamplam
Raja tanyong neupareksa

Si miseukin seuot rijang
Syahi alam deungo hamba
Lon meupeugot keu makanan
On mamplam nyan lon meuhawa

Raja pike teuma yoh nyan
On kayee nyan pakri rasa
Meunyo meunan kon on mamplam
Boh lam karang jimeuhawa

Meunan pike raja nanggroe
Geukheun meunoe bak bentara
Raja suroh ubak meuntroe
Jak cok jinoe mamplam saka

'Oh lheueh sabda nibak doli
Ka jijak le hana dakwa
Pot boh mamplam saboh tangke
jijok le keu ureueng hina

Mangat hate si miseukin
Lakee izin teuma gisa
Dalam rimba geuwoe rijang
Ngon boh mamplam sajan geuba

'Oh sare troh ubah judo
Geujok laju mamplam saka
Mangat hate dara baro
Teukhem laju rumeh muka

Cok boh mamplam dalam bungkoh
Hate mayoh hana tara
Sare habeh lheueh geupajoh
Mangat tuboh puleh hawa

Mangat hate po nyak buleuen
Hantom siseun le meudakwa
Teutap geidueuk dalam huteuen
Hana peue kheun meuseusuka

Umu nam buleuen dalam hame
Ka meuri cot bungong jeumpa
Teukeudirullah bak siuroe
Ureueng binoe nyang jroh rupa

Lom ka jimoe Siti indah
Jikheun pantah bak judonya
Wahe teungku nyang meutuah
Boh panah sangat lon hawa

Jinoe judo jak seuleuah
Boh panah lam taman raja
Ban geudeungo kheun isteri
Jinoe pakri lon bicara

Sang di kamoe han beurani
Dua kali ulon teuka
Kadang-kadang han le geubri
Jinoe pakri ilah daya

Ureueng binoe peugah teuntee
Neujak dilee ubak raja
Meuhan geubri 'oh neulakee
U juree keunoe neugisa

Ban geudeungo haba meunan
Geujak yoh nyan han le dakwa
'Oh sare troh bak sultan
Tamong rijang dalam kuta

Raja tanyong teuma leugat
Peue na hajat keunoe teuka
Si miseukin jaroe angkat
Geudaulat geuseumah raja

Daulat ampon payong nanggroe
Hajat kamoe sangat raya

Meung na gaseh tuanku droe
Keu kamue nyang hina dina
Pateh hajat he daulat syah
On panah nyang sret u donya
Nyang ka luroh sret u bumoe
Bri keu kamoe po meukuta

Raja deungo haba meunan
Keupeue on nyan kajak mita
Si miseukin peugah yoh nyan
Keu makanan patek hina

Raja pike lam hate droe
On panah nyoe keupeue guna
Boh nyang masak bahle kubri
Kenduri keu ureueng papa

Geujok saboh panah masak
Hate galak hana tara
Cok boh panah laju geujak
Puwoe ubak judo muda

Dalam rimba woe kembali
Hingga sampie bak judonya
Jok boh panah keu isteri
Jisambot le rumeh muka

Ureueng binoe hate mayoh
Sebab ka troh nafsu hawa
Proh boh panah laju pajoh
Mangat tuboh lazat rasa

Beureukat aneuk dalam kandong
Tuhan tulong peue nyang cita
Masa hame po nyak buleuen
Makanan dum ureueng bawa

Jijak intat uleh ureueng
Dalam huteuen keunan jiba
Ladom me breueh ladom me eungkot
Ladom balot bungkoh ija

Gaseh hate dumna rakyat
me boh langsat boh seumeuta
Nyang ladom ba giri bali
Ladom campili ladom sira

Deungon grak Allah ka teukeudi
Rezeuki keunan dum gob ba
Padum lawet teuma dudoe
Hame patroe maken raya

'Oh troh watee buleuen sampoe
Po sambinoe aneuk ka na
Lahe aneuk ureueng lakoe
Hana bagoe indah rupa

Siulah sang matauroe
Dalam nanggroe hana nyang sa
Di ma sinyak ka geumadeueng
Lethat ureueng keunan teuka

Timu barat teuka ureueng
Jak kalon budak baro na
Maseng-maseng ba peunajoh
Geubungkoh ngon ija sutra

Ban jikalon rupa that jroh
Ka meuseunoh com deungon wa
Jitimang ngon jikheun panton
Su meualon leupah gura

Adak enyak kutimang prak
Meuhayak seulanga dara
Lon eu singyak puteh meuprak
Lon eu galak cahya mata

Adak enyak kutimang ban
Jeh rihan timoh lam paya
Lon ngieng sinyak bukon sayang
Gata intan dalam rimba

Allah hai do kuda idi
Seusawi timoh lam paya

Sayang sinyak soe padoli
Boh hate po bijeh mata

Allah hai do kuda idi
Di pasi aron meubanja
Ma-teuh madeueng soe peudoli
E puteh di dalam rimba

Allah hai do kuda ido
Peuraho tamong kuala
Sayang sinyak bungong kundo
Soe peuato bungong jeumpa

Allah hai do kuda ido
Peuraho payang jeunara
Sayang sinyak puteh hijo
Tahe gante dalam rimba

Reudok di gle hujeuen leubat
Sinyak pot kùlat bateueng ara
Lon eu sinyak rupa jroh that
Sang siat bek cre di mata

Reudok di gle hujeuen meuprot-prot
Aneuk guda rot on capa paya
Keupue guna ruman sinyak got
Han soe seutot keunoe lam rimba

Reudok di gle hujeuen meubram-bram
Di gle manyang ureueng seumuga
Sayang sinyak bungong keumang
Soe peutimang ayeuen mata ma

Reudok di gle hujeuen meupree-pree
Luroh boh kayee musem keunong sa
Sang bek leukang lam peulangkee
Bungong keumee po bijeh mata

Meunan keudum syair panton
Ureueng gampong rame teuka
Cok sinan peu-eh lam ayon
Sra jitren keunan mata

Jitren sinan laju jiwoe
U rumoh droe laju gisa
Teiduek haba ureueng nyang woe
Lon hareutoe ureueng dua

Ma sinyak madeueng di dapu
Di teungku cok cangkoi raya
Cangkoi tanoh meunan hajat
Peuget teumpat meung lhee dupa

Geumeung peudong peuet boh tameh
Bak teumpat preh jamee teuka
Teungoh-teungoh cangkoi tanoh
Yoh nyan leumah guroe raya

Geucok guroe ka geupeuhah
Meuh bahrullah geungieng rupa
Meuh permata dum di dalam
Kon bubarang hate suka

Geungieng cahya that seumeulhoh
Judo pitroh keunan sigra
Ureueng binoe kalon bangon
Ka teusinyom rumeh muka

Ubak lakoe uyoh nyan geukheun
Deungo ulon teungku raja
Meuh intan nyoe dum sinaroe
Troh sampoe bak cuco gata

Khendak Tuhan bak masa nyoe
Keu geutanyoe ureueng hina
Balah susah yoh saboh roe
Geunab uroe gob enaya

Neubri seunang teuma jinoe
Duengon meuh nyoe neukarunia
Wahe teungku ureueng lakoe
Deungo kamoe sikrak haba

Neucok meuh nyoe meung lhee katoe
Neujak publoe dalam banda

Neubloe ija meung dua krak
Tumpe sinyak nyang baro na

Laen nibak nyan peue nyang patot
Neubloe bacut meung sikada

Meunan haba ureueng binoe
Ureueng lakoe hate suka

Geucok le meuh na lhee katoe
Geuba jinoe bak syedaga

Antah Beurantah geujak leugit
Sinan le that ureueng kaya

'Oh sare troh keunan sampoe
Bak sidroe syedaga kaya

Syedaga ngieng si miseukin
Geubri saleuem yoh nyan sigra

'Oh lheueh saleuen mumat jaoroe
Tanyong meunoe le syeaga

Pajan keunoe he teungku droe
Hantom proe dilee nyang ka

Bak keurusи peudeuk rijang
Indah han ban pemeulia

Na sikeujab ka troh hidang
Makeuen yoh nyan sama dua

'Oh lheueh makeuen pinah hidang
Marit yoh nyan lem syedaga

Peue na hajat he teungku droe
Kheun bak kamoe laju sigra

Si miseukin jaweueb meunoe
Hajat kamoe keunoe teuka

Geucok bungkoh nyang meubalot
Geupeu sambat bak syedaga

Nyoe pat meuh bak ulon bacut
Tulon siat keu lon hina

Tabloe kawoh meung sipasang
Keu lontuan ureueng hina

Ban jikalon meuh meuhuke
Hireuen hate lem syedaga
Yoh nyan leumah dalam hate
Saleh pane meuh nyoe jiba

Pat jicok meuh dum lethat
Meunan ingat dalam dada
Keumeung tanyong han beurani
Jimeujanji yoh nyan sigra

Wahe teungku deungo lon peugah
Nyang kawoh sah jeued lon mita
Tapi sithon lon meutanggoh
Mita nyang jroh indah rupa

Si miseukin yoh nyan geukhen
Adak sithon bak lon suka
'Oh lheueh izin laju geutren
Jak ho laen teuma sigra

Bak syedaga laen geujak
Yue bloe tungkat nyang jroh rupa
Teubiet sinan jak ho laen
Yue bloe payong ija sutra

Nyang ladom geuyue bloe peudeueng
Ladon ureueng bloe peulana
Rata bandum ka geuyue bloe
Teuma geuwoe laju sigra

Troh u rumoh geujak manoe
Mangat asoe jeueb anggota
'Oh lheueh manoe hate galak
Geucok sinyak lam leumueng ma

Mangat hate hana bagoe
Teuma dudoe mohon pinta
Ngon meutuah aneuk lon nyoc
Beujeued nanggroe dalam rimba

Beujeued saboh nanggroe luah
Bejeued ayah teuh keu raja

Iuleebalang dum sinaroe
Vazir meuntroe ngon peutua
Beu jitaklok bandum keunoe
Neubri sampoe ya Rabbana
Meunan cita raja nanggroe
Tuhan sidroe kabui doa

Khendak Tuhan lam iradah
Neupeuleumah tanda kuasa
Beureukat aneuk nyang meutuah
Nikmat limpah neukarunya

Neupeuleumah keukayaan
Bak insah nyang duek lam donya
Tuhan peujeued saboh nanggroe
Luah han soe dalam rimba

Nanggroe luah hana sabe
Ka gadoh gle teudong kuta
Lom meuligoe teudong leugat
Tujoh tingkat jroh meubanja

Ngon grak Tuhan po hadarat
Cukop leungkap dum peukara
Meuligoe jroh cahya peungeuh
Keurusi meuh jroh meubanja

Hase cukop sileungkapan
Khendak Tuhan siklep mata
Geupeudong kuta jroh meureutang
Pujoе Tuhan ureueng dua

Alhamdulillah sigala pujoe
Tuhan sidroe that kuasa
Ka neupeutroh hajat kamoe
Ban sinaroe ka seumpurna

Balah susah yoh saboh roe
Jeueb-jeueb nanggroe gob enaya
Neubri seunang bak masanyoe
Keu kamoe nyang ham ba gata

Ade Tuhan hana bagoe
Beurang kasoe han ek hingga
Nyang ka lheueh na pi ek jeued tan
Kudrah Tuhan Nyang Kuasa

Meunan narit si miseukin
Masa nyan ka jeued keu raja
Si miseukin yoh saboh roe
Deungo jinoe lon kheun nama

Lon peugah nan mangat neuri
Nan geurasi INDRA ANGKASA
Tuan putri judo doli
RATNA DEWI geukheun nama

PUSPA SARI nama nanggroe
Ban dua droe hate suka
Teutap geudeuk lam meuligoe
Lakoe binoe suka cita

Keurusi meuh sangat indah
Meutatah pudoe meutia
Siulah ban buleuen peuet blah
Hijo mirah jiplueng cahya

Padum lawet geudeuk dasyah
Teuma meugah jeueb-jeueb raja
Jeueb peutua dalam gampong
Jeueb-jeueb ureueng meugah haba

Ka meugah u nanggroe laen
Si miseukin ka jeued keu raja
Soe nyang deungo tahe hireuen
Ji meukheun-kheun ajayeb raya

Bukan ajab hana bagoe
Saboh nanggroe dalam rimba
Saboh kuta nyang luah that
Asoe leungkap dum peukara

Jeueb-jeueb nanggroe meuthee rijang
Troh dum keunan rakyat teuka

Le that ka troh keunan ureueng
Teungku imum ngon peutua
Ureueng Ingreh deungon Parisi
Banggali ngon ureueng Cina
Ba meuneukat lada kupi
Banggali nyang meukat ija

Meukat toko dum sibarang
Gleueng ngon subang pawon suasa
Nyang ladom meukat sipatu
Ladom taeu meukat saka

Meukat toko barang jampu
Ladom taeu toko kaca
Macam-macam dum troh barang
Ureueng dagang rame teuka

Nyang tukang-tukang yue seumeugot
Nyang aneuk miet jak sikula
Cawan pingan dumpeue cukop
Nyang got lagot meukat ija

That meuguyah Puspa Sari
Ulee-ili ureueng teuka
Peukan rame hana sakri
Kleng ngon Hindi rame raya

Le thet ureueng laju sampoe
Makmu nanggroe hana tara
Po teuraja lam meuligoe
Deungon putroe meseusuka

Mara Karma nyang samlakoe
Ho siuroe rayek sigra
Maken rayek bungong meulu
Maken laju indah rupa

Ka meutamah cidah laju
Miseue taeu aneuk Indra
Hana bandeng lam nanggroe nyan
That analan aneuk raja

Soe nyang tilek ateueh ruman
That kasihan dalam dada
Teutap raja lam meuligoe
Dengon putroe Dewi Ratna

Bersukaan geunap uroe
Teuma dudoe grak Rabbana
Khendak Tuhan Maha Suci
Ratna Dewi hame pula

Hame putroe bungong karang
Lang geumilang cahya muka
Sigala raja keunan datang
Meuntroe bujang ngon peutua

Jak lam kuta dum sibarang
Hadap johan raja raya
Aneuk raja seudang-seudang
Trok dum keunan bak meukuta

Lom syedaga pi rame tron
Me peunajoh dum keu raja
Maseng jiba bungong jaroe
Keu cut putroe judo raja

Meunan sabe geunap uroe
Hingga putroe troh kutika
Geunap buleuen hame putroe
Aneuk sidroe teuma lom na

Lahe budak ureueng binoe
Rupa pi nyoe bijaksana
Rupa miseue bintang kutob
Dalam sagob jiplueng cahya

Kulet puteh sang keureutah
Bibi mirah sang keusuma
Sapal dua dum geurawot
Jaroe tirut sang geujangka

Ok di ulee patah manyam
Miseue bintang cahya mata

Gigoe leuntek jroh han sakri
Sang taeu hi aneuk Indra

Bulee keuneng jroh that cakap
Meusambot that ngon bulee mata
Andam bak dhoe sang buleuen lhee
Meuglong ulee putroe mada

Takue panyang rayek seudang
Soe nyang pandang hate suka
Badan cut nyak jroh that rampeng
'Oh teukhem jibeudoh cahya

Sideh sinoe ureueng datang
Putroe intan atueuh kata
Jicok sinyak jiseumanoe
Jipasoe lam ayon sutra

Peu-eh sinyak dalam ayon
Jikheun panton sira doda
Adak e nyak kuda idi
Bungong campli rhet meukeuba

Sayang sinyak cut puteh di
Tangke hate ayeuem mata ma
Jak kutimang bungong panjoe
'Oh cot uroe layee rata

Lon ngieng sinyak mata pudoe
Ayeuem jaroe du deungon ma
Reudok di gle hujeuen hana toe
Pade blang sagoe han jeued le pula

Kana sinyak rupa ban uroe
Raja ngon putroe hate that suka
Nyang puteh bungong keureutah
Nyang cidah seulanga dara

Sinyak putroe ulon peugah
Peukeumah le ureueng tuha
Geupeusunteng ngon bu leukat
Meunan adat raja-raja

Po teuraja hate mangat
Puteh leumat geucok geuwa
Cok neutimang uleh doli
Nan neurasi KASOM NILA

Nila Kasom nan neurasi
Ratna Dewi hate suka
Po teuraja pangge meuntroe
Dalam nanggroe ngon bentara

Raja suroh meupehasan
Neurasi nan putroe Nila
Jipeungot le dam pehasan
Palee geundrang ngon biula

Jipeh tembo yub seurune
Rakyat rame rumah raja
Ladom taeu jimeunari
Jiyub bangsi mangat suara

Teuma beudoh lom aneuk Kleng
Jiyub suleng peh nukara
Jimeunari that meupuseng
Ureueng nyang ngieng hate suka

Ngon panyot hu that trang bendarang
pehasan meubagoe rupa
Meu'en daboh meu 'en sunglap
Meu 'en silat pithat gura

Jipeh geundrang ngon hareubab
Cakap-cakap pehasan dumna
Le that bagoe dum pehasan
Galak han ban ureueng teuka

Po teuraja yoh nyan neutren
Neujak salen rakyat dumna
Habeh bandum raja salen
Bri siseun bajee ija

Peuet ploh uroe deungon malam
Pehasan hana tom reuda

Makeuen minom sileungkapan
Bersukaan rakyat dumna

Jisie lumo meureutoh ploh
Keupeunajoh soe nyang teuka
'Oh habeh nyan laen ka troh
Dengo kiroh sang prang raya

Hingga sampoe uroe peuet ploh
yoh nyan piyoh han le kubra
Ngon pehasan pika teudoh
Ureueng nyang troh habeh gisa

Puteh-puteh bungong keupula
Nyang gura bungong sitahon
AMMA BAKDU he saudara
Laen banja ulon suson

Sireuta lon balek ragam
Begot tafam nyang haba lon
Meunyo set-set hana got reumbang
Balek macam laen ujong

Keu syedaga ulon peugah
Antah Beurantah sideh gampong
Lam nanggroe Antah Beurantah
Syedaga nyang raja suron

Ban jideungo le syedaga
Sidroe raja pangkat lambong
Si miseukin jeued keu raja
Dum syedaga tahe hireuen

Po syedaga musyawarat
Pakri pakat geutanyoe dum
Janji dilee dum geutanyoe
Ka sampoe bak tanggoh sithon

Maseng-maseng di syedaga
Jak mita barang neusuron
Mita taloe jak bloe guda
Ladom mita peudeueng rancong

Mita tambo ngon biula
Ladom teuma jak mita gong
Hingga cukop dumpeue leungkap
Jibeurangkat tinggai gampong

Puspa Sari jipeuteupat
Me lat-batat raja suroh
Bandum rata bungong jaroe
Jak meuranjo dum meukong-kong

Peh tambo giseng biula
Ladom teuma jipalee gong
Tarek gambang su that gura
Peh nukara jikheun panton

Sira geujak meupehasan
Subra kiam sang hujeuen tren
Ngon pupanji macam-macam
Hijo hitam ngon lembayong

Padum lawet perjalanan
sampie yoh nyan bineh gampong
Ban jingieng le ureueng nanggroe
Jak hareutoe le u geudong

Huleebalang jak hareutoe
Ampon kamoe daulat payong
Ampon tuanku po jonjongan
Lethat alam keunoe langsung

Ngon pupanji puteh hitam
Lom pehasan jipalee gong
Lethat ureueng keunoe datang
Peue geurangan dalam gampong

Teuma suroh nibak raja
Jak pareksa keudeh tatreng
Cuba teubiet u lua kuta
Tapareksa pane gampong

Kadang musoh keunoe teuka
Teubiet gata prang tapuphon

Ban jideungo sabda raja
Jijak sigra taloe jurong
Wazir meuntroe tro u lua
Syedaga keunan langsung
Ban troh keunan meuhadap ka
Tanyong sigra bak mula phon
Ho keuneung jak bandum gata
Peugah sigra pane gampong
Lam kawan nyoe soe panglima
Tacalitra jinoe bak lon

Peue na hajat keunoe datang
Khendak muprang reuloh gampong
Ngon suara subra riyoh
Sang-sang musoh dum meuron-ron

Meunyo musoh piyoh siat
Peue na hajat peugah bak lon
Syedaga dum seuot pantah
Jioh langkah keunoe lon tren

Di nanggroe Anta Beurantah
Meulangkah bak raja payong
Nama kamoe dum syedaga
Hadap raja panyot tanglong

Tajak peugah ubak raja
Kamoe teuka jioh gampong
Ban jideungo meunan haba
Jiwoe lanja dalam geudong

'Oh ban sare troh u dalam
Dua tangan angkat lambong
Daulat ampon po meukuta
Nyang di lua tango suara gong

Suara canang di lua kuta
Dum syedaga keunoe jitren
Syedaga Anta Beurantah
Jilangkah bak daulat ampon

Meunan haba meuntroe peugah
Di khalifah laju meuphom
Yoh nyan teuma sabda raja
Bak syedaga dalam gampong

Hei syedaga teubiet gata
Jamee teuka ba lam geudong
Tajak eumpeueng jamee teuka
Keunoe taba laju bak lon

Lheueh peurintah nibak raja
Teubiet sigra dum meuron-ron
'Oh sare troh u lua kuta
Saleuem jiba jroh meususon

Assalamu'alaikum jamee teuka
Saleuem raja nyang po gampong
Neuyue jak tueng bandum gata
Jinoe sigra tamong ngon lon

Ban jideungo le syedaga
Tamong lanja dum meuron-ron
'Oh sare troh dalam kuta
Ubak raja sujud jundrong

Bandum sujud meureundah diri
Ubak doli raja payong
Suroh raja ubak wazir
Teumpat tabri jemee ban tren

'Oh lheueh titah ubak doli
Meuntri wazir jaroe seuon
Teungku piyoh teumpat ini
Bak keurusи ubai sabon

Bak kamoe gle hana tika
Cara kuta hana meuphom
Bek weueh hate wahe teungku
Piyoh laju bak teumpat lon

Kamoe lam gle han'got laku
Banda satu hantom meutren

Syedaga dum yoh nyan teukhem
Jipaleng jitop-top hidong

Teuma duek le bak keurusi
Nyang meuhuke meuh meususon
Jipot-pot droe bak keurusi
Wet-wet gaki ngon peudayong

Tahe laloe jingieng kuta
Ngon mata jipeu-ek peutren
Jimeukheun-kheun han sapat sa
Meunoe rupa jeueb-jeueb gampong

Teungoh-teungoh peugah haba
Hidang pika troh meususon
Yoh nyan wazir beuot jaroe
Bek le laloe teungku ampon

Teungku makeuen bu ngon sira
Eungkot hana kamoe duson
Bak pisang bue deungon kala
Nyankueh nyang na kuah reubong

Nyang eungkot meuseuke raya
Jioh banda hantom lon tren
Lom ka teukhem di syedaga
Jibuka hidang meususon

Buka hidang kheun bismillah
Eungkot kuah dum jisinthong
'Oh lheueh makeuen pinah hidang
Lam puan ranub meususon

Geuboh ranub meukoh tangke
Lam bate pineung teulason
Jicok ranub ka jipajoh
Teubiet reuoh badan tutong

Habeh ranub piep ngon rukok
Nyang meusinyok mirah bak ujung
Sira meunukok peugah haba
Dengan raja nyang po gampong

Bandum hadap ubak raja
Peugah haba bak mula phon
Nvoe pat peuneusan tuanku droe
Nyang neuyue bloe dilee bak lon

Nyang tuanku yue jak mita
Sigala habeh lon peutren
Habeh bandum keunoe lon ba
Tinggai hana saboh bak lon

Ban nyang suroh han lon tuka
He meukuta panyot tanglong
Raja seuot pi meukenong
Lon teurimong deungon lansong

Dum sibarang lon teurimong
Han le utang gata ngon lon
Raja suroh ubak meuntroe
Cok tapuwoe dalam geudong

Lheueh teurimong dum hareuta
Syedaga salen siseun tren
Bandum neubri peusalenan
Peukayan bajee ija krong

Habeh bandum raja salen
lakee izin woe u gampong
'Oh lheueh izin nibak raja
Woe le sigra dum meuron-ron

Sira geujak peugah haba
Riyoh subra taloe jurong
Troph u gampong dum syedaga
Teuduek haba siat puntong

Aneuk tiong di cong panjoe
Jipoh-poh droe lakee ampon
Teuduek haba syedaga woe
Raja nanggroe jinoe lon kheun

Raja suroh bak bentara
Meunoe haba neutri maklum

Tajak gata dua tiga
Taiak mita ahli nujum

U nanggroe Anta Beurantah
Tayue langkah keunoe bandum
Takheun ulon hajat leupah
Yue meulangkah keunoe siseun

'Oh lheueh titah nibak raja
Bentara beudoh le mameung
Jiba rakan dua tiga
Jijak sigra langkah jareueng

Ureueng nyang jak teuduek siat
Lon riwayat laen ureueng
Indra Dewa nyang berpangkat
Jihei leugat ahli nujum

Yoh nyan raja musyawarat
Pakri pakat geutanyoe dum
Raja tanyong ngon muslihat
Sebab daulat hate seuuem

Si miseukin jeued keu raja
Saboh kuta dalam huteuen
Nyang keuh sebab hate luka
Indra Dewa hate seuuem

Wahe nujum toh bicara
Cuba sigra jinoé takheun
Si miseukin jeued keu raja
Nibak gata pakri maklum

Di ulon that saket hate
Ude-ude duek lam miduen
Wahe nujum pakri pike
Mangat bek le jih keurajenen

Aneuk jih dua agam ngon dara
Pakri rupa cuba takheun
Meunan haba nibak daulat
Buka kitab ahli nujum

Habeh jilob sigala bab
Deungon siat ka meuteumeung
Jipeugah le ubak raja
Meunoe haba jibri maklum

Aneuk dua agam ngon dara
Tuah raya han soe linteueng
Meunyo hudep aneuk dua
Lom meuganda luah mideuen

Sebab tuah aneuk dua
Jeued ayahanda mat kheurajeuen
Teungoh-teungoh peugah haba
Trok le teuka dumna ureueng

Nyang neusuroh uleh raja
Sampoe sigra keunan bandum
Suroh raja Puspa Sari
Nujum ahli neuyue jak tueng

Yoh nyan wasiat Indra Dewa
Bak sigala ahli nujum
Wahe nujum dum sineuna
Wasiat hamba tadeungo dum

Ureueng ka troh keunoe teuka
Jak tueng gata ba u mideuen
'Oh jitanyong ubak gata
Aneuk dua pakri maklum

Tapeugah jih that cilaka
Nibak raja meunan takheun
Sebab jin nyan jeued keu raja
Habeh tandra keudeh jiplueng

Habeh jitueng dum syedaga
Barang jiba keudeh bandum
Jime barang dum peukara
Jiba guda rincong peudeueng

Jih nyan jiduek lam meuligoe
Rakyat tanyoe dum teueng-bayeueng

Rakyat ulon dum lam nanggore
Rame han soe keudeh jiplueng
Jih that hina dilee masa
Jinoe teuma jimat mideuen
Teuka keunoe jak meumita
Deungon ija dum teueng-bayeueng

Nyangkeuh ulon malee raya
Nibak gata haba lon kheun
Top meunalee lon le gata
Nanggroe Puspa mangat king-keueng

Ulon harap nibak gata
Nyan rahaesia bek takheun-kheun
Takot dudoe jeued sengsara
Jiprang kuta deungon mideuen

Han tapateh ban lon peugah
Dudoe susah gata bandum
Ban wasiet lon bek taubah
Bek tapeugah laen ureueng

Ahli nujum sueot pantah
Ban nyang titah han soe linteueng
Han lon ubah po meukuta
Ban nyang sabda habeh maklum

Ulon keubah di jeumala
Han lon tuka ube beudeueng
Lakee izin ubak raja
Laju gisa ahli nujum

Maseng-maseng woe u teumpat
Tinggai daulat dalam mideuen
Nujum ka troh ubak teumpat
Piyoh siat duek teujaneun

Ureueng nyang jak lon calitra
Suroh raja jak tueng nujum
Hingga sampoe troh geuhala
Tamong lanja keunan bandum

'Oh sare troh meuhadap ka
Laju sigra memberi saleuem
Assalamu'alaikum ya syekhuna
Suroh raja kamoe bandum

Jak tueng teungku guree hamba
Suroh raja nyang po mideuen
Han jeued lambat cit beu jinoe
Dengon kamoe teungku neuplueng

Ahli nujum tanyong meunoe
Keupeue kamoe neuyue jak tueng
Peue peukara nyang meuseuke
Neuyue pangge kamoe nujum

Dum peusuroh jiseuot le
Bak lon syehi hana maklum
Nibak kamoe tan neupeugah
Le khalifah nyang po mideuen

Teungku bandum neuyue langkah
Cit bubagah meunan neukheun
Nujum deungo haba waki
Meukeumah le mameung-mameung

Cok ngon kitab nujum ahli
Beurangkat le sigo bandum
Na padum treb geubeurangkat
Treh le leugat ubak mideuen

Suroh raja yue bri teumpat
Ban nyang adat reuesam kanun
Sangat indah teumpat geubri
Bak keurusi nyang meureubeueng

Na si seikeujab dum beureunti
Treh khanduri u keue nujum
Marit sidroe huleebalang
Basoh tangan teungku bandum

Makeuen teungku bu.ngon asam
Eungkot cittan kamoe huteuen

Nujum deungo sang-sa.ig teukhem
Geupaleng teurunyuem-runyuem
Buka hidang teuma laju
Neupajoh bu teungku nujum
'Oh lheueh makeuen pinah hidang
Trok le puan keunan siseun
Pajoh ranub na sigapu
Teuma meusu teungku nujum
Peu-ek seumbah ubak raja
Ampon hamba bungong kareueng
Peue na hajat pangge hamba
Peue na sabda tuanku kheun
Tatkala nyan sabda raja
Deungo hamba teungku bandum
Nyang lon pangge keunoe gata
Na peukara ube beudeueng
Aneukek ulon na dua droe
Lakoe binoe dua ureueng
Sisyedara jih dua droe
Pakri jinoe teungku maklum
Cuba kalon dalam kitab
Na memfaat asoe leumueng
Peue na tuah ngon bahgia
Jih ban dua na kri maklum
Nyang agam ek jeued keu raja
Han sengsara asoe mideuen
Jeued keu putroe kasom Nila
Ban dua cuba teungku kheun
Atawa jih that cilaka
Reuloh kuta deungon mideuen
Meunyo cit jih meubahagia
Han jidakwa bandum ureueng
Beuranggasoe umat Nabi
Han jibanci ube beudeueng

Deungon raja jiduek rapat
Aneuk rakyat gaseh bandum
Peue geukheun le ureueng tuha
Ube seuma han jilinteueng

Pakri untong aneuk kamoe
Cuba jinoe teungku neukheun
Agam dara ban dua droe
Pakri bagoe nasib bulueun

Yoh nyan nujum buka kitab
Jikalon bab hana meulheueng
Habeh geungieng sigala bab
Hingga dapat ka meuteumeung

Aneuk dua meutuah that
meunan dapat pham le nujum
Maseng-maseng lam hate droe
Tan jihiro laen ureueng

Meunan pike nujum dumna
Meunoe hana tom meuteumeung
Meutuah that jih ban dua
Agam dara hana kureueng

Meung na umum dudoe teuma
Raja-raja dum jisinteueng
Jiprang kuta siat sampoe
Jiprang nanggroe hase sijeuem

Raja-raja dum jieungkhoe
Wazir meuntroe dum jidadeueng
Di nujum meuhasek ulee
Pakri lagee jinoe takheun

Teuingat keu wasiet dilee
Yoh di juree geubri maklum
Geuyue peugah jih cilaka
Wasiet raja yoh di medeuen

Meunan wasiet Indra Dewa
Bak sigala ahli nujum

Yoh nyan nujum meukeukira
Pakri daya tabri maklum

Meung tapeungah nyang sibeuna
Salah teuma troh u mideuen

Meuhat geupoh dum geutanyoe
Nyang got jinoe meunoe takheun

Takheun paleh jih dua droe
Akhe dudoe reuloh mideuen

Bandum pakat meunan haba
Keupala jiangkat siseun

Tangah ulee masam muka
Ia mata meurijeuen-rijen

Ban neukalon uleh raja
Tanyong sigra meunone neukheun

Pakon neumoe he teungku droe
Ubak kamoe neubri maklum

Bek teumakot bak neupeugah
Beuna salah han soe linteueng

Sira jimo nujum peugah
He daulat syah deungo lon kheun

Sayang lon that aneuk daulat
Rupa cakap miseue buleuen

Lon eu rupa miseue uroe
Ban dua droe hana kureueng

Teutapi sayang hana bagoe
Ka mupaloe ube beudeueng

Adat meungkon patah paroh
Yum meureutoh hana kureueng

Miseue manok patah tusoh
Han meusaboh ek jilinteueng

Adat meungkon aneuk dua
Teutap raja mat kheurajeuen

Ban dua droe that cilaka
Reuloh kuta deungon mideuen

Jiprang nanggroe jiteng kuta
Po teuraja jipupeudeueng
Aneuk rakyat jipubloe ba
Jipeuhamba dumna ureueng

Po teuraja meuhat talo
Jitueng judo pocut meugleueng
Habeh jiteng kuta manggroe
Dum sinaroe gob kheurajeuen

Duek bak tahta dijih keudroe
Aneuk nanggroe dum teueng-bayeueng
Pade han jeued dalam donya
Hujeuen hana sabe lam khueng

Nyankeuh haba he meukuta
Salah beuna habeh lon kheun
Bak tuanku ka meupeugah
Nyankeuh tuah asoe leumueng

Raja deungo meunan ulah
Muka mirah ji-ek seuuem
Ji-ek hitam cahya muka
Sang kala bungong lam huteuen

Nyum leukang hate lam dada
Seu-um raja hana peue kheun
Yoh nyan nujum raja saler
Jeuneh kain nyang meuhai yum

Habeh bandum neubri salen
Lakee izin ahli nujum
Daulat ampon payong nanggroe
Izin kamoe woe u mideuen

'Oh lheueh izin raja nanggroe
Nujum jak woe mameung-mameung
Dumna nujum woe u tangga
Tinggai raja dalam mideuen

U istana neu-ek bagah
Bak peuratah eh meuleubum

Nibak teu eh alo alah
Khalifah hate that seuuem

Sebab hate that beulisah
Hana tuah asoe le umueng
Neuduek salah neu eh salah
Hate susah hana peue kheun

Beudoh bak eh neujak manoe
Sira neumoe hana kureueng
Han cit puleh hate seungkoe
Maken tanggoe ji ek seu eum

Dukek teuseupok tumpang ulee
Sang sang seudee bak neupeunyum
Makeuen minom han le teuntee
Hate reudee hana peue kheun

Nyang cidah tok tok beuraghoe
Bulee bak dhoe hitam mirah
AMMA BAKDU teuma dudoe
Nibak bunoe nyoe nyang cidah

Miseue kuah gule rampoe
Beurangkasoe sret ie babah
'Oh tadeuengo roh bak tamoe
Meunankeuh proe ulah peugah

Pade raden nyang mangat bu
Simeulu ngon euntek karah
Ulon sambong meung sigeutu
Keu tuanku lom lon peugah

Susah hate hana bagoe
Neukheun meunoe ubak zaujah
Pakri laku he sambinoe
Deungo kamoe bungong mirah

Nujum peugah ubak kamoe
Aneuk teunyoe paleh leupal
Jikheun paleh that cilaka
Dalam kuta han jeued keubah

Ban dua droe tan bahgia
Meunan haba nujum peugah
Ban neudeungo meunan haba
Putroe muda pingsan reubah

Hana sapeu le na haba
Ka teuhanta bak peuratah
Puleh pingsan teuma jaga
Rhet ie mata peunoh limpah

Hana teudoh neumoe rugha
Marit teuma putroe indah
He tuanku beuna sayang
Keu lon tuan neungieng siblah

Aneuk dua beuthat sayang
Inong agam rupa cidah
Nibak ulon sang bahgia
Sebab dua aneuk lidah

Seulawet na aneuk dua
Jeued kuta rimba Potallah
Han neupike masa dilee
Keunong kayee ho talangkah

Ho nyang tajak jipubatee
Deungon alee jipoh bak babah
Ngon meutuah jih nyan dua
Neukaronya meuh meutatah

Gadoh huteuen teudong kuta
Nyankeuh tanda jih meutuah
Neupeulale le hadarat
Nyan alamat aneuk lidah

Nyan tanda jih meutuah that
Jeued berpangkat ma deungon ayah
Nyoe lon paban dumnan jeumba
Bek meukuta beunci leupah

Bek keuh neupoh cahya mata
Wahe raja nyang khalifah

Meunyo neupoh bungong sukon
Beu sajan lon sigo reubah

Beuna sayang teungku ampon
Neungieng keulon mata siblah
Meunyo raja that neubeunci
Yue peureugi ho nyang mudah

Bahle jijak ho nyang hate
Bek sinoe le taeu leumah
Meunan narit tuan putroe
Sira neumoe meuhah-meuhah

Teuma seuot raja nanggroe
Muka bagoe rimueng juah
Meung sayang kah he cilaka
Jinoe sigra yue meulangkah
Nak bek kupoh jih ban dua
Tan bahgia meung ube drah
Meuhan jijak jinoe rijang
Pileh tuleueng kakuet darah
Meunan narit bak sultan
Neumoe yoh nyan putroe indah
Maken geumoe that meu'i-i
Ratna Dewi badan basah

Teuma geukheun bak suami
Wahe doli neusabalah
Saba dilee meung sikeujab
Bek meukarat he daulat ayah
Sira neumoe putroe ubat
Neuheu leugat aneuk lidah
Keunoe siat he aneuk droe
Bungong uroe meuh meutatah
Nyang tapeurab ban dua droe
Ka neupeutoe ubak nang mah
Nyang tasujud bak teuot ma
Neucom neuwa aneuk lidah

Putroe neumoe meu'i-i
Dalam hate hanco bicah
Wahe aneuk jantong hate
Han meusampe ulon papah
Masa cutkon lon peutimang
'Oh ka sedang geuyue minah
Tajak aneuk taboh nanggroe
Deungon adoe lam rimba Allah
Hantroh hate lon peulara
han meurasa ulon papah
Teuboh ayon deugon tika
Bak gata jeumpa mirah
Bukon sayang cicem pala
Lam cintra jicok le siwah
Nyoe sineulheueh lon ngieng gata
Bungong jeumpa cre ngon nangbah
Bukon sayang lon eu subang
Patah meukhan bâk lon keubah
Sayang enyak bungong keumang
Boh hate nang geuyue minah
Bukon sayang kayee raya
Angen timpa habeh reubah
Sayang lon that keu gata dua
Neuyue bungka uleh ayah
Bukon sayang cicem nuri
Jinari di cong bak panah
Sayang aneuk bungong giri
That neubenci uleh ayah
Bukon sayang lon eu pisang
Angen teubang habeh patah
Lon ngieng sinyak bukon sayang
Sang bek leukang deungon nangbah
Bukon sayang mirah pati
Nibak gaki keunong geutah

Lon peulara han meusampe
Tangke hate aneuk lidah

Bukon sayang bungong jeumpa
Seulanga dua boh ulah
Lon ngieng aneuk sayang raya
Han lon sangka geuyue minah

Allah hai do kuda idi
Sisawi bungong keureutah
Sayang aneuk soe peudoli
Watee tacre deungon nangbah

Geucok aneuk geubri susu
Uleh ibu nyang meutuah
Hana teudoh geumoe ba-e
Ie mata ro peunoh limpah

Mara Karma tanyong meunoe
Pakon neumoe ma meutuah
Lon eu susah sabe neumoe
Dua kamoe peue na salah

Peue seunaket kamoe dua
Peue keunira nibak ayah
Laba rugoe peugah sigra
Bak aneukda ma meutuah

Seuot putroe Ratna Dewi
Bungong giri beunci ayah
Ateueh gata bala neubri
Nyang jeued umi hate bicah

Khendak Allah ateueh kamoe
Bak masa nyoe neubri susah
Geumeung jak boh gata jinoe
Geukheun sinoe han jeued keubah

Geukheun paleh that cilaka
Gata dua hana tuah
Ube leubeng tan bahgia
Meunan haba nujum peugah

Nyang jeued lon moe hai aneukda
Keu gata hate lon bicah
Sebab geukheun gata dua
That cilaka hana tuah

Meunan neukheun le ayahanda
Dalam kuta han jeued keubah
Dalam nanggroe han jeued gata
Neuyue bungka uleh ayah

Meuhan tajak neupoh mate
Han hudep le bungong mirah
Nyang jeued ulon reuloh hate
Lon moe sabe nyan keuh salah

Ban neudeungo narit ibu
Nyang taragu peue gob fitnah
Neuthee ayah keunong tipee
Bungong keumee yoh nyan reubah

Teuma neukheun ubak bunda
Ngon ie mata peunoh limpah
Meunyo meunan wahe poma
Keupeue guna lon neukubah

Han mee neutroh dalam kuta
That cilaka tan faidah
Jeued cilaka laen ureueng
Sebab ulon dudoe susah

Bahle lon jak deungon adoe
Lon boh nanggroe bekle leumah
Bah lon jak sabe cilaka
Bek lam kuta beunci ayah

Bek payah du geujak boh lon
Hai ma payong bek that susah
Poma deungo meunan haba
Tumbok dada aloh-alah

Di aneukda susah teuka
Ro ie mata peunoh limpah

Teuma beudoh bungong sukon
Geujak langsung ubak ayah

Ban dua droe geujak kunjong
Lakee ampon peue nyang salah
Wahe ayah neupeuampon
Dosa ulon nyang ka leupah

Ka payah neuugon-ugon
Jinoe cre lon ngon grak Allah
Ban dua lon ngon syedara
Meu'ah sigra barang salah

Neupeuizin wahe bunda
Susah nyang ka neubri leupah
Susah nyang ka neubri keu lon
Neupeuampon peue na salah

Padum payah neupeulara
Kamoe dua neumeupayah
Harap meu'ah bandum rata
Nibak bunda deungon ayah

Keureuna ulon khendak bungka
Bek lam kuta jeued keu susah
Hana tuah ngon bahgia
Keupeue guna lom neukubah

'Oh tan laba sabe rugoe
Singon dudoe teuka susah
Nyangkeuh sebab han jeued sinoe
Bah lon boh droe jinoe bagah

Sira peugah sira neumoe
Sang neumanoe badan basah
Ureueng laen pi habeh moe
Meulangoe ie mata jojah

Meusok-meusok dum lam kuta
Aneuk dara nyang le reubah
Jideungo narit aneuk raja
Ngon rupa ban buleuen peuet blah

Soe nyang kalon insaf teuka
Moe meu'a-'a dum kafilah
Teutapi nyang leubeh rugha
Nyankeuh bunda aloh-aloh

Hanco hate tuan putroe
Sang-sang nanggroe seupot leupah
Seupot seupeuet dalam nanggroe
Meunan bagoe hate gundah

Sang nyum mate Ratna Dewi
Bak taeu hi meunan ulah
Sabe neumoe tan beureunti
Nyum sang reule alam Allah

Teuma marit raja nanggroe
Kah dua droe hana tuah
Han jeued kaduek lam nanggroe nyoe
Beudoh jinoe laju bagah

Kajak laju ho nyang suka
Bekle rupa ku-eu leumah
Meunyo keunoe lom kagisa
Kah kusula nyawong sudah

Beudoh laju aneuk asee
Hareutakee dum kakeubah
Suet siluweue deungon bajee
Bandum teuntee ngon keupiah

Keubah bandum ngon tangkulok
Bekle kasok meung ube drah
Kajak laju bek kuinsyok
Aneuk budok paleh leupah

Han kurela kah dua droe
Han got bagoe biek habeusah
Kajak laju kah uroe nyoe
Bek kugilho ulee beukah

Meunan narit bak ayahanda
Aneuk dua pingsan reubah

Han sapeue jeued le meuhaba
Ban dua aneuk meutuah

Nila Kasom ro ie mata
Deungo haba nibak ayah
Teuma neukheun meunoe kata
Putroe muda jeumpa mirah

Mangat hate di ayahanda
Kamoe dua mee neumarah
Cilaka lon hana nyang sa
Beunci raya nibak ayah

Ka grak Tuhan ateueh ulon
Wahe untong kupa ban bah
Tadeungo su tilo alang
Meureuntang ie mata jojah

Teulheueh nibak nyan ka geubeudoh
Peukayan jroh dum geukeubah
Jisuet le gleueng keubah subang
Di abang keubah keupiah

Habeh geusuet dum peukayan
Seukalian nyang jroh indah
Nyang na tinggai siluweue brok
Tangkulok bandum geukeubah

Soe nyang kalon hate murok
Bungong tajok sayang leupah
Tutop aurat bintang pari
Bak umi neulakee meu'ah

Neupeumeu'ah wahe umi
Hari ini lon meulangkah
Meung na untong uroe page
Bak titi ulon preh nang bah

Uroe dudoe di akhirat
Lon meusapat deungon ayah
Bak uroe nyoe lon beurangkat
Dosa le that ampon bagah

Le that dosa kamoe dua
Nibak bunda deungon ayah
Harap meu'ah bandum rata
Ube nyang ka lheueh neupapah

Neusujud bak gaki bunda
Ban dua ngon gaki ayah
Mara Karma peugah haba
Ngon ie mata peunoh limpah

Bak dendayang lom neumarit
Lon aneuk miet bek neumarah
Sikrak saho leupah narit
Le deungon nit meu'ah oagoh

Bak uroe nyoe ulon bungka
Tinggai gata beumeutuah
Harap ulon bandum gata
Tapeulara bunda ngon ayah

Peue nyang geukheun bek tadakwa
Ho nyang geuba bek tabantah
Keu ulon bekle takira
Bah lam rimba lon jak minah

Sebab ulon that cilaka
Bek lam kuta dudoe susah
Bah lon jak ngon adek payong
Seutot untong nyang tan tuah

Habeh wasiet bintang pari
Seumbah umi deungon ayah
Laju geucom nibak gaki
Izin neubri lon cok langkah

Geucok adoe ka geutingkue
Sayang taeu nyak meutuah
Yoh nyan neukheun uleh ibu
Aneuk teungku sayang leupah

Tajak aneuk beu seulamat
Beuta ingat akan nang bah

Gata lon jok bak hadarat
Laen tan pat ulon seurah

Beu seulamat bungong giri
Tuhan neubri beu meutuah
Habeh wasiet nibak umi
Geucom Siti nyang meutuah

Deungon bangta ban dua droe
Lheueh nyan dudoe geucok langkah
Bangta neujak tingkue adoe
Sayang han soe taeu ulah

Ban meulikot aneuk dua
Dalam kuta bandum susah
Inong agam tuha muda
Rhet ie mata taeu jojah

Nyang leubeh that aneuk dara
Muda-muda cidah-cidah
'Oh jikalon bangta bungka
Tumbok dada aloh-alah

Jigaro ok jipriek bajee
Sang-sang seudee taeu ulah
Sayang jithat bungong keumee
Rupa lagee buleuen peuet blah

Hana sidroe taeu teukhem
Bandum ceuken muka mirah
Rhet ie mata dum meuleng-leng
Bintang canden sayang leupah

Nyang that rugha Ratna Dewi
Jipeureugi aneuk lidah
Hanco rasa jantong hate
Sang ka reule alam Allah

Ie mata ro han teudoh le
Rasa mate badan siblah
Han ek saba dalam hate
Ka neuplueng le seutot bagah

'Oh sare troh bak aneukda
Rhet ie mata lom meutamah
Miseue hujeuen ka keunong sa
Habeh ija bandum basah

Wahe aneuk tangke sabon
Ta tinggai lon he meuh meutah
Peue lakuan tatinggai lon
Tangke sabon ka taminah

Huteuen nyang toh aneuk tajak
Puteh meuprak ho talangkah
Lam rimba toh aneuk tadom
Bungong teuprom boh hate ma

Pat taeh aneuk 'oh malam
Ija pitan sijuek leupah
Soekeuh sayang je boh hate
Di dalam gle sangat susah

Putroe baë han teudoh le
Nyum sang mate habeh langkah
Han ek theun le cut putroe ti
Ratna Dewi yoh nyan reubah

Reubah pingsan ka meugule
Miseue bangke meunan ulah
Bangta kalon reubah umi
Neuriwang le keunan bagah

Neungieng bunda sang ka mate
Neucom gaki ban dua blah
Sira geumoe nyan ban dua
Geucom geuwa gaki nang mah

Yoh nyan geucom le aneukda
Dewi Ratna jaga bagah
'Oh ban jaga meusok-meusok
Bungong tajok geucom bagah

Neucok euncien saboh neujok
Neuyue sok bak aneuk lidah

Meuh keumala euncien saboh
Rupa that jroh meuh keureutah

Lom bu payeh na tujoh boh
He bangta jroh bulueun peuet blah
Bek weueh hate he aneukda
Ka troh masa khendak Allah

Mara Karma seuot sigra
Hai ma raja bek that susah
Keupeue neubri wahe bunda
Lon cilaka nibak ayah

Lon neubeunci le ayahanda
Hana laba wahe nang mah
Keupeu guna neubri keulon
He ma payong got neukeubah

Hana guna neubri keulon
Jeuheut untong paleh leupah
Sok bak gitek han meulaku
Sok bak putu rupa ubah

Menyo lon sok nibak gaki
Cahya meuble 'oh lon langkah
Meuhat jicok le pancuri
Nibak gaki lon jireupah

Jicok euncien jipon kamoe
Got neupuwoe wahe nang bah
Neudeungo narit bintang pari
Weueh that hate sang ka beukah

Ngon ie mata laju ile
He boh hate peue tapeugah
Meuhan tatueng he boh hate
Tapoh mate lon beubagah

Susah lon that he aneukda
Dalam dada hanco bicah
'Oh mate lon bijeh mata
Gata dua tameulangkah

Meunan neukheun tuan putroe
Bak aneuk droe dum neupeugah
Bangta pike teuma dudoe
Meunyo meunoe teuntee susah
Yoh nyan neukheun uleh bangta
Deungo hamba wahe nang mah
Wahe ma po bek susah le
Bek neupike lon meulangkah

Meng na tuah deungon bagi
Nibak titi lon preh nang mah
Meng na hudep lam donya nyoe
Lon woe keunoe saweue ayah

Dudoe teuma ulon gisa
Bekle rugha deungon susah
Bunda lon jok ubak Tuhan
Dua sajan deungon ayah

Kamoe dua meung berjalan
Ho nyang Tuhan izin langkah
Salah bacut kamoe dua
Nibak bunda deungon ayah

Yoh uroe jeh neuboh bijeh
Neupeh-peh bek le neukeubah
Yoh ban lahe dalam donya
Ban meukua neupoh bagah

Ban dua droe neupupana
Dudoe teuma han le susah
Poma deungo meunan haba
Rhet ie mata han peue peugah

Hana jeued le peugah haba
Moe meu'a-'a sang ka bicah
Bak masa nyan bungong seumpueng
Adoe aduen neucok langkak

Geupeuteupat rot lam uteuen
Lam reuen-mareuen rimba Allah

Leupah bungka bungong uroe
Habeh jimoem dum kafilah

Tuha muda habeh jimoem
Sang jimanoe badan basah
Inong agam moe han teudoh
Ma teungku beh that meuriyah

Han meuho le tunong baroh
Sang-sang ka troh azeueb Allah
Sang-sang bangon mate raja
Tuha muda aloh-alah

Bandum rakyat han le cahya
Nibak muka han le darah
Nan ban ureueng rhet suemangat
Gaduh ingat rhet aruwah

Sang-sang donya ka kiamat
Dumna umat hate susah
Teuduek 'oh nan ureueng nyang moe
Deungo jinoe ulon peugah

Leupah bangta na lhee uroe
Dalam nanggroe habeh bicah
Teuka apui dalam nanggroe
Ban peuet sagoe tutong sudah

Habeh tutong nanggroe Puspa
Kuta-kuta hangoh bicah
Ureueng nanggroe that seungsara
Teuka bala teukeudi Allah

Dumna rakyat habeh cre-bre
Meuntroe wazir badum susah
Makanan tan teumpat han le
Ladom u gle piyoh payah

Ladom rakyat teungoh u gle
Tarek awe ngon ceumeucah
Nyang ladom bungka u timu
Maseng laku jak tueng upah

Pajoh gaji ladom ek u
Nyang le taeu jak cok geutah
Habeh cre-bre saboh saho
Ka jiboh droe dum kafilah

Tinggai raja deungon putroe
Ban dua droe hate susah
Bineh huteuen teudoek sinan
Tan makanan deuek deugon grah

Bak masa nyan raja nanggroe
Ka geuthee droe jifiteunah
Meunan ingat lam hate droe
Raja nanggroe hate gundah

That jibeunci ulon sidroe
Sira geumoe meunan leumah
Meunan leumah dalam hate
Raja doli yoh nyan teulah

Geuseusai droe hana sakri
Moe meu'i-'i han peue peugah
Beudoh sinan teuma sigra
Dalam rimba neucok langkah

Sira geumoe nyan ban dua
Seutot sigra aneuk lidah
Padum buleuen seutot sabe
Han meupat le jeumpa mirah

Menyeusai that kon bubarang
Untong malang hana tuah
Peue faidah teulah akhe
Han guna le buet ka leupah

Sebab buet han jan teupike
Suntok sabe dalam susah
Nyankeuh rakan beuta ingat
Lon amanat meung sipatah

Beuranggapeue buet bek meukarat
Pike ingat dilee nyang sah

Beuranggapeue gob peuhaba
Bek peucaya dengon bagah

Beuna pike kira-kira
Pareksa beuna ngon salah
Keureuna sabab dalam donya
Le peusuna nyak meutuah

Buet nyang ubit jeud keu raya
Manusia jipubantah

Le that ureueng jipupake
Buet sijahe lalat mirah

Dalam donya lazem sabe
Cit ka lahe taeu leumah
Haba meunce jikheun meudeh
Jipeuhaleh jipeusalah

Beuta pike dilee habeh
Bek tapateh le ngon bagah
Bek ban miseu daulat raja
Geupeucaya nujum peugah

Hanjan pike kira-mira
Boh aneukda nyang meutuah
Ngon sebab nyan jeued seungsara
Lom meureuka nibak Allah

Nibak Tuhan han neurela
Takeurija meunan ulah
Taboh aneuk cahya mata
Dosa han meung ube drah

Nyan amanat he syeedara
Bacut saja ulon peugah
Geupeuingat jaga-jaga
Bek teulajo roh buet salah

Meunyo tatem tapeucaya
Menyo hana lon paban bah
Bukon sayang bungong manggeh
Boh jih habeh musang seupah

Teiduek 'oh noe saboh lapeh
Jinoe keudeh ulon kisah
Alah hai bak jeumpa mirah
Bak lipah di bineh pasi

AMMA BAKDU laen ulah
Lon kisah bangta juhari
Mara Karma nyang bahgia
Dalam rimba neupeureungi

Deungon adoe Kasom Nila
Ka geubungka tinggai umi
Tinggai ayah dalam kuta
Bentara meuntroe ngon wazir

Nila Kasom teungoh bungka
Teuingat ka akan umi
Sebab that grah hana susu
Bungong meulu moe meu'i-'i

Tilo alang tadeungo su
Abang teungku susu neubri
Nila Kasom jimoer rugha
mara Karma susah hate

Sira neumoe neukheun sigra
He adekda bintang pari
Bekle tamoe bintang kala
Geutanyoe ka khendak Rabbi

Geutanyoe ureueng cilaka
Pat tamita susu lagi
Geutanyoe urueng ka geuboh
Bek meuteuoh le keu umi

Lheueh geupeugah nasihat jroh
Pulot geuploh yoh nyan geubri
Bu payeh yoh nyan ka geuploh
Geujok saboh keupo cut ti

Cok bu payeh laju pajoh
Hanle riyoh bintang pari

Tujoh uroe tujoh malam
Nyan makanan sabé geubri

Siblah uroe siblah malam
Di abang ka lapar diri
Hingga habeh ban tujoh boh
Putroe jroh makeuen sendiri

'Oh habeh bu payeh bandum
Nila Kasom moe meu'i-i
Khendak makeuen tan makanan
Geupot yoh nyan on kayee gle

Boh kayee gle nyang jeued pajoh
Mita sunggoh yoh nyan sabé
Peue meuteumeung jok keu adoe
Di pruet droe hana peudoli

Geujak sabé dalam huteuen
Uroe malam tan beureunti
Pat-pat nyang na ie dalam krueng
Adoe buleuen geupeumandi

Padum lawet sabé safar
Dalam rimba huteuen 'a' i
Meurumpok padang luah that-that
Meusapat ngon gunong tinggi

Bangta neu-ek tron u pucak
Ka meurumpok mambang pari
Mambang pari Indah Dewa
Gunong Jindra duek beureunti

Sinan teumpat permainan
Uroe malam suka hate
'Oh troh keunan ureueng dua
Jidrob sigra le jen pari

Sebab jieu jroh that rupa
Ban dua miseue kasturi
Jiba laju ubak raja
Jieu rupa suka hate

Mangat hate jipeulara
Ban dua sang siat bek cre
Padum lawet teutap sinan
Rayek seudang bintang pari

Uroe malam jiwa jicom
Jimeupanton ngon sakti
Dum ileumee jipeurunoe
Keu sinyak nyoe nyang juhari

Dum hikeumah ngon veunuleh
Dum habeh ileumee sakti
Hafai sunggoh bangta muda
Dum peukara ka meujadi

'Oh habeh jeued dum peukara
Saboh tanda yoh nyan jibri
Jibri saboh nyan keumala
Keucut banta nyang juhari

Lom jiwasiet ubak bangta
Peue seungsara tahei kamoe
Kamoe tajoh cit troh teuka
Ieuhoi sigra bek na lanti

Habeh wasiet dum peukara
Cut bangta ingat lam hate
Yoh nyan bangta neulakee droe
Deungon adoe Nila Kasomi

'Oh lheueh izin dum sinaroe
Beudoh jinoe bangta ahli
Laju bungka bungong meurak
Deungon sinyak cut Kasomi

Rot lam hutéuen sabe neujak
Dum meureumpok binatang gle
Meurumpok ngon rimueng rimba
Berjumpa deungon gogasi

Ban jikalon hate suka
Manusia nyan reseuki

Jipuwoe le yoh nyan sigra
Hate suka hana sakri

'Oh sare troh u rumoh tangga
Peugah haba ngon isteri
Tunong baroh lon jak mita
Bee kah bangta lon dapati

peurab keunoe makeuen sigra
Payah raya lon jak cari
Di po agam keumeung pajoh
He teungku beh kheun isteri

Neupreh dilee lon meutanggoh
Bek neupajoh he suami
Toh digata toh dikamoe
Manusia nyoe cut han sakri

Bahle dilee tapeulara
'Oh jeued raya ta khanduri
Rupa pijroh hana bagoe
Dilon sidroe galak hate

Meunan jikheun uleh binœ
Ka geiem droe lem gogasi
Teutap sinan jipeulara
Mara Karma ngon Kasomi

Lakoe binœ galak suka
Sebab rupa that juhari
Hakeumah dum jipeurunœ
Keu sinyak nyoe la gogasi

Habeh dumpeue jipeurunœ
Hingga dudoe jih nyan mate
Khendak Tuhan poteu sidroe
Mare lakoe si gogasi

Ka tinggai gogasi inong
Ngon cut bungong sang-sang bek cre
Jigaseh that han peue tanyong
Rupa keunong galak hate

Teutap sinan ureueng dua
Hingga raya bacut meuri
Padum na treb sinan bangta
Ngon adekda cut Kasomi

Hingga teuma bak siuroe
Geumohon droe bak gogasi
Peurab laju ban dua droe
Geucom jinoe nibak gaki

Wahe poma izin kamoe
Bak uroe nyoe lon peureugi
Meujak meu-en meu lhee uroe
Rijang keunoe lom kembali

Lon jak meu-en kalon desa
Kamoe dua ngon adek droe
Lheueh lon kalon ban seulingka
Ulon gisa lom bak umi

Ban jideungo meunan haba
Rhot ie mata di gogasi
Teuma jikheun laju yoh nyan
Izin laman bintang pari

Adat tajak intan payong
Ingar keu lon he boh hate
Bek treb riwang bungong sukon
Sinoe ulon susah hate

Han peue salah he poma droe
Rijang keunoe lon keumbali
Bangta neujak ban dua droe
Gogasi moe that meu'i-i

Mara Karma ngon cut buleuen
Dalam huteuen neupeureugi
'Oh meurumpok deungon rimueng
Adek buleuen neusembunyi

Meunan keu hai neujak sabé
Didalam gle huteuen 'a' i

Padum lawet bungong pade
Neujak sabe tan beureunti

Hingga troh bak kayee sibak
Reului ramphak hana sakri
Bak beuringen cabeueng ramphak
Cut bangta jak keunan hampe

Bak that rayek jroh meuhalak
Di miyub bak reului han sakri
Rab beuringen saboh bangon
Ateueh gunong ie dum ile

Ie dum jitren ateueh gunong
Adek buleuen geupeumandi
'Oh lheueh manoe geubri salen
Yub beuringen duek beureunti

Bangta piyoh yub beuringen
Saboh cicem ka jipo le
Ateueh ulee jipo cicem
Pocut canden that beureuhi

Nila Kasom kheun bak cut lem
Neudrob cicem bang juhari
Mara Karma ka neulumpat
Bangta tangkap burong tadi

Ubak adoe geujok leugat
Hate mangat cut Kasomi
Nila Kasom mangat hate
Neuyue sie le cicem tadi

'Oh lheueh neusie uleh abang
Apui yoh nyan neuyue cari
Mita apui wahe abang
Nak tapanggang burong ini

Watee masak he cut abang
Dua sajan tameukeuen le
Mangat tapajoh lazat rasa
Dilon hawa hana sakri

Ban neudeungo uleh bangta
He adekda pat lon cari
Pat lon mita he sambinoe
Payah han soe lam rimba gle

Beukit meunan wahe adoe
Bah le jinoe lon jak cari
Taduek adek gata sinoe
Bahle kamoe mita api

Lheueh neupeugah ubak adoe
Neucom bak dhoe bintang pari
Lheueh nyan neujak mita apui
Neubloh laju huteuen duri

Manok ku'uek neudeungo su
Neujak laju bangta ahli
Neutakat bak manok meusu
Neujak laju tan beureunti

Sira neujak hate susah
Saleh peue bah bala ini
Manok ku'uek ka neutakat
Neujak leugat bangta saidi

Hingga troh bak saboh keubon
Bungong sukun dong beureunti
Teunaman le dalam keubon
Kacang jagong ngon keuladi

Mara Karma dong di lua
Preh teuka po keubon ini
Hajat khendak lakee apui
Adek tinggai di dalam gle

Neudong sinan na sijameung
Sidroe ureueng keunan troh le
Ban neukalon teuka ureueng
Bungong seumpueng mangat hate

Bak neupike troh ban hajat
Apui meuhat meuteumeung le

Jibri apui lon woe leugat
Meunan ingat dalam hate

Po keubon nyan nuehei rijang
Neukheun nyoe ban bintang pari
Wahe teungku beuna sayang
Keu lontuan di dalam gle

Ban jideungo su di luar
Keunan sigra jipeureugi
Ban meuhadap jikheun sigra
Nyoekeuh gata nyang pancuri

Geunap uroe u lampoh kee
Kacue teubee deungan ubi
Bitkeuh habeh dum boh kayee
'Oh kujak kee sapeue hanle

Boh jih le leunuet cabeueng
Aneuk bajeueng kah nyang curi
Padumna treb sabé kuluem
Ka meuteumeung nyang pancuri

Jimat jaroe meunoe jikheun
Aneuk bajeueng kah kutadi
Bak uroe nyoe holom kaplueng
Nyawong kutueng kah beumate

Meunan jikheun po keubon nyoe
Jawueeb meunoe bangta saidi
Hana lon plueng bak teumpat nyoe
Sebab kamoe kon pancuri

Ulon sidroe ureueng sisat
Trok bak teumpat gata ini
Mita apui meunan hajat
Mee tasasat lon pancuri

Dipo lampoh seuot sigra
Sulet raya hana sakri
Han kudeungo kameuhaba
Ka jitampa bintang pari

Jihue-hue jitulak-tulak
Jisipak u dalamduri
Leubam tuboh bangta muda
Keumala jatoh bak bumi
Ban jikalon rhet keumala
Jicok lanja lom jikheunkri
Nyoe keuho keumala bintang
Treb ka hilang dalam peuti

Dalam peutoe lon eu katan
Ban saboh nyan kujak cari
Kah nyang cok keumala bintang
Peue cit kakheun kon pancuri

Keumala jimat nibak jaroe
Po samlakoe lom jitadi
Jicok kayee lom jieungkhoe
Lam-lam duroe ka jigule

Luka tuboh bangta muda
Darah keulua di badan ile
Teuma nekheun haba meunoe
Sira neumoe bintang pari

Wahe teungku deungo kamoe
Ulon sidroe tapoh mate
Salah lon tan meung sigeute
Nibak teungku that neubeunci

Tapoh ulon tan keureuna
Taenaya ulon ini
Ban jideungo meunan haba
Ka jitampa lom meugule

Bangta reubah atueh bumoe
Ingar adoe di dalam gle
Nila Kasom dalam huteuen
Meunoe geukheun dalam hate

He adekda pakri untong
Di ulon ka khendak Rabbi

Tinggai gata dalam huteuen
Deungon aduen han sapat le

Mate ulon bak teumpat nyoe
Gata adoe soe peudoli
Rimueng pajoh dalam rimba
Soe peulara bintang pari

Makanan pat tajak lakee
Ulon teuntee jinoe mate
Ban teuingat meunan macam
Laju pingsan tujoh hari

Tatkala nyan laju pingsan
Haba pitan mumet hanle
Jieu bangta meurak pitan
Sangka waham jih k_a mate

Jicok taloe ka jiikat
Jipeusapat jaroe gaki
Ban dua blah lheueh jiikat
Jihue leugat miseue bangke

Laju jihue bak bineh krueng
Aneuk bajeueng bit that jahe
Teuma jitiek u dalam krueng
Ka teugageueng lam ie ile

'Oh lheueh jitiek dijih jiwoe
U rumoh droe jikeumbali
Troph u rumoh galak han soe
Buya tampoe meuraseuki

Keumala kana dalam reugam
Miseue bintang cahya meuble
Teutap dijih dalam seunang
Lon peuriwang laen rawi

Peulara ulat tacok sutra
Tapula ngon bak geurueto_e
AMMA BAKDU nyang that gura
Sidroe raja lon hareutoe

PUSPA INDAH nama raja
MANDA RATNA nama putroe
Kherajeuen luah hana tara
PEULINGGAM CAHYA nama nanggroe

Raja ade hana sakri
Hukom neubri jroh han bagoe
Hantom rakyat jimeupake
Sebab ade mat keumudeo

Aneuk sidroe po teuraja
Elok rupa ureueng lakoe
Rupa indah hana tara
Hana nyang sa dalam nanggroe

Raja boh nan MANGINDAN SARI
Baik budi ngon beurang soe
Hingga rayek aneuk doli
Neukeumeung bri sinyak putroe

Meung peukawen Maningdan Sari
Akan teutapi hana rela droe
Lethat putroe rupa canden
Meung peukawen ngon samlako

Ri nuetanyong hana neutem
Hana meusyen lom keu putroe
Meunan neukheun bangta muda
Bak ayahanda neuhareutoe

Wahe ayah bek that meusyen
Hanlom lontem neubri putroe
Hana nafsu lom meukawen
Meujak meu-en kalon nanggroe

Seuot ayah he aneukda
Bek meudakwa deungan kamoe
Lon peukawen jinoe gata
Bek rhet asa ulon dudoe

Meunuo ka lheueh kawen gata
Kadang teuma mate kamoe

Kana judo tajak dua
Meuseusuka deungon putreο

Adat teukeudi saket gata

Judo kana ceupet asoe

Kana pat tapeugah haba

Soe rhah ija 'oh tamanoe

Aneuk rakyat pithat suka

Gata raja ulon gantoe

Jampang-jampang jamee teuka

Soe leueng tika di seuramoe

Meunyo mate kamoe dua

Gata kana ureueng hiro

Meunyo mantong hudep bapa

Lon eu rupa sinyak putroe

Ulon teumeung kalon rupa

Capiek buta beuranggasoe

Meunan narit po teuraja

Aneukda jawueb lom meunoe

Menyo meunan he ayahanda

Ban nyang sabda rela kamoe

Ulon ikot ban nyang sabda

Pajan teuma neubri putroe

Ban raja deungo narit meunan

Neukrah yoh nyan ureueng nanggroe

Imum geusyhik huleebalang

Dum sibarang troh le sampoe

Tatkala nyan sabda raja

Bak sigala asoe nanggroe

Lon tueng pakat nibak gata

Peue keunira aneuk lon nyoe

Tapeukawen jinoe sigra

Lon ka tuha lon meung gantoe

Lon meung gantoe jih keu raja

Nibak gata pakri jinoe

Seuot wazir ngon panglima
That sireuta nibak kamoe
Tapeukawen bangta muda
Badai raja gob nyan jinoe

Lom raja kheun meunyo pakat
Lon harap gata sinaroe
Aneuk dara tajak lihat
Tapeusapat bandum keunoe

Asai keunong nibak gata
Tapeuhaba ubak kamoe
Teuma seuot ureueng tuha
He meukuta tanglong nanggroe

Han jeued meunan wahe raja
Bak lon kira han got bagoe
Bak kamoe bandum jroh rupa
Bak raja singoh meupaloe

Meunyo hana galak bangta
Keupeue guna taba keunoe
Adat nyang got han meusampe
Le nyang pake geunap uroe

Agam sapat inong sapat
Hana tom rab meung siuroe
Beurangpeue buet han meupakat
Singoh meuhat roh lam rugoe

Miseue lampoh hana pageue
Miseue keubeue hana taloe
Adat jiwoe u dalam weue
'Oh tamu'ue hana raghoe

Miseue ureueng hana alat
Miseue pukat tan keumudoe
Pajan meuhat laboh payang
Ulee jiplueng sigo saho

Miseue putoh taloe beuringen
Teuka angen ka jitampoe

Meunan miseue lon boh adat
Nyang na pakat nibak kamoe

Pat-pat nyang na aneuk dara
Tayue teuka bandum keunoe
Bah neukalon uleh bangta
Ri nyang suka neucok keudroe

Adat capiek deungon buta
Han peue kira dum geutanyoe
Meunan narit ureueng tuha
Seuot raja bit nyo meunoe

Meunyo meunan he panglima
Tajak gata dalam nanggroe
Tapeusapat aneuk dara
Tayue teuka bandum keunoe

Lheueh peurintah nibak raja
Bentara jijak lam nanggroe
Dalam gampong dum jiteuka
Suroh raja jihareutoe

Jeueb-jeueb duson deungon banda
Jipeuhaba jikheun meunoe
Rumoh nyoe na aneuk dara
Singoh taba u meuligoe

Suroh nibak po teuraja
Beutroh taba singoh uroe
Khendak kalon uleh bangta
Soe nyang suka tueng keu putroe

Ban jideungo meunan haba
Aneuk dara galak han soe
Ma deungon du jimupakat
Tajak intat singoh uroe

Teutapi pakri lakuan
Peukayan han nibak asoe
Di gob na gleueng deungon subang
Cit nyang tan aneuk geutanyoe

Meunyo hana gleueng bak gaki
Keupeu tari miseue uroe
Han meukeunong taeu rupa
Bangta muda han neupakoe

Han geungieng meung siblah mata
Malee raya di geutanyoe
Meunyo kana glueng ngon subang
'Oh geupandang galak laloe

Adat kureueng nibak rupa
Han geukira beuranggasoe
Meung ka keunong nibak mata
Cit sidara geucok sidroe

Teuma seuot ponek tuha
Hana guna beuranggapeu
Meung na tuah ngon bahgia
Beuthat cidra luka asoe

Beuthat capiek deungon buta
Nyan cit suka bangta sidroe
Meuhan keunong nibak mata
Peue meulaksa taboh pudoe

Ija meukleh rhet u likot
Han meusambot nibak asoe
Keupeue taboh brat anggota
Han jihawa intan pudoe

Meunyo nyang got nibak mata
Beuthat ija ruya rayoe
Asai keunong nibak rupa
Tuha muda mata laloe

Meunyo keunong jieu rupa
Sang-sang jiwa mat di jaroe
Meuman narit ureueng tuha
Seuot teuma ureueng bunoe

Peue geutupeue di nek tuha
Malee mata na geutanyoe

Bek tapateh du sidara
Bak cut jeumpa mita jinoe

Tajak lakee jinoe siat
Jeued lon intat singoh uroe
Du sidara geujak leugat
Hanjan siat katroh geuwoe

Ka geupuwoe dumna alat
Nyang indah that dum sinaroe
Geupeungui le aneuk dara
Nyang jroh rupa dumpeue bako

Peusok subang pinggang ija
Sawakteuma nyang meureumboe
Geusugot ok boh ceumara
Boh di lingka bungong soebroe

Peusok ngon gleueng jaroe gaki
That juhari taeu bagoe
Geuboh beudak muka Siti
Minyek wangi geuboh dudoe

Ka geureutek nibak ija
Bee meubara mangat han soe
'Oh ka cukop dumpeue langka
Teuma geuba u meuligoe

Sira.geujak ma deungon du
Ya Tuhan ku geuleueng jaroe
Aneuk ulon Siti meulu
Beujued keu judo bangta sidroe

Beuroh galak watee geu-eu
Ya Tuhan ku aneuk kamoe
Beu geutueng jih jeued keu judo
Soe hidang bu u meuligoe

Sira geujak meunan do'a
Hana reuda geuleueng jaroe
Geuba laju troh lam kuta
Aneuk dara dum ka sampie

Timu barat beuba keunan
Ngon peukayan hu bak asoe
Aneuk dara seudang-seudang
Dum peukayan peunoh asoe

Jisok bajee mirah hijo
Jisado sutra meureumboe
Jisugot ok boh ceumara
Bungong lingka miseue duroe

Kulet licen ban meutia
Bak dada pawon meutaloe
Jisok subang eumpieng ara
Euncien raya nibak jaroë

Jilabo beudak nibak muka
Jiboh baja nibak gigoe
Keuieng geunteng keumang dada
Cahya muka miseue uroe

Watee jikhem rumeh muka
Meucanya kilat ie gigoe
Watee jijak bacut-bacut
Meusaneut keuieng muetampoe

Jitiek aleh ban cempala
Agam dara mata laloe
Na miseue leukek dalam cintra
Jikua 'oh tajok jaroë

'Oh ka habeh dum meusapat
Timu barat keunan sampoe
Bak keurusи geubri teumpat
Duek le leugat dum meuranjo

Taeu rupa indah that-that
Meukilat ngon cahya pudoe
'Oh ka hase atueuh teumpat
Tamong leugat u meuligoe

Raja tamong bak aneukda
Neukheun sigra haba meunoe

Teubiet jinoe cahya mata
Ri nyang suka tacok keudroe

Takalon nyang elok rupa
Muda-muda dum ka sampoe
Meungka keunong nibak mata
Hana dakwa nibak kamoe

Bangta neduek bak usongan
Jiba keunan uleh meuntroe
Jipeutren di leuen istana
Jiba teuma ubak putroe

Dalam kawan aneuk dara
Keunan jiba bangta sidroe
Bangta neuduek dalam kaca
U lua cahya seureuloe

Jikalon le aneuk dara
Meunoe kira lam hate droe
Beugeutueng lon uleh bangta
Geumat sigra nibak jaroe

Geupeutamong dalam kaca
Keudeh geuba u meuligoe
Maseng-maseng meunan pike
Dalam hate dum situmpoe

'Oh troh bangta bak tunangan
Meukeunong han pi meusidroe
Aneuk dara gadoh ingat
Sang ka geumat nibak jaroe

Bangta kalon dumna dara
Hana suka pi meung sidroe
Hana sidroe galak bangta
Aneuk dara jipoh-poh droe

Susah hate aneuk dara
Sebab bangta han neupakoe
Meunoe ingat dalam dada
Pakon bangta meunan bagoe

Dum rupakee han peudoli
Pat na tari laen nanggroe
Pakri ngon gleueng jaroe gaki
Dan lagi pawon meataloe

Bangta neuwoe dalam kuta
Bak ayahanda neukheun meunoe
Habeh lon ngieng aneuk dara
Lon eu rupa miseue uroe

Teutapi han jitem kua
Leukek bangguna gohlom raghoe
Bak jimeulet gohlom utoh
Ngon musoh han jeued peuglah droe

Watee jipoh deungon paroh
Dijih gadoh jikeh-keh droe
Meunan miseue he ayahanda
Neuyue gisa ban sinaroe

Raja deungo meunan haba
Susah raya hana bagoe
Aneuk dara neuyue gisa
Hana suka bangta sidroe

Habeh jiwoe aneuk dara
Maseng gisa u rumoh droe
Nyang mangat bee bungong jeumpa
Minyeuk ata dalam peutoe

Teuduek 'ohnoe saboh jeumba
Bangta muda lon hareutoe
Bak siuroe bangta muda
Bak ayahanda neupeugah proe

Wahe ayah neubri izin
Lon jak meu-en meung lhee uroe
Paroh: rusa ulon ingin
Jak meuramien nafsu kamoe

Han peue salah bijeh mata
Preh aneukda siat jinoe

Lon krah rakyat balatandra
Keu ngon gata he samlakoe
Yoh nyan neukrah huleebalang
Bentara blang geusyhik sagoe
Yue me tumbak deungon leumbeng
Yue me areng deungon taloe

Aneuk ulon keumeung bungka

Jak meurusa singoh uroe

Ban jideungo sabda raja

Di jeumala jibet jaroe

Insya Allah po meukuta

Jeued ulon ba bandum keunoe

Lheueh nibak nyan laju gisa

Singoh teukadum sinaroe

Ngon peukayan bak anggota

Alat jiba leumbeng beusoe

Ka meusapat pawang dumna

Aneuk raja jimohon droe

'Oh lheueh izin laju bungka

Dalam rimba huteuen duroe

'Oh sare troh dalam huteuen

Areng geutheun ban peuet sagoe

Cok ngon asee paroh rusa

Riyoh subra surak tuloe

Ladom ureueng jakboh taren

Ladom kalon mata laloe

Surak riyoh dalam huteuen

Tan meubayeuen rusa pindoe

Jeueb-jeueb huteuen surak riyoh

Saboh lapoh pi hana toe

Koh ngon jareng jak ho laen

Nyan pi meunan lagee bunoe

Seupot uroe hana rusa

Aneuk raja hate seungkoe

Bandum ureueng lapar dahaga
Tan meusua ie mon paroe
Jak mita ie dumna ureueng
Jeueb linggong krueng ka jipeutoe

Jeueb-jeueb alue geujak kalon
Tan meuteumeung ie lam sungoe
Teuduek 'oh nan seumeuntara
Kasom Nila lon hareutoe

Nila kasom lon calitra
Dalam rimba teuduek sidroe
Teuduek sinan puteh licen
Saboh cicem nibak jaroe

Neupreh-preh troh geuwoe cutlem
Bunoe neutren mita apui
Troph cot uroe goh meugisa
Kasom Nila yoh nyan jimoe

Sira Jimoe hana reuda
He keukanda abang kamoe
Mangat hate lon neukeubah
Bang meutuah ka neuboh droe

Neutinggai lon lam rimba Allah
Meuhat punah rimueng seudoe
Bukon sayang lon eu sutang
Habeh leukang bak peunatroe

Hoka neujak di cut abang
Tinggai lon lam huteuen sidroe
Bukon sayang teungku abang
Han geusayang keulon sidroe

Neutinggai lon meungan pitan
Di cut abang ka neuboh droe
Neukeubah lon sidroe lam gle
Meuhat mate rimueng seudoe

Nila Kasom moe meu'i-'i
He ya Rabbi ho troh kamoe

Teungoh putroe jimoë ba-e
Ureueng nyang le keunan sampie
Rakan bangta keunan lalo
Bungong keundo jingieng sinoe
Sinan teuduek di yub beuringen
Bintang canden teungoh jimoë
Nibak jaroe saboh cicem
Putroe leunteng teuduek sidroe
Rupa elok han peue peugah
Sang-sang tiwah buleuen uroe
Ban jikalon putroe indah
Jiwoe pantah bak samlakoe
Puwoe ngon ie laju sigra
Troph bak bangta tanyong meunoe
Pat meuteumeung ie tamita
Jeued ka jula asa uroe
Jiseuot pantah sigra
Ampon hamba tuanku droe
Lon jak cok ie di yub beuringen
Lon that ingen mata laloe
Lon eu sidroe manusia
Elok rupa hana bagoe
Teungoh jimoë bintang canden
Saboh cicem nibak jaroe
Bangta deungo haba meunan
Beudoh yoh nyan neuyue ba droe
Ban sare troh u yub kayee
Sabet teuntee ban jikheun proë
Kon beurakah jipeuhaba
Meu-eu rupa that sambinoë
Mangindan Sari hate suka
Bak bentara neukheun meunoe
Bekle gadoh dum geutanyoe
Cok sinyak nyoe nak tapuwoe

Rusa pitan pi meung saboh
Peue lom tapreh jula uroe
Ban jideungo suroh bangta
Jicok sigra sinyak putroe

Jikheun meunoe he adekda
Bek le rugha ulon puwoe
Lon puwoe bak rumoh raja
Bintang kala bek le tamoe

Cok jigulam aneuk dara
Beudoh gisa dum sinaro
Jiarong gle jibloh rimba
Hingga teuma ka troh sampoe

Ban sare troh u istana
Tuha muda jak eu putroe
Jikheun bangta Mangindan Sari
Cut putroe ti ka neupuwoe

Aneuk manyak dalam rimba
Bangta muda puwoe keunoe
Elok paras hana tara
Sang meutia meunan keuroe

Ureueng peunoh di istana
Po teuraja di meuligoe
Neudeungo troh aneuk dara
Teubiet sigra deungon putroe

Raja kalon hate suka
Nyankeuh rusa sinyak puwoe
Geupeuduek le rab isteri
Raja sudi tanyong meunoe

Soe po aneuk rupa that jroh
Pakon jiboh bungong uroe
Mangindan Sari that meuuntong
Ka meuteumeung nyang judo droe

Marit putroe Manda Ratna
Neuyue jak ba sinyak putroe

Jak seumanoe he dendayang
Kame sabon reumpah-rampoe
'Oh lheueh suroh jijak rijang
Jime yoh nyan dumpeue bagoe
Jiba boh kruet jipeuupa
Jime ija nyang meusujoe
Jipeusabon jiboh beudak
Hate galak hana bagoe
Lheueh seumanoe jiboh beudak
Jisampoh bak muka putroe
Peusok bajee ija sawak
Boh kheulumbak teuma dudoe
Meuhambo bee that meuhayak
Hate galak beuranggasoe
Ka jisalen dum peukayan
Gleueng ngon subang intan pudoe
U meuligoe puwoe rijang
That sukaan dum sinaroe
Peusok euncien taloe gule
Meuble-ble bak takue putroe
'Oh ban keunong gleueng bak gaki
Budiadari sang-sang bagoe
Sang-sang meuh ban lheueh geuseupoh
Sang kawoh ban lheueh teujak bloe
Soe nyang kalon bungong ipoh
Sihan gadoh mata laloe
Elok parah hana tara
Po teuraja galak han soe
MAYANG MEUHURAI neuboh nama
Uleh raja tanglong nanggroe
Po teuraja that sukaan
Putroe Mayang jroh sambinoe
Neu-eu rupa that analan
Tan na lawan dalam nanggroe

Teuma neukheun bak dendayang
Tapeusayang aneuk lon nyoe
Beujroh sangat tapeulara
Sayang raya aneuk ranto

Peue nyang jikheun bek tadakwa
Peue nyang suka tapeusampoe
Dendayang dum laju seuot
Leubeh that got gaseh kamoe

Jiboh minyeuk jisugot ok
Beungoh seupot jiseumanoe
Jikoh andam jiboh beudak
Bandum galak sinyak putroe

Jigaseh that bungong meurak
Hantom jarak meuing siuroe
Padumna treb sinan teutap
Bungong riwat mangat asoe

Ho siuroe rayek leugat
Tamse kulat hujeuen baroe
Maken rayek putroe muda
Maken rupa indah han soe

Maken leubeh indah rupa
Galak raya raja nanggroe
Bak siuroe Manda Ratna
Sapat dua ngon judo droe

Teungoh-teungoh peugah haba
Putroe muda keunan sampie
Putroe Mayang keunan teuka
Sireuta deungon dendayang droe

Ban neukalon uleh raja
Meuheu sigra sinyak putroe
Ban neukalon uleh bunda
Neuheu sigra sinyak putroe

Putroe neujak laju keunan
Neuduek sinan laju rab toe

Putroe duek rab deungon bunda
Yoh nyan raja neukheun meunoe
Ngon isteri neumeututo
Dara baro ka troh keunoe
Geutanyoe rab na meulintee
Bungong keumee karab raghoe

Na sikeujab duek beureunti
Mangindan Sari pika sampoe
Neujak kunjong ayah bunda
Neuduek sigra sinan rab toe

Mangindan Sari rab ngon bapa
Putroe muda rab ngon ma droe
Bangta kalon putroe muda
Meunyum suka tueng keu putroe

Bangta kalon laloe mata
Aneuk dara jipadok droe
Jipadok droe likot bunda
Bangta muda keunan laloe

Dalam hate sangat suka
Nyum sang geuwa sinyak putroe
Raja kalon hai aneuda
Khem teutawa leumah gigoe

Khem teusinyom ieumah hana
Neutupeue' ka lam hate droe
Puspa Indra mangat hate
Neu-eu dali bak anuek droe

Raja tanyong bak aneukda
Na suka gata cicem nyoe
Ban neutanyong le ayahanda
Bangta muda neupadok droe

Hana jawueub sikrak haba
Malee mata po samlakoe
Manda Ratna judo raja
Tanyong sigra bak cut putroe

He aneuk peue na meukeusud
Peugah ban buet ubak kamoe
Putroe sueot leumah leumbot
He ma pecut izin jinoe

Taman "Meunidam" lon jak siat
Keunan hajat meu-en kamoe
Bunda tanyong pajan tajak
Bungong meurak peugah jinoe
Seuot putroe nyang jroh rupa
Jan nyang rela bunda sidroe
Jan nyang suroh nibak bunda
Hana dakwa nibak kamoe

Mangindan Sari deungo meunan
Neukheun yoh nyan haba meunoe
Kon bunda po taman Meunidam
Ingar keuntuah soe nyang peutoe

Meunyo hana lakee izin
Han jeued rakan keunan sampie
Lakee izin bak po taman
Baro keunan jeued jipeutoe

Ban raja deungo meunan haba
Khem teutawa ban dua droe
Seuot putroe Manda Ratna
Bak keukanda lakee keudroe

Lakee izin ubak bangta
Jih po jeumba taman bunoe
Sinyak putroe tundok muka
Deungan haba hana sapeue
Lakee izin ubak bunda
Beudoh gisa u meuligoe
Jiireng ulah dendayang
Seudang-seudang aneuk meuntroe
Bangta kalon putroe gisa
Dalam dada pike meunoe

Pakon jiwoe putroe buleuen
Sebab kukheun narit bunoe

Hana sapeue na jipeugah
Bangta susah hana bagoe
Sang-sang malee putroe indah
Nyang jeued bagah laju jiwoe

Adat mengkon kukheun meunan
Trok lam taman tamat jaroe
Susah hate bangta muda
Meulah raya jiwoe putroe

Duek teuseupok pocut bangta
Ayah bunda ka neutupeue
Beudoh yoh nyan bangta muda
Laju gisa bak teu droe

'Oh ban leupah bangta gisa
Ureueng dua khem han bagoe
Raja peugah hai aneukda
Susah raya jiwoe putroe

Seupot uroe bak meuhaba
Dalam kuta ban dua droe
Gadob peungeuh teuka seupot
Laju jilob matauroe

Maseng-maseng woe u teumpat
Istirahat bak teumpat droe
Habeh malam uroe faja
Meucuaca peungeueh nanggroe

Ka trang beundrang dalam donya
Manda Ratna meuhei putroe
Keunoe siat hai meutia
Rab ngon bunda taduek beutoe

'Oh troh keunan putroe teuka
Ayah bunda geuncom jaroe
Yoh nyan bunda ka neutanyong
Bak cut bungong nyang sambinoe

Na ka tajak taman Meunidam
Tajak meu-en takheun baroe
Putroe seuot suara mameh
Hana jadéh tuanku droe

Manda Ratna khem teuseuheh
Muka rumeh neukheun meunoe
Na weueh hate he aneukda
Narit bangta jikehun baroe

Bek weueh hate he meutia
Jimeuseunda deungon adoe
Putroe seuot leumah leumbot
He ma pocut hana sapeue

Bek antara na weueh bacut
Adat nyang brat hanweueh kamoe
Bek meureuka bunda keulon
Neupeuampon beuranggapeue

Beukit salah neupeuampon
Sira geukheun sira geumoe
Manda Ratna seuot sigra
Tan meureuka nibak kamoe

Lon tanyong keu gura-gura
Kon meureuka he sambinoe
Di putroe pi neumeucakra
Di raja pi saboh bagoe

Hingga teutap 'oh nan haba
Kamoe muda lon peugah proe
Bungong meulu mirah rata
Bungong jeumpa puteh soebroe

Ulon peugah po teuraja
Neuhei sigra wazir meuntroe
Hadap raja dum sibarang
Bentara blang geusyhik sagoe

U bale rom dum meusapat
Musyawarat raja nanggroe

Raja suroh peugot teumpat
Nyang indah that dum sinaroe

Hajat peugot perjamuan
Bangta sedang neubri putroe
Neupeukawen aneuk agam
Deungon Mayang nyang sambinoe

Lheueh mufakat dum sigala
Raja gisa u meuligoe
Putroe Mayang kalon raja
Beudoh sigra com bak jaroe

Raja tanyong peue na haba
Ubak bunda na ka tawoe
Putroe seuot rumehmuka
Treb ka lama suboh bunoe

Mangat hate po teuraja
putroe muda bijak han soe
Jitu'oh that dum peukara
Jroh mulia-beuranggasoe

'Oh lheuh seumbah ayah bunda
Putroe gisa u meulinggoe
Hulee balang ngon bentara
Kira-kira bileueng uroe

Suroh raja nyang baroesa
Hase nyang ka dum sinaro
Cukop hase jroh meubanja
Deungon kuta ban peuet sagoe

Hingga hase dumpeue leungkap
Teumpat rakyat teumpat meuntroe
Teumpat raja huleebalang
Jambo geundrang ngon meunyanyoe

'Oh ka hase dumpeue leungkap
Hadap daulat wazir meuntroe
Angkat jaroe dijeumala
Ampon raja ka seuleusoe

Raja yue krah dumna rakyat
Jeueb-jeueb teumpat jioh ngon toe
Hingga troh le rame sangat
Tamong leugat u meuligoe
Jitamong le bak sultan
Keupeue laman neuhei keunoe
Patna nanggroe nyang meusugang
Neuyue jak prang ubak kamoe
Seuot raja hana sapat
Jeueb-jeueb teumpat seunang han soe
Nyang lon pangge dum meusapat
Bangta daulat lon bri putroe
Lon peukawen aneuk agam
Deungon Mayang cut sambinoe
Tapalee gong deungon geundrang
Meupehasan peuet ploh uroe
Sinyak putroe lon boh gaca
Nyankeuh haba nibak kamoe
'Oh lheueh sabda nibak daulat
Bandum rakyat suon jaroe
Jipubuet le teuma leugat
Ban nyang daulat suroh bunoe
Bandum rakyat agam dara
Galak suka hana bagoe
Jipasang lampu listrek
Jitarek alam nyang soebroe
Meusuara le ngon musek
That meunarek tedeungo bunyoe
Deungon panyot hu mujeureulah
Hijo mirah bungong uroe
Ureueng nanggroe rame leupah
Hate dasyah hana bagoe
Meupeuhasan macam-macam
Nyang peh geundrang ngon meunyanyoe

Nyang ladom jimeu-en wayang
Le that macam pehasan nyoe

Yub seurumpet meu-en silat
Nyang gura that jitet beusoe
That geumbira bandum rakyat
Mata lazat hireuen laloe

Peh rapa-i nyang that riyoh
Jitob daboh gura han soe
Uroe malam subra riyoh
Hana teudoh jeueb-jeueb sagoe

Nyang galak that aneuk dara
Na ureueng wa mat di jaroe
Ladom taeu jiyub suleng
Jigandeng ngon panton nyanyoe

Nyang meunari dum aneuk Kleng
Meu-en runggeng ureueng binoe
Aneuk dara nyang meupanton
Jiayon keuieng meutampoe

Ureueng deungo hate rihon
Meualon sang riyeukek baroe
Han ek peugah dum pehasan
Han sapeue tan taeu bagoe

Peuet ploh uroe peuet plo malam
Geukoh andam sinyak puroe
Geupeungui le ngon peukayan
Gleueng ngon subang intan pudoe

Jisugot ok jiboh bungong
Ureueng inong seunang laloe
Peusok bajee simplah dada
Haloh gasa cahya soebroe

Euncien meuh subang permata
Hu meucahya miseue uroe
Boh bak takue manek gule
Cahya meuble-ble indah han soe

Soe nyang kalon galak hate
Bungong pade that sambinoe
Bee meuharu minyeuk ata
Nibak dada pawon meutaloe

'Oh neupaleng putroe muda
Meulet-blet cahya miseue uroe
Ayeuem sanggoi geuboh patham
Meureuntang intan di jaroe

Gleueng meugeunta nibak gaki
Baidiri ngon intan pudoe
'Oh neulangkah putroe Siti
Bak gaki meublet-blet keudroe

Jroh meucayha nibak gaki
Cut putroe ti that sambinoe
Cukop hase dum peukayan
Ban buleuen trang peuet blah uroe

Sang buleuen di lingka bintang
Meunankeuh sang umpama proe
Cukop hase dara baro
Teungku linto lon hareutoe

Hana peue le ulon ato
Teungku linto di seuramoe
Ka meusapat deungon šyiah
Neupeuenikah sigra jinoe

'Oh lheueh ijab kabui nikah
Hukom Allah ka seuleusoe
Hana peue le ulon peugah
Maklum sudah dum sinaroe

Buet khanduri tan lon peugah
Panyang kisah le that rampoe
Hingga teuma linto geuba
Peu-ek lanja u meuligoe

Geupeudeuk le bangta muda
Ateueh tika nyang meusujoe

Deungon putroe meusampeng-sampeng
Meujandreng lakoe binoe
Meungna taeu han tapaleng
That sibandeng rotdeh rotnoe
Hingga teuma jula malam
Eh bak tilam po samlakoe
Deungon putroe nyang rupawan
Sebkeuh 'ohnan lon hareutoe
Hana peue le lon colitra
Keuhai bangta deungon putroe
Hingga beungoh uroe faja
Po teuraja beudoh jinoe
Raja salen rakyat dumna
Ban nyang kada reusam nanggroe
Aneuk rakyat hate suka
Geubri ija dum sinaroe
Lakee izin nibak raja
Maseng gisa u rumoh droe
Habeh rakyat woe u gampong
Tinggai tanglong di meuligoe
Tinggai putroe di istana
Sinan dua ngon judo droe
Lam meuligoe meuseusuka
Masam muka tan siuroe
Meugaseh that hana tara
Bandua bangta ngon putroe
Ngon suara leumah leumbot
Hantom meudhot bungong geutoe
'Oh malam neuceupet urot
Nibak teuot troh u jaroe
'Oh pajoh bu sapat dua
Rumeh muka peukhem lakoe
Jitamah bu jiboh kuah
'Ohka sudah jirah jaroe

'Ohka lheueh bu hidang pinah
Putroe indah cok rampagoe
'Oh sare lheueh puliek pineung
Jisuleueng ranub keu lakoe

Meunan sabe sinyak meugleueng
Hanpeue takheun cit that raghoe
Putroe Mayang nyang peureuseh
Utoh habeh khadam lakoe

Hantom beungeh bungong puteh
That jigaseh keu judo droe
Hantom meudhot muka beungeh
Cit lam rumeh geunap uroe

'Oh jikhem teuseuheh-seuheh
Reunem mameh deuh eu gigoe
Bak siuroe bangta muda
U istana neujak sidroe

Neujak kunjong ayah bunda
Katreb lama hana neuwoe
Patoe Mayang hana neuba
Di istana tinggai sidroe

Bak masa nyan putroe muda
Teuingat ka keuaduen droe
Putroe ingat bak masa nyan
Cut abang masa saboh roe

Saleh hoka teungku abang
Tan meuriwang 'ohnoe uroe
Saleh hudep saleh mate
Saleh hanle dalam nanggroe

Diulon ka seunang siat
Ka meutumpat di meulinggoe
Abang dilon hana mupat
Saleh sisat han meuho woe
Kadang jikab uleh rimueng
Ka jibaplueng abang kamoe

Pakon abang mantong jituen
Nibak ulon han jipeutoe

Dalam hate meunan leumah
Putroe indah jipo-poh droe
Putroe Jimoe hate gundah
Aloh-alah hana bagoe

Bak masa nyan reubah pingsan
Han meukri ban neueu nanggroe
Meuntroe kalon meunan macam
Jiplueng yoh nyan u meuligoe

'Oh sare troh u istana
Ubak raja jihareutoe
Ampon tuanku po meukuta
Putroe muda laen bagoe

Hana meukon putroe rugha
Ka teuhanta teungoh neumoe
Putroe pingsan hana haba
Ulon tēuka laju keunoe

Ban neudeungo putroe pingsan
Neutren yoh nyan bandua droe
Neucok bajee tinggai ija
Neuplueng sigra u meuligoe

Bangta pitroh woe u juree
Neumueng ulee tuan putroe
Neungieng judo bungong keumee
Moe meuree-ree po samlakoe

Puleh pingsan putroe muda
Rhet ie mata dum meutaloe
Bangta tenyong teuma sigra
Pakon rugha he sambinoe

Cok ie mawo aleh bunda
Boh bak muka sinyak putroe
Sira neumoe ka neurahob
Pakon pocut gata meunoe

Na weueh hate bintang pari
Sebab umi hana sinoe
Soe na carot bijeh mata
Soe seurapa bungong uroe

Tuan putoe yoh nyan ingat
Beudoh leugat duek teupipoe
Bunda laju tanyong pantah
Pakon susah bungong geutoe

Putroe seuot laju sigra
Wahe bunda nyang jeued meunoe
Kon susah lon keusoe laen
Ingar cutlem yoh saboh roe

Sebab ulon deungon cutbang
Jibuang di dalam nanggroe
Tan makanan tiep-tiep hari
Boh kayee gle abang puwoe.

Peue-peue nyang na boh kayee gle
Nyan rezeuki dua kamoe
Bak siuroe jipo cicem
Rupa canden lon eu bagoe

Ulon yue drob ubak cutlem
Sie cicem sang hawa kamoe
Teuma neudrob yoh nyan leugat
Hingga dapat cicem bunoe

Lon keumeung tet teuma leugat
Sebab duek that hawa kamoe
Apui pitan kamoe lam gle
Jak mita le abang sidroe

Leupah abang neuberjalan
Tinggal ulon sinan sidroe
Ulen preh-preh woe keukanda
Teuma geuba ulon keunoe
Saleh hudep abang hamba
Saleh citka ajai sampie

Saleh mantong dalam rimba
Saleh citka laen nanggroe
'Ohnoe uroe goh meugisa
Nyankeuh punca nyang jeued meunoe
Ban geudeungo meunan haba
Ureueng lingka dum habeh moe

Sebab weueh that dalam hate
Treb that ka cre ngon aduen droe
Manda ratna pi weueh hate
Ka geumoe le geukheun meunoe

Padumna treb keunoe gata
Lam bercinta geunap uroe
Hingga gata pika raya
Tan peuhaba nibak kamoe

Han tapeugah na syedara
Ulon sangka gata sidroe
Mangindan Sari rhet ie mata
Neukheun sigra haba meunoe

Wahe judo tinggai gata
Deungon bunda bandua droe
Lon jak seutot jinoe abang
Bekle kiam bungong uroe

Dalam huteuen ulon harong
Cut abang lon mita jinoe
Teuma seuot po teuraja
Bek hai bangta tajak sidroe

Lon krah rakyat jinoe sigra
Tayue mita jeueb-jeueb nanggroe
Meunyo tajak sidroe gata
Maken rugha sinyak putroe

Raja kheun bak putroe muda
Bek le rugha nyak sambinoe
Ulon suroh rakyat bandum
Dalam huteuen yue jak jinoe

Yoh nyan teuma sabda raja
Bak peudana neukheun meunoe
Himpon rakyat dum sineuna
Beutroh teuka bandum keumoe

Lheueh peurintah nibak raja
Jeueb-jeueb banda jijak meuntroe
Jeueb-jeueb geusyhik ngon peutua
Jeueb panglima dalam nanggroe

Jikheun suroh nibak raja
Beutroh teuka singoh uroe
Habeh bandum jipeuhaba
Lheueh nyan teuma laju juwoe

Singoh beungoh ka troh teuka
Peunoh kuta rakyat nanggroe
Habeh keunan dum meuhimpon
Raja neukheun haba meunoe

Uon meuhei gata bandum
Sebab ulon ka meupaloe
Putroe Mayang hate luka
Keukanda gadoh saboh roe

Masa tacok putroe muda
Dalam rimba taba keunoe
Tinggai sidroe nyan keukanda
Mara Karma nyang samlakoe

Beudoh jinoe bandum gata
Tajak mita jeueb-keueb nanggroe
Tajak mita dalam rimba
Jeueb beuluka beutroh sampoe

Habeh jeueb-jeueb lam lungkiek gle
Jeueb-jeueb pante beuta peutoe
Jeueb-jeueb a lue jeueb-jeueb guha
Dalam rimba huteuen duroe

Soe nyang teumeung bintang kala
Lon bri jeumba watee jiwoe

Saboh nanggroe jeujih lon bri
Bintang pari soe nyang puwoe
Ban jideungo sabda doli
Suka hate ureueng nanggroe
Lakee izin laju bungka
Dalam rimba jijak sampoe
Jeueb-jeueb buket jijak mita
Hana reuda geunap uroe
Geunap uroe mita sabe
'Oh habeh gle jak lam nanggroe
Tan meuteumeung bungong pade
Got keubahle teuduek 'oh noe
Bahle teuduek dilee siat
Kadang meupat teuma dudoe
Cuba jinoe tari sasat
Bintang takat hoka sampoe
Nyang cidah bungong seulanga
Nyang gura bungong seurune
Bah lon balek ujung banja
Hanle gura le lagee nyoe
Gura lampoh oh na pageue
Gura seuluveue ija sutra
Teuduek dilee nyang ka tabeue
Jinoe ukeue leubeh gura
AMMA BAKDU masen keueueng
Kisah lon kheun Mara Karma
'Oh lheueh jitiek u dalam krueng
Ka jebaplung le ie raya
Troph u laot ka jirayueng
Meusareueng bak pante ara
Dalam laot troh meubuleuen
Bungong sumpueng ingat hanle
Troph bak pante saboh teumpat
U darat ie raya tampa

Ateuh anoe teutiek meuhat
Deungon ikat dum meusingkla
Bak teumpat nyan na gogasi
Cut putroe ti sidroe jiba

Jiba keunan le gogasi
Tiep-tiep hari jipeulara
Jimeung pajoh hate putroe
Teutapi nyoe gohlom raya

Bak teumpat nyan jiba putroe
Hana sidroe manusia
Nan putroe CAHYA KHAIRANI
Hana sakri indah rupa

Muka puteh that juhari
Cut Khirani aneuk raja
Kulet puteh sang ceureumen
Hate ingen soe ngieng rupa

Baho keumang keuieng leunteng
Bungong husen jroh han tara
Cut Khairani aneuk raja jen
Jibaplueng uleh raksasa

Dijih jijak geunap uroe
Lakoe binoe dalam rimba
Di rumoh teutap subuleuen
Dalam huteuen kayem lama

Mita makanan geunap uroe
Troh bak hat droe baro gisa
Sibuleuen duek di rumoh droe
Tinggai putroe jih jibungka

'Oh leupah gegasi pindoe
Sinyak putroe jimoe rugha
Ulon jiba le gogasi
Han meujan le jipeugisa

Meunan ingat cut putroe ti
Tiep-tiep hari ro ie mata

Ayah bunda jinoe ka cre
Han dapat le seulamanya

Ulon meunoe bak teumpat nyoe
Hana lakoe troh ngon tuha
'Oh teuingat meunan bagoe
Sinyak putroe ro ie mata

Susah hate cut putroe ti
Jak u pasi jeueb kutika
Jak u pasi geunap uroe
Kadang na toe kapai teuka

Meungna kapai dalam laot
Ulon kawot laju sigra
Kuikot kapai han kudong le
Takot mate buet raksasa

Meunan pike cut putroe jroh
Kapai saboh hana teuka
Kapai keunan hana tom toe
Jitupeue teumpat raksasa

Ureueng keunan han jijeued jak
Takot jicok le reksasa
Hantom leumah ureueng sidroe
Sinyak putroe ro ie mata

Sira Jimoe meunoe pike
Ulon mate troh bak masa
Bak teumpat nyoe ulon mate
Sidroe hanle ureueng teuka

Taloe pasi jijak sabe
Bineh pante laot raya
Teukeudi Allah bak siuroe
Sinyak putroe keunan teuka

Bineh pante jijak sidroe
Meurumpok nyoe bangta muda
Ka meusareueng atueuh anoe
Ureueng lakoe indah rupa

Meukat ban saboh badan
Putroe waham peue keureuna
Di teungku nyoe peue salahan
Nyang jeued meunan juenaya

Rupa elok miseue bintang
Bukon sayang han le nyawa
Ka troh sithon ulon keunoe
Bak teumpat nyoe gogasi ba

Manusia tan meungsidroe
Bak uroe nyoe lon eu rupa
Meunan pike sinyak putroe
Jipeurab toe jipareksa

Ban sare troh putroe keunan
Jimat badan ureueng muda
Jimat tuboh balek batang
Jieu mantong nafah keulua

Treb-treb siseun teubiet nafah
Putroe indah kalon rupa
Jiploh taloe laju pantah
Putroe peugah meunoe haba

Insya Allah teungku ini
Tuhan neubri mantong nyawa
Mantong hayat lam donya nyoe
Keungon kamoe kana dua

'Oh ka habeh buka taloe
Cut putroe rahob bak muka
Cok ie lam krueng teuma laju
Muka teungku sampoh sigra

Putro sampoh muka teungku
Ingar ibu ngon ayahanda
Bandua tinggai di nanggroe
Ulon sidroe gogasi ba

Hana sidroe ureueng seutot
Cut putroe got hate luka

Ban teuingat nyan u gampong
Panyot tanglong ro ie mata

Rhet ie mata dum meukarang
Bangta seudang keunong muka
Ban keunong ie mata putroe
Po samlakoe teubleut mata

Ngon tuboh na meunyum mangat
Sebab ikat ka teubuka
Ban jikalon uleh putroe
Ureueng lakoe teubleut mata

Suka hate hana bagoe
Jiplueng jiwoe laju sigra
Jijak cok ie boh dalam glah
Jiba bagah jijok bangta

'Oh troh keunan putroe indah
Ie dalam glah peujeb sigra
Jiple ie nyan cut indah
Dalam babah bangta muda

Lheueh peujeb ie le putroe jroh
Jipubeudoh ulee bangta
Bacut-bacut jipubeudoh
Hana teudoh jiusaha

Mara Karma meugrak ulee
Ie neulakee sebab dahaga
Ngon isyarat ie neulakee
Bungong keumee tupeue bahasa

He adek tabri ie keulon
Sangat tutong dalam dada
Bit neulakee ie neuminom
Hana trang lom neu-eu rupa

Putroe peujeb ie nyan laju
Na sigeutu mangat rasa
Ka jisuleueng lom deungon bu
Le cut meulu nyang seutia

Lheuh pajoh bu na saboh 'ab
Rasa mangat jeueb anggota
Seun sigeutu meuwoe mangat
Meuwoe kuat neupeurasa

Han padum treb teuma dudoe
Po samlakoe meusuara
Yoh nyan marit tuan putroe
Jitanyong proe ubak bangta

Wahe teungku meutuah that
Peukeuh sebab jienaya
Peue na salah nyang raya that
Jeued jiikat jeueb anggota

Pakon meunan jiboh taloe
Peue teungku droe salah gata
Bangta deungo narit putroe
Sang kon adoe putroe Nila

Bak neusangka masa bunoe
Nyankeuh adoe Kasom Nila
Habeh bandum bangta tilek
Bukon adek Kasom Nila

Lantaran ureueng ceureudek
Lagi lisek le bicara
Kon adoe droe bungong keumee
Meunyum malee bangta muda

Narit leupah jeued neuseubee
Han jithee le putroe muda
Han jituri bangta malee
Laen lagee peugah haba

He putroe cut bungong keumee
Deungo dilee asai mula
Ulon ureueng that hinaan
Nibak rakan tan mulia

Ulon jiboh dalam nanggroe
Deungon adoe dalam rimba

Jifitnah bak ayah droe
Jikheun kamoe that cilaka
Meunyo hudep lon dua droe
Ayah dudoe lam seungsara
Meunan peugah uleh nujum
Teuma neukheun le ayahanda

Kah uroe nyoe nyawong kutueng
Aneuk bajeueng that cilaka
Meunan neukheun uleh ayah
Teuma neupeugah uleh bunda

Meunyo neupoh aneuk lidah
Sajanlon bah neutueng nyawa
Han jeued lon eu darah ile
Got dalam gle neuyue bungka

Bangta peugah awai akhe
Khendak Rabbi troh bak gata
Ban jideungo le cut buleuen
Na ri ujeuen ro ie mata

Jilungkop droe dalam leumueng
Teuma jikheun meunoe haba
Habeh neujak jeueb-jeueb huteuen
Suntok zameun keunong bala

Pakri ban hai dalam gunong
Teungku ampon neupareksa
Sangat susah wahe putroe
Tuhan sidroe that sibeuna

Leupah that weueh tuan putroe
Maken jimoe lom meuganda
Putroe jimoe dalam leumueng
Bangta neukheun meunoe haba

Bekle tamoe pocut buleuen
Ulon bukon aneuk raja
Ulon pocut bangsa kureueng
Cut buleuen bek sayang gata

Beudoh adek bekle tamoe
Taba lon nyoe u rumoh gata
Sebab sangat leumoh tuboh
Lon meupiyoh bumeurasa

Putroe han jeued jiseuot le
Mahen ile lom ie mata
Bangta tanyong leumah leumbot
Wahe pocut soe nan gata

Pat gampong bungong rambot
Soe teuseubot ayah bunda
Lon eu gata that sambinoe
Tajak keunoe ngon han taba

Peue jak mita bak teumpat nyoe
Kheun bak kamoe po jroh rupa
Peue nan raja lam nanggroe nyoe
Pakri bagoe jikeuraja

Got ngon jeuheuet ta hareutoe
Cut sambinoe ubak hamba
Nak lon tuban reusam nanggroe
Bek meupaloe singoh lusa

Teuma seuot cut putroe ti
Cit gogasi sinan raja
Lon tuanku aneuk raja jen
Di gampong MEUREUCU INDRA

Cahya Khairani nama kanoe
Sithon sinoe ka treb lama
Gogasi ba bak teumpat nyoe
Jicok kamoe teungoh sinja

Jikeubah lon bak teumpat nyoe
Geunap uroe ro ie mata
'Oh leupah gogasi pindoe
Ulon sidroe keunoe teuka

Kadang pina kapai sisat
Meunan hajat ulon bungka

Dalam hate meunan hajat
Hantom siat kapai teuka

Lon peujok droe ubak Allah
Hingga sudah troh keukanda
Awai akhe putroe peugah
Neukisah bak bangta muda

Mara Karma lom neutanyong
Bak cut bungong putroe cahya
He adekda peugah rijang
Gogasi nyan jinoe hoka

Teuma seuot cut putroe ti
Gogasi leupah lam rimba
Troph lhee buleuen di dalam gle
Jikembali u rumoh tangga

'Oh troh jiwoe jitanyong le
Pakri hate putroe muda
Na ka rayek hate pocut
Ulon seuot gohlom raya

Jinoe pika teungku datang
Neupeusayang patek hamba
Meucok ulon wahe cutbang
Lon jak sajan ho nyang neuba

Neutueng ulon wahe teungku
Soe taguen bu ngon rah ija
Cit meujawong di potallah
Darah gapah keu meukuta

Meuhan neutueng ulon sidroe
Neukoh takue meuhat fana
Nibak mate buet gogasi
Bah buet doli ban nyang suka

'Oh lheueh neukoh takue kamoe
Ho galak droe tangku bungka
Seuot bangta teuma pantas
Peue tapeugah he adekda

Di ulon pi ureueng susah
Pakri ilah lon cok gata
Di gata na cit gogasi
Di lon pakri 'oh jigisa

Putroe deungo haba meunan
Reubah pingsan hanle haba
Bangta sambot nibak ulee
Meunoe lagee neukheun sigra

Wahe adek bungong keumee
Tadeungo kee sikrak haba
Pakri rela tameukawen
Deungon ulon ureueng cilaka

Ureueng gob boh dalam huteuen
Cut buleuen han sabe bangsa
Ulonteu nyoe bangsa kureueng
Gata buleuen aneuk raja

Hana malee singoh gob kheun
Pat meuteumeung biek cilaka
Seuot putroe laju rijang
Beurangkaban ulon rela

Bek antara neumeukawen
Ulon tem bah neupeuhamba
Adat neutueng siplah kayee
Ulon angkee ban nyang suka

Meunyo han jeued neutueng keudroe
Neupubloe neutueng hareuga
Ban nyang suka tuanku droe
Nibak lon nyoe hana dakwa

Bek neukeubah ulon sinoe
Mate kamoe buet reksasa
Seuot bangta bek tagundah
Lon ilah ube kuasa

Gogasi nyan sangat meugah
Ulon ilah jih beufana

Deungon tulong nibak Allah
Ngon afuwah dum aulia

Gata sinoe han lon keubah
Insya Allah ulon bawa
Meunan narit po samlakoe
Sinyak putroe hate suka

Teuma narit tuan putroe
Jak udeh woe teungku raja
Beudoh teungku jinoe tawoe
Bek le sinoe uroe ka jula

Yoh nyan beudoh bandua droe
Laju geuwoe u rumoh tangga
'Oh troh keunan bangta ahli
Hireuen hate hana tara

Neukalon rumoh gagasi
Buet that ganje jikeurija
Bubong rumoh jroh meupakhok
Sigala ok' manusia

Ka jiseupet deungon tuleueng
Taeu kingkeueng ban silingka
Lom rumoh meubilek dalam
Bee jih nabban bangke buya

Dumna tuleueng ka jitamon
Tuleueng rimueng tuleueng rusa
Ubena binatang huteuen
Makanan aneuk beulaga

Bandum bilek ka jigunci
Bilek Siti nyang teubuka
Mara Karma keunan sampoe
Ngon putroe neu-ek bandua

Troh u rumoh piyoh laju
Jak taguen bu putroe muda
'Oh ka masak beuot laju
U keue teungku bangta muda

'Oh lheueh makeuen muda seudang
Duek meurantam peugah haba
Teutap sinan bungong peukan
Ngon cut intan hate suka

Meusuka-suка geunap uroe
Tuan putroe deungon bangta
Putroe tanyong teuma meunoe
Peue uroe geutanyoe bungka

Ho nyang neujak wahe cutbang
Ulon sajan jinoe neuba
Hudep mate neuba sajan
Beurangkaban ulon rela

Ban nyang hajat teungku pubuet
Ban meukeusud hana dakwa
Bangta deungo teukhem bacut
U likot neupaleng muka

Teuma marit po samlakoe
Wahe putroe deungo hamba
Mirahpati po meuhuet-huet
Jimeulot ngon siwah raja

Meunyo dikeue mameh mulot
Di likot laen bicara
Mara Karma meunan neukheun
Teusinyom cut putroe muda

Yoh nyan putroe seuot rijang
Suara ban genggong jawa
Di laot na jalo kawe
Dalam gle ureueng meurusua

Di babah sampie lam hate
Kon bak bibi pura-pura
Kon he teungku lon meuwayang
Bit lontuan neu-eu dara

Kadang teungku meunan ulah
Na ubah janji ngon hamba

Jipot angen beudoh geulumbang
Pade di blang angen timpa

Meunyo neuba ulontuan
Nyawong badan neupeuhamba
Meunan narit sinyak putroe
Seuot dudoe bangta muda

Bungong meulu luroh ulah
Nyang jroh indah bungong jeumpa
Lon deungo su sangat indah
Bak babah nyang meunan rupa

Putroe seuot lom sipatah
Jibalah panton cut bangta
Puteh-puteh bungong keureutah
Nyang cidah bungong seulanga

Ban neudeungo nibak babah
Meunan cit sah dalam hatenya
Seuot bangta meunoe neukheun
Balah panton putroe muda

Bungong meulu meukarang-karang
Teungoh malam rhet meuukeuba
Lon deungo su miseue gambang
Di dalam pakri ban rupa

Seuot putroe laju bagah
Jibalah panton cut bangta
Hitam-hitam anuek bayam
Cok sireugam kue bak ija

Bit neukalon badan hitam
Didalam mameh ban saka
Jaweueb bangta teuma meunoe
Jroh that raghoe meusuara

Reudok di gle sabé hujeuen
Keumang bungong rhet lam beuluka
Ureueng gob boh pakri tatueng
Bangsa kureueng rupa hana

Tuan putroe khem teuseuheh
Taeu rumeh ngon ie muka
Bungong jeumpa puteh mirah
Nyang cidah bungong seulanga

Han lon pike hina meugah
Hamba Allah bandum sama
Dilon cutbang kon beurakah
Gata nyang sah judo hamba

Gata judo ulon tuan
Nyang laen tan keunoe teuka
Neutueng ulon neupeusayang
Bek jimakeuen le reksasa

Bangta neukheun teuma meunoe
Ubak putroe nyang jroh rupa
U hijo dileuen meuligoe
Geunap uroe angen timpa

Meunyo meunan wahe putroe
Singoh uroe jadeh lon ba
Meunan narit bangta ahli
Cut Khairani hate suka

Mangat hate hana sakri
Cut putroe ti lom berkata
Puteh-puteh bungong giri
Malam hari rhet meukeuba

Han lon ubah ban nyang janji
Hudep mate sajan gata
Janji habeh sumpah leupah
Menyo ubah temeureuka

Beuranggasoe ubah janji
Page bak titi hitam muka
Dilon teungku lon harap sah
Darah gapah milek meukuta

Bangta seuot insya Allah
Han lon keubah sinoe gata

Meunyo cit na ban neupeugah
Bekle gundah bungong jeumpa

Mangat hate bandua droe
Leumah gigoe khem teutawa
Bangta tanyong teuma dudoe
Ubak putroe nyang jroh rupa

Wahe adek nyang sambinoe
Na peue jinoe lon pareksa
Euntreuk watee woe gogasi
Ulon mate pakri daya

Tepeulara han meusampe
Ulon mate tinggai gata
Putroe deungo meunan ulah
Ile limpah ro ie mata

Wahe teungku peue neupeugah
Dilon sah lakoe lon gata
Meunyo hudep sare-sare
Meunyo mate sapat dua

Ban bak babah troh lam hate
Kon ban mise wayang senda
Meungka mate teungku sidroe
Ulon tob droe sama-sama

Mangat mate bandua droe
Geutanyoe saboh keureunda
Sikrak gafan saboh kubu
Deungon teungku sapat dua

Bangta teukhem neukheun meunoe
Bek le tamoe po jroh rupa
Lon meuseunda deungon putroe
Sibagoe keu gura-gura

Teuduek haba siat 'oh noe
Lon häreutoe keu reksasa
AMMA BAKDU teuma lagi
Gogasi ulon calitra

Ka lhee buleuen jipeureugi
Keumbali u rumoh tangga
Bangta deungo su lam huteuen
Kayeet kram-krum dum meutimpa

Na ban reudok bade hujan
Miseue topan angen raya
Na miseue gle teungoh runtoh
Na sang guroh bade teuka

Neudeungo su geudab-geudub
Teukeujot Mara Karma
Bangta tanyong bak cut meulu
Peue meu'u-'u dalam rimba

Seuot putroe teuma laju
Tuanku ka troh reksasa
Nyan alamat woe gogasi
Neujak som droe po meukuta

Seuot bangta teuma meunoe
Pat lon som droe po jroh rupa
Pat lon meusom wahe putroe
Peugah jinoe uleh gata

Bek neugundah teungku ampon
Teumpat eh lon di yub gata
U yub peuratah keunan neulob
Lon peulimbot deungon tika

Teuma wasiet po samlakoe
Ubak putroe nyang jroh rupa
'Oh troh keunoe woe gogasi
Tanyong hate ubak gata

Na ka rayek hate putroe
Takheun meunoe gohlom raya
Wahe adek meunoe takheun
Hate ulon hana baja

Pane rayek hate kamoe
Han siuroe nek usaha

Mangat rayek hate kamoe
Mita jinoe he nek baja
Neujak mita binatang gle
Neucok hate keunoe neuba
Meunyo na nyan wahe nek droe
Hate kamoe rijang raya

Meunan takheun wahe nyak ti
Bak gogasi 'oh jigisa
Mangat rijang jipeureugi
Jijak cari dalam rimba

Seuot putroe bungong sukon
Ulon seuon ban nyang sabda
Ban nyang wasiet teungku ampon
Niba ulon hana lupa

'Oh lheueh wasiet nibak putroe
Neujak som droe bangta muda
U yub peuratah neulob sidroe
Beudoh putroe jitop sigra

Tuan putroe top diateueh
Sinteue neuboh deungon tika
'Oh lheueh geutop bangta sidroe
Jiduek sidroe ban biasa

Teuduek dilee saboh atot
Ulon seubot keu reksasa
Gogasi woe dalam huteuen
Kayee gram-grum dum jibungka

'Oh sare troh nyan u rumoh
Aneuk biyoh han peue kira
Makanan dum ka jipuwoe
Bandua droe saban raya

Macam-macam dum binatang
Lutong musang gajah rusa
Ban meuboh-boh dum jigulam
Inong agam sama juga

Lheueh jipeuduek dum makanan
Jitanyong bak putroe muda
Wahe putroe bek meusulet
Tapeugah pat manusia

Bee meuharu that meudram-dram
Pat ka tasom uleh gata
Ban jideungo kheun gogasi
Cut putroe ti hate lia

Ka jitupeue sang ka jithee
Ka jitubee manusia
Seuot putroe bungong keumee
Jikheun lagee meusom punca

Wahe po nek laen bak lon
Pane ureueng keunoe teuka
Ho ret jijak keunoe ureueng
Meulinteueng ngon laot raya

Adat na kapai hantom rapat
Jitakot that nek keu gata
Meunan jikheun le putroe ti
Gogasi teukhem bandua

Hana sapeue le jitanyong
Cok beulangong laju sigra
Ka jipeuduek atueuh dapu
Jitaguen bu limong gunca

Sabon treuk beulangong beusoe
Jipasoe sie gajah rusa
Apui hudep yub beulangong
Dalam gunong deuh meunyala

Siulah sang tutong nanggroe
Meunankeuh proe hu that raya
Lidah apui 'oh pucok u
Peungeuh hu ban siseun lingka

Binatang gle habeh jiplueng
Teueng-bayeueng ban saboh rimba

Jikalon apui that bahrullah
Badeukek gajah plueng meutaga
Hana tinggai le binatang
Teureuban lam gunong raya
Teubiet ciret dum binatang
Bak teurajang teumakot raya
Teuduek dilee binatang plueng
Ureueng makeuen ulon calitra
'Oh ka masak dum jitagu
Teuma jirhueng pantah sigra
Lam kulet ka lheueh jiato
Teumpat boh bu ureueng dua
Dalam kulet bu jisinthong
Luah linteueng nam ploh deupa
Nyankeuh dumnan luah buju
Teupat boh bu sicilaka
'Oh ka habeh bu jisinthong
Rab teutong sampoe u para
Na miseue ureueng tet naleueng
Meukeuman^g asap lam hawa
Dum binatang dalam bubong
Lam bu tutong rhet meukeuba
Peue-peue nyang na cicak tikoh
Uleue broh sidom seureungga
Rhet dalam bu keunan bandum
Rambideuen limpeuen deungon kala
Bu jih puteh ka jeued hitam
Miseue teupong ka roh lada
Siulah-ulah sang kon le bu
Meunan teungku keu umpama
Asap bu ngon asap eungkot
Rumoh seupot glap gulita
Bandua peue ka lheueh jirhueng
Yoh nyan makeuen ureueng dua

'Oh lheueh makeuen ie jiminom
Tho saboh mon gohlom meumada
'Oh lheueh makeuen pruet ka keunyang
Gureng-gureng ateueh tika

Jicok kayee culek gigoe
Bandua droe sicilaka
Culek gigoe bak seumantok
Hana rayek ube uram pha

Sie meukeumat nibak gigoe
Miseue bagoe taeu boh la
Ube boh la leumoi limong
Meunan bangon taeu rupa

Adat ureueng tasrom keunong
reubah sinan le teuhanta
Dumnan raya aneuk bisoe
Ruweueng gigoe jeued lob dua

Lheueh gogasi culek gigoe
Lakoe binoe khem teutawa
Teuma jikheun le ngon panton
Su peureulong dalam rimba

Lem gogasi meunoe panton
Deungo lon suson meung sibanja
Gunong manyang lapan sagoe
Kayee jatoe dum meubanja

Payah awai mangat dudoe
Pruetku ka troe ngon sie rusa
Jipot angen 'oh cot uroe
Pukat woe tamong kuala

Padum na treb kujak kuwoe
Hate putroe goh lom raya
Meunan panton bandua droe
Geunta asoe bangta muda

Di putroe han teumakot le
Meunan sabe ka biasa

Teutapi su lam geulunyueng
Adat jeued sang tateureupa
Binatang gle habeh jiplueng
Teueng bayeueng jeueb-jeueb beuluka
That meutaga jideungo su
Sang geulanteue nyang that raya
Nyang teuga jiplueng meu'u-'u
Nyang ulu aneuk teupanca
Teukeujot ngon su gogasi
Sang-sang reule alam donya
Teutap dilee binatang plueng
Ulon kheun gogasi raya
Tanyong jinoe ubak putroe
Pakri bagoe panton hamba
Got suara pakri bagoe
Takheun jinoe uleh gata
Teuma seuot tuan putroe
Ulah bagoe genggoeng jawa
Hana sidroe ureueng laen
Haloh licen ban su gata
Beuranggasoe hate rindu
Neuboh lagu sang biula
Habeh lon jak baroh timu
Hana got su miseue gata
Dum binatang habeh karu
Jiplueng laju galak raya
Ie nyang ile bandum teudong
Jiplueng kameng pat ureueng ba
Adat na ureueng nyang meuaneuk
Sinan jitiek jiplueng sigra
Jicok bajee tinggai siluweue
'Oh jideungo su nek hamba
Bek an nyang gob jioh teumpat
Ulon nyang rab galak raya

Cuba kheun lom he nek panton
Galak that lon deungo suara
Ban jideungo haba putroe
Hana bagoe hate suka

Sebab sabe lam jipujoe
Uleh putroe nyang got rupa
Han jitupeue narit saket
Beuna sabet badan raya

Bakjisangka got geupujoe
Han jitupeue geuboh tuba
Hingga dumnan haba putroe
Han jitupeue haloh gasa

Meupanton lom aneuk bisoe
Bandua droe agam dara
Dalam gle na urot rumpet
Jipalet bak kayee raya

Kuwoe lam gle padumna treb
Han soe ceupet cucoku muda
Dalam gle na cicem pupoh
Jipajoh le cicem rimba

Adat na cuco han sapeue roh
Han ek jihadoh tubohku raya
meunan panton gogasi kheun
Ka teusinyom Mara Karma

Dalam hate han ek neutheun
Khem teusinyom bangta muda
Sangkira meung laen ureueng
Reubah pingsan laju sigra

Sebab got su jimeupanton
Ban hujeuen tren meulumba-lumba
Dum binatang dalam huteuen
Habeh kingkeueng plueng meutaga

Hana tinggai le meusaboh
Habeh gaduh asoe rimba

Na miseue gle teungoh reuloh
Jiplueng jiweh yo jih raya

Sebab gogasi jimeupanton
Agam inong su meutaga
Su nafah ban reudok di gle
Miseue bade angen raya

Na ban riyeuk dalam laot
Dum teukeujot asoe rimba
Meunankeuh su aneuk biyoh
Ngon tuboh siploh ureueng wa

Nibak putroe lom jitanyong
Pakri bangon he meutia
Wahe cuco bungong siron
Pat ka tasom manusia

Pakon han tapeugah laju
Bee meuharu hana tara
Teungoh makeuen bee meuharu
'Oh ka lheueh bu meunan juga

Bek meusulet bungong meulu
Peugah laju ubak hamba
Seuot putroe teuma laju
He nek teungku peue ri haba

Ka dua blet nek neutanyong
Pane ureueng keunoe teuka
Pane insan nyang ka bingong
Jijeued tamong teumpat gata

Manusia bandum jithee
That Jimalee nek keu gata
Jitakot that hana lagee
Plueng neuree-ree dum jiguda

Ka neutanyong he nek ampon
Nyoekueh ulon manusia
Nyoekueh bee lon geunap uroe
Laen han soe keunoe teuka

Meunyo nek han pateh kamoe
Beudoh jinoe jak pareksa
Meung na hajat keumeung pajoh
Ulon saboh makeuen sigra

Jinoe he nek neukoh lihe
Neucok hate dalam dada
Mangat jinoe ulon mate
Bek mubee le manusia

Bit pi jikheun meunan bagoe
Hate putroe na sang geumpa
Kadang takot han jipateh
Aneuk paleh jak pareksa

Gogasi deungo haba putroe
Seuot jinoe teuma sigra
Pakri takheun he putroe ti
Lon cok hate dalam dada

Na ka rayek deungon siat
Kadang cit klat gohlor raya
Meung ka rayek hate pucut
Klat-klat bacut han kukira

Tuan putroe yoh nyan marit
Ban nyang wasiet Mara Karma
Pane rayek hate kamoe
Han siuroe nek boh baja

Miseue kayee hana ujeuen
Sabe lam khoeng leuhu hana
Adat na boh han seulamat
Troh jangat habeh binasa

Brok deungon boh tho ngon tangke
Meunan mise lon umpama
Meunyo hana neutem sibu
Han sigeutu jitem raya

Di gogasi tanyong laju
Pakri laku lon boh baja

Pakri macam ulon sibu
Kheun sigeutu uleh gata
Seuot putroe panyot kande
Nek boh hate deungo hamba
Beudoh he nek tajak u gle
Mita hate manusia

Ube nyang na binatang gle
Neucok hate keunoe neuba
Neumita sireutoh macam
Hate musang hate buya

Meung ka na sireutoh macam
Puwoe rijang ubak hamba
Lon meung pajoh nyan keu ubat
Bek treb that hate lon raya

Rayek laju lheueh lon makeuen
Lhee buleuen ka cukop tuha
Meunyo gohlom ulon makeuen
Meureutoh thon han cit raya

Sireutoh thon han lom keumong
Payah mantong tapeulara
Gogasi kheun meunoe lagee
Peue roe bak kee tayue mita

Bek sireutoh nyan talakee
Siploh ribee singoh ek na
Adat tapeugah yoh baroekon
Ka kutamon dum nyang suka

Hate rimueng lutong himbee
Hate cagee bue deungon kra
Bek tagundah bungong keumee
Taeu gutee gatai raya

Ban jideungo uleh putroe
Nuga beusoe ka jihila
Ngon seuneupet jiba sajan
Bakong geucang nyan pi ada

Gogasi eh bandua droe
Lakoe binoe ka teuhanta
Tuan putroe kalon gutee
Bak ulee aneuk beulaga

Yoh nyan putroe kalon gutee
Lam ulee limpeuen ngon kala
Uleue broh ngon uleue seudong
Jimeuumpung dum sireungga

Putroe seupet deungon beusoe
Jipoh dudoe deungon nuga
'Oh ban mate uleue seudong
Jicok bakong mamoh sigra

Gogasi jitanyong laju
Peue nyan meusu cuco hamba
Putroe seuot jroh meureunek
Poh gutee nek ube-be raya

Nyankeuh he nek keutap-keutip
Ulon picet gutee dumna
Gogasi teukhem teusinyom
Meunoe jikheun jih bandua

Bit carong that bungong keumee
Taeu gutee mangat raya
Hingga teuma haba nyang toe
Bekle rampoe kureueng gura

Nyang mangat bee bungong rihan
Nyang mangat nan bungong riwat
Teutap dilee lagee meunan
Bahle kaman balek ayat

Meunyo sot sot han got reumbang
Laen macam lon boh siat
Gogasi lon karangan
Beudoh yoh nyan jijak leugat

Ka jipeugah ubak putroe
Lon uroe nyoe kubeurangkat

Sigala hate kujak mita
Tinggai gata beuseulamat

Putroe seuot han peue salah
Neupeugah bek treb-treb lambat
Beurijang that he nek neuwoe
Ulon sidroe teumakot that

Kadang peue-peue teuka bala
Han soe publa jeued meularat
Jipoh le gob kadang mate
Jicok hate tueng keu ubat

'Oh neuwoe nek ulon hanle
Susah hate nek nyang ingat
Kheun gogasi teuma pantah
Bek tagundah he cut ubat

Siat kujak bungong karang
Saboh eumpang hate dapat
Meuhan meukri troh meuribee
Lutong himbee kudrob leugat

Rusa gajah rimueng cagee
Meunyo ngon kee siat dapat
Meunan jikheun ubak putroe
Bandua droe jibeurangkat

Jijak mita dumna bagoe
Ubat putroe bungong riwat
Tadeungo su miseue topan
Dalam hutan jipeteupat

Jijak mita lutong rimueng
Nyankeuh umpeuen sang boh langsat
'Oh sare troh dalam huteuen
Wie ngon uneun ka jilihhat

Hana sapeue na meuteumeung
Tan meuteumeung saboh lalat
Ji-ek gunong jitren alue
Hana sapeue pina dapat

Tan meurumpok meusaboh bue
Laju ukeue lom jikarat
Ka beusot u nanggroe laen
Si aneuk jen jibeurangkat

Tan meuteumeung saboh kucing
Habeh jingieng jeueb-jeueb teumpat
Sebab teukabo aneuk biyoh
Neupeujioh le hadarat

Tan meurumpok saboh lapoh
Habeh jibloh jeueb-jeueb teumpat
Teuma jijak jeueb-jeueb panton
Sinan pitan saboh sisat

Habeh jingieng jeueb beuluka
Lam-lam paya lam-lam reubat
Hana sapeue na meusua
Teutap haba 'ohnan siat

AMMA BAKDU teuma dudoe
Lon hareutoe Mara Karma
Bangta beudoh yub peuratah
'Oh lepah gogasi bungka

Jak kueh uruek saboh bagah
Lhok ngon luah nam ploh deupa
Siploh deupa luah panyang
Lhok di dalam nam ploh deupa

Dumnan luah bangta kueh mon
Di dalam nyan neuboh suda
Suda panyang tujoh lapeh
Meutindeh ban siseun lingka

'Oh ka cukop dum geuhato
Broh nyang tho-tho geujak mita
U dalam mon bangta pasoe
Geutop dudoe reuhung hana

Bak rot ueh jijak gogosi
Hana meuri miseue nyang ka

cukop hase dumpeue peunoh
Woe u rumoh bangta muda

Cok bulee jok diseuramoe
Puta taloe yoh nyan sigra
Neuputa na ube beuteh
Neuhue keudeh u laot raya

Bineh laot keudeh ujung
Bak rumoh phon ikat punca
Cok minyek gah teuma geuboh
Phon rumoh troh u laot raya

'Oh lheueh hase dum seuleusoe
Buka peutoe bangta muda
Geucok asoe seukalian
Jak simpan bineh kuala

'Oh ka keumah dum sibarang
Ngon cut intang marit bangta
Beudoh jinoe wahe cut ti
U pasi keudeh tahala

Tuan putroe mangat hate
Geubeudoh le sigo dua
Ban sare troh u bineh pasi
Kapai api saboh teuka

Bangta kalon kapai sideh
Ija puteh neupot sigra
Nanghuda yoh nyan jilihhat
Di darat na manusia

Jipot deungon ija puteh
Tanda keudeh jiyyue teuka
Jipeugah bak jurumudi
Jinoe pakri tabicara

Jehpat ureueng hei geutanyoe
Pakri jinoe jeued tateuka
Soe got tajak atawa han
Takheun kaman uleh gata

Jurumudi seuot leugat
Tajak siat tapareksa
Kadang-kadang peue meularat
Tajak lihat siketika

Tajak kalon peue lakuan
Kadang karam kapai raya
Kadang pina ureueng mate
Bineh pasi laot raya

Meungkon ureueng mate sinan
Hantom meunan dilee nyang ka
Ka meusareueng kadang sinan
Bak teumpat nyan na reksasa

Meunyo kon na keususahan
Peue buet keunan ureueng teuka
Sebab teumpat na gogasi
Han beurani ureueng teuka

'Oh ban leumah deuh jikalon
Jiteugom Jimakeuen sigra
Geutanyoe pih ureueng hanyot
Angen bapot riyeuk teuka

Entah hudep entah mate
Han meuho le tanyoe gisa
Adat nyang han tajak keunan
Geutanyoe han na peue mara

Han cit sampoe ban nyang hajat
sebab sisat jioh raya
Meunyo meunan ban nyang patot
Ulon ikot ban kheun gata

Yoh nyan kapai ka jidayong
Bak teumpat dong ureueng dua
'Oh ban neungieng kapai ka toe
Galak putroe deungon bangta

Dalam hate pike meunoe
bak uroe nyoe ulon bungka

Leupah ulon bak gogasi
Khendak Rabbi nyang kuasa

Kapai pitroh keunan sampie
Jipeudeungo toe bineh data
Ban leumah jingieng u darat
Barang lethat jieu rupa

Asoe kapai ka teupike
Pane geume alat raja
Lheueh nibak nyan na sikeujab
U darat jiteungoh sigra

Beudoh bangta deungan putroe
Meumat jaroe ngon nanghuda
Sireuta ngon jurumudi
Kuli-kuli bandum rata

Bangta muda bri makanan
Perjamuan lem nanghuda
Makeuen minom dum sibarang
Seukalian hate suka

'Oh lheueh makeuen dum sinaroe
Tanyong meunoe le nanghuda
Wahe bangta deungan putroe
Peue buet keunoe tajak gata

Ureueng laen han jipeutoe
Bak nanggroe nyoe na reksasa
Mara Karma bungong pade
Neupeugah le bak nanghuda

Diphon awai hingga akhe
Habeh sare meucalitra
Ureueng deungo dum sinaroe
Haba putroe deungan bangta

Bandum yoh nyan habeh jimoe
Jideungo nyoe dum calitra
That weueh hate teuka sayang
Hana reunggang teuka bala

Teungoh-teungoh dum ureueng moe
Marit meunoe bangta muda
Wahe teungku beuna sayang
Keu lontuan ureueng hina

Umpama lon ureueng rab mate
Teungku ini tulon hamba
Po nanghuda seuot leugat
Sampoe hajat ban nyang pinta

Peue nyang nafsu jeued tapeugah
Meungna mudah han rhet asa
Seuot bangta meungna sayang
Bri lon numpang kapai gata

Ho nyang neujak neuba kamoe
Bek sinoe gogasi seuba
Dum nyang upah teungku lakee
Ulon angkee hana dakwa

Nanghuda deungo haba meunan
Teuka sayang hana tara
Jiseuot le han peue salah
Iyue meukeumah laju sigra

Dalam kapai peu-ek barang
Mangat rijang tanyoe bungka
Bekle tinggai gata nyoe sinoe
Takot jiwoe gogasi rimba

Meung troh jiwoe gogasi pindoe
Dum geutanyoe hilang nyawa
Bangta deungo seunang leupah
Gaduh susah gob nyan dua

Bangta bri le bak bangsawan
Bak masa nyan keu nanghuda
Bri siseun tren laju yoh nyan
Peukayan bajee ngon ija

Dan nyang laen dum sibarang
Bri salenan uleh bangta

Habeh rata seukalian
Peu-ek barang laju sigra
Jicok barang uleh keulasi
Jipeu-ek le dalam bahtra
Habeh keumah dumpeue hase
Bangta tet le taloe raya

Neucok apui neutet taloe
Yoh saboh roe hue le bangta
'Oh lheueh bangta neutet taloe
Neu-ek jinoe kapai raya

Kapai bungka dalam laot
Taloe neutet hu meuhyala
Apui pajoh bacut-bacut
Jitet taloe bangta ba

Bacut-bacut apui pajoh
Hingga troh rumoh reksasa
Yoh nyan tutong laju rumoh
Meunyala troh dalam rimba

Apui ka hu sangat manyang
Meukeumang asap lam hawa
Asap jipo that meukeumang
U manyang leumah meubara

Gogasi di dalan huteuen
Mita umpeuen gajah rusa
Hana sapeue na meubayeuen
Jikalon asap meubura

Jipike ka tutong rumoh
Jiplueng mehmoh jih bandua
Lakoe binoe plueng lam huteuen
Tadeungo kram-krum kayee bungka

Siulah sang gle ka runtoh
Jiplueng sunggoh jiwoe sigra
Tan ingat le aneuk piyoh
Hingga troh bak urong raya

Khendak Allah ka teukeudi
Gogasi ka keunong bala
Rhet dalam mon bandua droe
Keunong duroe pacang suda

Hana jeued le jipeuglah droe
Ka meupaloe jih bandua
Keunong suda apui tutong
Kliek meuong-onng that meutaga

Habeh umu hanle untong
Ka teupangkong lam mon raya
Kakeuh mate digogasi
Ngon teukeudi Tuhan Esa

Habeh langkah ngon rezeuki
Sinan janji lam mon raya
Bungong jeumpa bee meupeuah
Nyang le ulah bungong seulanga

Keu gogasi 'ohnan sudah
Lon kisah Mara Karma
Troph lam kapai bungong riwat
Grak hadarat lom meubala

Nanghuda yoh nyan meupakat
Musyawarat lam rahsia
Bak jurumudi nyan meupakat
Pakri ban jroh nibak gata

Lon peugah rahsia saboh
Got tapoh Mara Karma
Tacok harta keu geutanyoe
Beungon putroe bagi dua

Teuma seuot jurumudi
Buet han meukri tekeurija
Pakon galak buet khianat
Han taingat dudoe seksa

Nibak Tuhan neubri laknat
Buet salah that han neurela

Han taingat nyang ka leupah
Singoh susah lom meuganda

Meunan narit jurumudi
Nanghuda pi hanle haba

Di nanghuda saket hate
Jurumudi han sireuta

Beungeh jithat hana sakri
Dalam hate meuseurapa

Bit paleh that jurumudi
Pakat kami han sireuta

Dalam hate jih meulintah
Han jeued peugah bak beulaga

Rahsia han jeued tapeugah
Saleh leupah waba puta

Po nanghuda laloe pike
Dalam hate kira-mira

Jikeumeung poh bangta ahli
Meunan sabé cita-cita

Teutap pike dijih sidroe
Malam uroe lam jijaga

Hana sapat na ji peuthee
Mita lagee sidroe saja

Uroe malam nyan jipike
Kupoh mate Mara Karma

'Oh ka mate jih nyan sidroe
Kucok putroe ngon hareuta

Meunan pike laknat pindoe
Malam uroe lam keunira

AMMA BAKDU teuma dudoe
Bak siuroe grak Rabbana

Siploh uroe peulayaran
Bangta seudang hate goga

Teuka angen ngon geulanteue
Kilat sosene nabana sua

Jipot angen barat laot
Teuka seupot glap gulita
Kapai plueng meubapot-bapot
Barat laot barat daya

Sigo saho ka meulinggang
Bakat na sang gle nyang raya
Rab-rab karam dalam laot
Bangta cut neudong di lúa

Bangta neu-ek troh u pucak
Sampoe ubak lapeh tiga
Neucok barang seukalian
Neusimpan lapeh pertama

Bet ngon layeue tarek taloe
Bek meupaloe meunan kira
Neujak bantu jurubatu
Bek meupaloe lem nanghuda

Mangat bek le angen bapot
Bek le hanyot kapai raya
'Oh ka habeh bangta pinah
Troh le bagali po nanghuda

Ji-eu bangta ateueh pucak
Hate galak hana tara
Ji-ek laju ka jitulak
Jisipak lam laot raya

Rhet lam laot bangta seudang
Nanghuda kheun meunoe haba
Mate kah eungkot pareulan
Putroe seudang kee po jeumba

Ka baroekon cit kupreh-preh
Baro jadéh troh ban pinta
Meunan jikheun rimueng kuran
Hana macam hate suka

Ban jisangka hanle hayat
Bulat-bulat eungkot seuba

Bangta muda kalam laot
Putroe cut ulon calitra

'Oh ban teutap angen ribot.
Putroe cut teubiet u'lūā
Seutot judo bangta seudang
Teueb-teueb ruweueng jeueb-jeueb kama

Neujak seutot keunoe keudeh
Jeueb lapeh neujak mita
Tren lapeh nyoe ek lapeh jeh
Hingga habeh jeueb-jeueb kama
Dalam kapai jak meurawoh
Bangta jroh meurumpok hana
Yoh nyan pike tuan putroe
Hanle lakoe jienaya

Putroe moe le sinan reubah
Allah-Allah he keukanda
Wahe teungku nyang samlakoe
Ho troh kamoe 'oh tan gata
Hoka neujak he teungku droe
Tinggai kamoe hana guna
Keupeue guna tinggai sidroe
Hanle lakoe keupeue guna
Pakon neujak teungku sidroe
Bak kamoe han neupeuhaba
Bukon sayang bungong meurak
Tengoh galah habeh mala

Peue na beungeh teungku neujak
Teungoh galak lon eu rupa
Gohlom meutroh siploh uroe
Deungon lakoe lon meusuka
Gaseh hate lon han bagoe
Lon eu bak dhoe that meucahya
Jipoh gata he judo droe
Tinggai kamoe soekeuh kira

Neupreh kamoe teungku ampon

Neupreh ulon po meukuta

Dalam laot jinoe kutren

Bek he ampon sidroe gata

Lheueuh jikheun nyan putik langsat

Keumeung lumpat u laot raya

Jurumudi yoh nyan lihat

Laju jimat putroe muda

Teuma jikheun ha ba nyoe ban

Bekle kiam po jroh rupa

Bek tagundah he putroe ti

Gohlom mate judo gata

Meunyo gohlom sampie janji

Han Tuhan bri hilang nyawa

Beuthat jitiek dalam laot

Tuhan Makbut nyang peulara

Cit meutemeung teuma dudoe

Ngon judo droe nyang seutia

Nyan he pocut hana that brat

Nyang that liwat dilee nyang ka

Jaroe gaki ka jiikat

Han cit troh hat ajai teuka

Jiboh taloe jaroe gaki

He putroe ti han cit fana

Han cit mate bangta ahli

Goh troh janji bak Rabbana

Meunyo gohlom sampie janji

Bah beurangkari jienaya

Nyoe pimeunan wahe putroe

Bekle tamoe duka cita

Jinoe talob u dalam peutoe

Gunci bak droe bek di lua

Tagunci peutoe u dalam
Bek troh datang lem nanghuda
Bak gata nyoe troh peureugi
Bah jinari jih di lua

Miseue manok jilingka krong
'Oh jitanyong bek takira
Menyo pura jiproh peutoe
Taiem droe bak sapeue haba

Meunyo bit-bit jiproh peutoe
Bak takue sakin tapuba
Pura-pura takoh takue
Mangat jiwoe lem nanghuda

Jih teumangkot gata mate
Teuntee hanle troh-bak gata
Meunan nasihat jurumudi
Putroe pike that sibeuna

Putroe jilob dalam peutoe
Troh le sampoe lem nanghuda
Jijak seutot tuan putroe
Keumeung pasoe dalam kama

'Oh ban sare deuh jikalon
Khem teusinyom hate suka
Tatkala nyan' meunoe jikheun
Teubiet buleuen keunoe gata

Nyang mate bek le teugoe-goe
Ulon gantoe nyang peulara
Peue nyang nafsu tuan putroe
Na bak kamoe dum peukara

Ho tameujak kheun bak kamoe
Kapai nyoe han payah siwa
Tajak meu-en deungon kamoe
Jeueb-jeueb nanggroe gata lon ba

Tajak kalon peumandangan
Nanggroe laen pakri rupa
Tangui ija peue nyang harok
Sideh tacok dalam kama

Tapileh ri nyang galak droe
Intan pudoe ngon meutia
Bekle susah keunoe tajak
Lon ba ubak teumpat gura

Teumpat nyang jroh bilek kamoe
Teubiet keunoe he meutia
Ban neudeungo dum hareutoe
Beungeh putroe hana tara

Neucok kreh neumat di jaroe
Pura tob droe po jroh rupa
Meung tapeurab gata keunoe
Bak uroe nyoe ulon fana

Ban jikalon meunan macam
Surot rijang lem nanghuda
Po nanghuda meunoe pike
Pakon beunci jieu hamba

Peue jisayang nyang ka mate
Han jipike putroe gila
Bahle meunan meung lhee uroe
Lam kapai nyoe pane daya

Ho jimeueng plueng lam laot nyoe
Ban sinaroe laot lingka
'Oh ka seb deuek dalam peutoe
Bak kee dudoe cit jigisa

Meunan ingat dalam hate
Jiminah le lem nanghuda
Teudeauk 'ohnan saboh atot
Ulon seubot Mara Karma

Lheueh jitiek dalam laot
Laju hanyot lam ie raya
Lham ngon timue jipeumeu-ĕn
Puteh licen bakat puba

Bangta ingat lam hate droe
Tinggai putroe sidroe saja
Han meusampe lon meusahbat
Meunan ingat dalam dada

Ya Tuhanku po hadarat
'Oh lon ingat sayang raya
Teungoh neumoe bungong sukon
Troh ikan nun keunan teuka

Eungkot raya ka troh keunan
Jieu yoh nyan Mara Karma
Bangta kalon eungkot sinan
Neukheun yoh nyan meunoe haba

Wahe sang nun nyoe pat umpan
Tapeureulan lon le gata
Bekle hudep lam susahan
Mangat rijang ulon fana

Keupeue guna hudep susah
Tan faidah dalam donya
Nibak hudep got bah mate
Han ek theun le bala teuka

Hana sayang lon keu mate
Hana weueh le lon keu nama
Hanle ingat keu donya
Mangat jinoe hilang nyawa

Ban jideungo uleh sang nun
Teujanun tundok keupala
Eungkot tupeue dum lat-batat
Miseue adat manusia

Jiseutot le teumā laju
He Tuanku maha raja
Ulon mate putoh pruet-pruet
Meunyo lon'uet po meukuta

Meunyo hajat heukeumeung jak
Ho nyang galak jinoe lon ba
Adat jioh lon seuleuah
Beuthat payah han lon kira

Bangta deungo eungkot peugah
Galak leupah dalam dada
Meunyo meunan wahe sang nun
Taba ulon uleh gata

Taseutot ho nyang kapai plueng
Pat nyang jidong lon tabawa
Pat nyang jidong euntreuk kapai
Lon tatinggai gata gisa

Eungkot seuot laju bagah
Hanle ubah ban nyang sabda
Yoh nyan eungkot hate galak
Puteh meuprak ji'uot sigra

'Oh theueh ji'uet bungong meurak
Jipeujak ho kapai bungka
Padum lawet dalam laot
Angen bapot kapai raya

Lam jiseutot uleh eungkot
Di dalam pruet bangta muda
Hingga troeh nanggroe Peulinggam
Nanggroe Tuan putroe Nila

Nila Kasom nyang analan
Adek Tuan Mara Karma
Bak nanggroe nyan kapai ka troh
Jipiyoh di mieng kuala

Eungkot seutot hana teudoh
Jih pika troh keunan teuka
Ji-ek laju atueh pante
Meugule sinan teuhanta

Gampong duson bak teumpat nyan
Nek keubayan di sinan na
Ureueng binoe nek keubayan
Geiduek sinan ka treb lama

Geiduek sinan dalam rumoh
Laen saboh sinan hana
Jarak pante deungon rumoh
Hana jioh nam ploh deupa

Ateueh pante eungkot piyoh
Bangta utoh dalam pruetnya
Teubiet faja uroe suboh
Habeh peungeuh alam donya

Nek Keubayan ka geubeudoh
Tiep-tiep beungoh jak rah muka
'Oh sare troh bineh pasi
Geukalon le saboh rupa

Saboh eungkot raya leupah
Sinan leumah ka teuhanta
Teupike nek eungkot meujen
Dalam dihen menan kira

Jipo yoh nyan saboh cicem
Keunan jitren ubak nek ya
Miyub manyang jiteureubang
Jilinggang teuntang keupala

Cicem nyang po meunoe jikheun
He nek buleuen tuah gata
Cok on pade he nek bacut
Tacarueh pruet eungkot raya

Eungkot nyan tacarueh bak pruet
Mangat teusuet manusia
Aneuk raja sidroe ji'uet
Na dalam pruet jroh that rupa

Ban nek deungo cicem meusu
Geuplueng laju geujak mita
Me on pade saboh jakhob
Pruet eungkot geucarueh sigra

Teuntang pusat po nek carueh
Ka teusuet cut bangta muda
Lheueh jiulak bungong meulu
Eungkot laju ka jigisa

Dalam laot jigrob meupru
Tinggai teungku ngon nek tuha
Ponek kalon that sukaan
That analan aneuk raja

Cahya peungeuh sang beurlian
Siulah ban bintang kala
Nek Keubayan hate galak
Neu-eu sinyak indah rupa

Sira geucok geukheun meunoe
E samlakoe mubahgia
Patot ulon hana teungeut
Sebab pocut ka troh teuka

Bu kupajoh han jitem troe
Cit teugoe-goe lon keu gata
Lon manoe ija han basah
Ija lon rah gleh pi hana

Lon bqh minyeuk nibak ulee
Hana meubee miseue nyang ka
Sebab gata ka troh keunoe
Jeued teugoe-goe ureueng tuha

Cok neutingkue bangta seudang

Laju riwang u rumah tangga

'Oh sare troh woe u rumoh

Buleuen peunoh nek peuupa

Geupeumanoe geuboh beudak

Cahya meubhak miseue nyang ka

Nek Keubayan hate galak

Neupandang bak bangta muda

Cahya muka that seumeulhoh

Bungong ipoh jroh that rupa

Na miseue meuh lheuch geuseupoh

Beuthat jioh leumah cahya

Padum uroe meunan sabe

Bungong pade meuwoe teuga

Bangta tanyong bak siuroe

Nyoe peue nanggroe wahe nek ya

Soe nan raja lam nanggroe nyoe

Soe nan putroe judo raja

Nek Keubayan peugah meunoe

Nyoe nanggroe Peulinggam Cahya

Puspa Indra raja nanggroe

Ade han soe mat neuraca

Aneuk raja pina sidroe

Ureueng lakoe indah rupa

Geuboh nama Mangindan Sari

Bak sihari jak meurus

Padum uroe di dalam gle

Rakan sare dum sireuta

Deungon alat tumbak beude

Di dalam gle paro rusa

Hana rusa pi meung saboh

Putroe jroh meuteumeung teuma

Yub beuringen sidroe putroe
Cok neupuwoe uleh bangta
Saboh cicem nibak jaroe
Teungoh neumoe ro ie mata

Po bangta cok ka neupuwoe
Geunap uroe neupeulara
Hingga rayek putroe canden
Hana bandeng indah rupa

Jinoe pika neumeukawen
Puteh licen judo bangta
Padum lawet teuma dudoe
Bak siuroe putroe rugha

Neumoe bae neupoh-poh droe
Aduen kamoe han meuho ka
Raja tanyong awai akhe
Neuyue krah le rakyat dumna

Neuyue seutot bungong pade
Di dalam gle rimba raya
Sampoe jinoe seutot sabé
Teutapi meuteumeung hana

Ban neudeungo haba meunan
Han meuban-ban ro ie mata
Nek Keubayan tanyong rijang
Pakon intan gata rugha

Seuot bangta laju meunoe
Bukon lon moe he raja
Dalam mata ka jilob broh
Ulon sampohe ro ie mata

Neupeugah lom haba bunoe
Ulon deungo galak raya
Ponek kheun lom he samlakoe
Masa nyoe ka troh syedara

Deungon raja na roh sahabat
Treb-treb siat troh keutika
Neujak dua ngon isteri
Ubak doli puspa Indra

Nanghuda hana sapeu 'oh
Peurumoh nyang tari raya
Cahya muka sang buleuen peunoh
Cut putroe jroh hana tara

Deungon gata sang meusambot
Salah bacut gob po jeumba
Bangta muda yoh nyan teukhem
Pane geutem bak kon kada

Yoh nyan bangta lom neutanyong
Na neukalon judo rajá
Judo bangta Mangindan Sarí
Rayek pakri umu dumna

Teuma seuot nek Keubayan
Lon kalon tan deungon mata
Ulon deungo meung gob peugah
Jikheun tiwah bintang kala

Mara Karma tanyong bagah
Pakri ulah nek digata
Peue keurija nek disinoe
Nafakah droe pat neumita

Teuma seuot nek Keubayan
Bak tatanyong wahe bangta
Hana laen buet di ulon
Publoe bungong suntok masa

Sinan dilon keu nafakah
Seupot beungoh nyan keurija
Mara Karma teuma seuot
Sang han cukop bak lon kira

Bahle jinoe lon seuleuah
Ban nyang mudah lon usaha
Bah lon tulong jinoe siat
Bek meularat nek ka tuha

Nek tan daya le meung bacut
Neupubuet-buet han kuasa
Meunyo sinan mita untong
Meung keulon han ek neudaya

Ban neudeungo haba meunan
Weueh hana ban ureueng tuha
Nek seuot le teuma rijang
Pakon meunan taberkata

Nafakah lon gata pajoh
Ban-ban nyang roh peue-peue nyang na
Rezeuki lon nibak Tuhan
Bek susahan wahe bangta

Bangta seuot bit nyo meunan
Nibak Tuhan nyang bri jeumba
Teutapi beusare-sare
Mita rezeuki keu beulanja

Meunyo hana taekhtieneue
Han troh ukeue keunoe teuka
Bangta kheun lom teuma meunoe
Deungo kamoe wahe nek ya

Bahle he nek tasok bungong
Kadang seunang keu beulanja
Sebab bungong pile keumang
Ulon karang nek nyang bawa

Ponek seuot laju bagah
Insya Allah wahe bangta
Nyang baroekon publoe bungong
Tan lon karang he aneukda

Lon me ban meutangke-tangke
Sitali meujan-jan laba
Nek Keubayan peugah meunan
Seuot yoh nyan bangta muda

Meunyo meunah he nek payong
Jak u keubon neupot bunga
Keunoe neuba laju bak lon
Ponek neutren hana dakwa

Sawak ija cok geuranjang
Neujak yoh nyan keubon bunga
Geupot bungong dum sinaroe
Geupuwoe u rumoh tangga

Troh u rumoh ponek puwoe
Neupeujaro ubak bangta
Bangta sambot le u jaroe
Neucok taloe jarom tika

Neumat jarom deungon taloe
Bungong soebroe neusok sigra
Neuboh bungong hijo mirah
Lhee-lhee ulah bungong jeumpa

Meu-ek neutren meuteratak
Bungong meurak ngon seulanga
Bungong keupula ngon sitahon
Bungong yueng-yueng bungong ie mawo

Jroh that rupa bangon taeu
Keubiru seulanga dara
'Oh lheueh bangta neusok bungong
Bak nek inong nenyue bawa

Bangta wasiet bak nek inong
Nyoe bungong u kapai neuba
Kadang jibloe ureueng sinan
Sebab ban-ban baro teuka

Keunan neuba nek bungong nyoe
Keu putroe judo nanghuda
Meunyo galak teuntee geubloe
Han rogoe meuteumeung laba

Ponek seuot laju bagah
Insya Allah jueed ulon ba
Geucok bungong geupeureugi
U pasi laju geuhala

'Oh sare troh nek Keubayan
Ureueng pandang meuhei sigra
'Oh troh keunyan geuba bungong
Le that ureueng hate suka

Sebab rupa that meukeunong
Ureueng inong galak raya
Lethat jibloe bungong bak nek
Nyang cok sikrak ladom dua

Putroe kalon ureueng mubloe
Neukheun meunoe teuma sigra
Wahe nek ya nyang juhari
Pauw nyan neume dalam raga

Keunoe neuba wahe nek ti
Lon cuba ci kalon rupa
Ban neudeungo nek Keubayan
Seuot rijang yoh nyan raga

Ubak putroe neuba rijang
'Oh troh keunan penduek sigra
Nanghuda ngieng nek Keubayan
Jijak keunan pantah sigra

Tamong sajan nek Keubayan
Trok le rijang dalam kama
Putroe kalon jih ka keunan
Sikin yoh nyan le neuraba

Neumat sakin nibak jaroe
Keumeung tob droe putroe muda
Po nanghuda kalon bagoe
Teubiet jinoe pantah sigra

Bek he judo gata tob droe
Han lon peutoe po jroh rupa
Ubak ponek jikheun leugat
Beukayem that nek neuteuka

Neuba bungong nek beule that
Bungong nyang got keunoe neuba
Neuba he nek bungong keunoe
Keu cut putroe judo hamba

Po nek seuot laju bagah
Insya Allah jeued ulon ba
Singoh lusa jeued lon langkah
Jitob pantah pinto kama

Tinggai dua ngon nek inong
Geungieng bungong jroh that rupa
Wahe ponek ulon tanyong
Kheuen beukeunong he nek raja

Soe sok he nek dum bungong nyoe
Kheun bak kamoe wahe nek ya
Sangat indah lon eu bagoe
Buet nek sidroe nyoe keurija

Ngon soe neuduek di rumoh droe
Na lakoe atoe syedara
Peue na aneuk he nek badan
Inong agam ngon di gata

Nek Keubayan seuot meunoe
Ulon sidroe ngon lon hana
Hana aneuk hana lakoe
Lon he putroe han saboh na

Bungong nyoe cit buet jaroe droe
Laen han soe nyang keurija
Putroe tanyong meunoe lagee
Pane guree nek di gata

Ponek seuot laju teuntee
Hana guree soe nyang aja
Hana guree soe peurunoe
Cit ka jeued droe lam beasa

Putroe marit lom-sipatah
Babah' cidah sang sempala
Nek sok bungong jroh meureunek
Neutem he nek peurunoe hamba

Seuot ponek he putroe cut
Sang-sang han jeued bak lon kira
Han jeued putroe tameuguree
Mata reudee lon ka tuha

Han deuk lon eu that meubreng-breng
Ceurgeumen ka tuwo lon ba
Meunyo meunan he nek payong
Neujak lom singoh ngon lusa

Ponek seuot han peue salah
Meungna Allah keubah nyawa
Meungna umu jeued lon langkah
Cut meutuah lom bak gata

Neucok bungong uleh putroe
Ponek neuwoe laju gisa
Troh u rumoh ponek neuwoe
Tanyong meunoe uleh bangta

Got lagot nek bungong bunoe
Le ureueng bloé atawa hana
Ponek seuot laju neukheun
Lethat ureueng hate suka

Singoh beungoh jiyue me lom

Rame ureueng nyang gohlom na
Ban neudeungo haba meunan
Neukhem yoh nyan Mara Karma

Bangta neukheun teuma yoh nyan
Singoh kaman beule nek ba
Jeued ulon sok beujai leupah
Bek neugundah wahe nek ya

Yoh nyan neumoe nek Keubayan
Han meuban-ban ro ie mata
Peue seunaket nibak kamoe
Peugah jinoe wahe nek ya

Bangta tanyong teuma rijang
He nek badan pakon rugha
Peue seunaket nibak kamoe
Nyang jeued neumoe wahe nek ya

Kon seunaket wahe intan
Kon susahan lon keu gata
Hana sapeue aneuk badan
That lon sayang po bentara

Nyang jeued lon moe wahe intan
Lontuan ka leupah haba
'Oh troh bungong lon ba keunoe
Bak putroe judo nanghuda

Ban jikalon galak han soe
Ubak kamoe jipareksa
Soekeuh he nek sok bungong nyoe
Peugah jinoe ubak hamba

Ulon peugah buet jaroe droe
Laen han soe ngon lon hana
Teuma jiyue peurunoe droe
Ubak kamoe jiyue aja

Lon kheun mata seupot tuloe
Han jeued putroe peurunoe gata
Han deuh lon eu that meureubeueng

Ceureumen ka tuwo lon ba
Meunan lon kheun bak putroe cut
Lon peungeut judo nanghuda
Teuma jiyue me ceureumen
Putroe ingen meung beulanja
Pakri jalan lon peulheueh droe
Meuhan kamoe ka doseuta
Meunan neukheun nek Keubayan
Teukhem yoh nyan bangta muda
Bangta peugah teuma meunoe
Bekle neumoe wahe nek ya
Jeued lon peulheueh lalat hijo
Jijak laju sajan gata
Pat nyang jidong lalat hijo
Sinan laju neuboh bunga
Ban neudengo nek Keubayan
Hana lawan hate suka
Seunang hate hana bagoe
Singoh uroe jak pot bunga
Peunoh raga woe u rumoh
Kameh-kamoh ureueng tuha
Geujok laju bak cuco droe
Miseue baroe karang bunga
Geusok bongong meu-ek neutren
Ngon euncien geugampoh dua
Sajan bungong bangta seubee
Han jithee le ureueng dumna
Lom neupeugot saboh surat
Neukat sajan ngon bunga
Meunoe haba dalam surat
Jroh cakap marqeuh suara
Ngon Bismillah nama Tuhan
Pujoe bandum keu Rabbana

Seulaweuet ateueh bandum Nabi
Malam hari hana lupa
Saleuem seumbah lon keu putroe
Bak kamoe Mara Karma

Keu adekda surat lon bri
Nyang jroh budi putroe cahya
Lam kapai cahya Khairani
Saleuem lon angen bawa

Lon bri maklum deungon surat
Grak hadarat ka seujahtra
Gohлом mate bri hadarat
Mantong hayat dalam dunia

Seulamat lon dalam laot
Buet eungkot lon jibawa
Na bak rumoh ponek inong
Nyang ba bungong ubak gata

Meung tasayang putroe keu lon
Watee tatreng jak bak raja
'Oh neujak tueng le raja nanggroe
'Oh troh putroe u istana

'Oh troh keudeh tuan putroe
Jimaba woe le nanghuda
Bekle tawoe dalam kapai
Nyankeuh sagai lon peuhaba

Sireuta dengon takheun bacut
Tapeugah buet dilee masa
Tapeugah hai lakuan lon
Ubak Mayang judo bangta

Dan hai gata tapeugah cit
Bek tamarit di keue raja
Nyankeuh haba ulon wasiet
He putroe dhiet bek talupa

Lheueh geupeugot ka geulipat
Ka geuikat sapat ngon bunga

'Oh ka hase seukalian
Nek Keubayan seuot sigra
Ubak ponek neupeujaroe
Neukheun meunoe ulah bangta
Nyoe pat bungong neujak publoe
Keuputroe judo nanghuda
Keusoe laen bek neupubloe
Bungong nyoe cidah that rupa
Meunyo hana tuan putroe
Neupuwoe keunoe bak hamba
Ponek seuot insya Allah
Cuco indah ulon bawa
Ban nyang takheun dum tapeugah
Han lon ubah he meutia
Nek Keubayan neupeureugi
Troph u pasi laju neuba
Ban jikalon le putroe ti
Jimeuhei le wahe nek ya
Pakon lambat troh nek keunoe
Ka cot uroe baro teuka
Nek Keubayan seuot meunoe
Susah han soe teumpat hamba
Rumoh jioh ret meupalel
Yang jeued keutreb ulon teuka
Lom jitanyong ulah putroe
Janji baroe nek na neuba
Kaca mata neukheun baroe
Uroe nyoe peurunoe hamba
Ponek seuot hana tuwo
Kalon sigo buet nek tuha
Lam seulingkue jarom geusuot
Geujaruet ngon bulee mata
Geucok jarom deungon taloe
Mat u jaroe bungong jeumpa

Ban neukalon uleh putroe
Leumah gigoe khem tertawa
Sira teukhem neukheun meunoc
Utoh han soe nek sok bunga

Ceureumen nek lalat hijo
Hantom lon eu dilee nyang ka
Meunyo lalat jiteureubang
Mata nek trang miseue muda

Sangat areh buatan lalat
Bit utoh that hana tara
Meunan narit bungong keumbee
Meunyum malec ureueng tuha

Nek Keubayan jaweueb meunoe
Mata lon nyoe kureueng gura
Mata nek nyoe ka kureueng trang
Bak sok bungong ka beasa

Kon lon seutot lalat hijo
Lalat hantu pane teuka
Pane teuka lalat iblih
Lon eu han deuh deungon mata

Yoh nyan teukhen cut putroe ti
Narit sinde lom berkata
Cit beutoi that nek neupeugah
Lalat paleh pane teuka

Hana meupat jipo keunoe
Lalat nyoe jeuheut lagoe na
Meunyum malee nek Keubayan
Teuma lheueh nyan peugah haba

Geujok bungong saboh taloe
Buet jaroe Mara Karma
Geupeuleumah ubak putroe
Bungong baroe gata yue ba

Hana lon eh simalan beungoh
Nyokeuh gadoh lon usaha

Putroe sambot laju bagah
Sangat indah neu-eu rupa
Puteh kuneng burek-katek
Putroe tilek sama rata
Jeueb-jeueb ulah meuteuratak
Putroe galak hate suka
Jeueb-jeueb ulah putroe lihat
Ka geudapat euncien peurmata
Lom meuteumeung saboh surat
Neuploh lipat putroe baca
'Oh lheueh putroe baca surat
Yoh nyan leugat ro ie mata
Sang ka sapat deungon lakoe
Deungon judo droe Mara Karma
Nek Keubayan tanyong meunoe
Pakon tamoe putroe muda
Lon eu susah geunap uroe
Goh lom raghoe ngon nanghuda
Goh lom ramah deungon lakoe
Han siuroe sapat dua
Putroe teukhem leumah gigoe
Geukheun meunoe bak nek tuha
Broh lam bungong angen bapot
Ka jilob u dalam mata
Nyankeuh sebab ie mata rhet
Angen bapot broh lam mata
Teuma tanyong tuan putroe
Pat rumoh droe wahe nek ya
Neuba ulon bak uroe nyoe
Hajat kamoe meung pot bunga
Nek Keubayan jawueb meunoe
Gampong lon nyoe jioh raya
Han ek tajak wahe putroe
Rot meuduroe dalam rimba

Lagi susah di teungoh rot
Si meureubot le lagoe na
Meunyo tajak he putroe got
Gata jidrob jipoh nek ya

Nanghuda pi beungeh han ban
Geupoh laman hilang nyawa
Got bek tajak wahe intan
Kon ulon tham he meutia

Meunyo seunang teuma dudoe
Tuan putroe jeued ulon ba
Putroe tanyong teuma meunoe
Bungong nyoe padum hareuga

Bek tatanyong wahe putroe
Yum bungong nyoe boh le gata
Dum nyang suka tuan putroe
Nibak lon nyoe hana dakwa

Wahe nek bek neukheun meunan
Tiep-tiep barang na hareuga
Kamoe nyang bloe meukeusud kureueng
Nek nyang boh dum nyang suka

Nek neukheun hom he putroe hom
Nibak ulon tan hareuga
Putroe lisek lagi carong
Yum bungong neutu'oh hingga

Nek peugah lom he cut meulu
Boh yum laju uleh gata.
Lon ka tuha utak jidu
Kuto buku 'oh lon kira

Mata seupot han deuh lon eu
Adat suku sang rupia
Yoh nyan teukhem putroe areh
Lethat reunteh nek bak gata

Lon kheun meunoe neukheun meudeh
Utoh habeh balek haba

Meunyo meunan he nek kamoe
Bungong nyoe hana hareuga
Hana lon boh yum bungong nyoe
Sebab kamoe peng pi hana
'Oh na peng lon bayeue dudoe
Meung lhee uroe tanggol hamba
Nyoe pat ija nyang na sikrak
Ija sawak nyang got rupa
Nyankeuh nyang na he nek sikrak
Gantoe lon jak sajan gata
Meunyo mantong kapai sinoe
Geunap uroe nek neuteuka
Neuba bungong lom nyang got-got
Bek teumakot keu nanghuda
Putroe jok lom macam-macam
Makanan nyang lazat rasa
Beukayem nek keunoe datang
Keu lontuan bungong neuba
Teuma seuot nek Keubayan
Meung na Tuhan keubah nyawa
Meung na umu wahe intan
Keunoe rijang ulon teuka
Geunap uroe ulon datang
Meubek rintang sapeue mara
Neucok ija ponek neuwoe
Hana bagoe hate suka
Sebab ija sawak putroe
Haloh asoe jeuneh sutra
Ngon yum bungong nyang juhari
Siploh kali le yum ija
Sira geujak meunan pike
Hingga troh le u rumoh tangga
Troph u rumoh ponek neuwoe
Neupiyoh droe sikeutika

Bangta tanyong teuma meunoe
Pakon treb woe wahé nek ya
Nek peugah le bak samlakoe
Tuan putroe galak raya

Geulakee jak putroe keunoe
Lon peugah nyoe jioh tangga
Rot meuseuket peunyamon le
Bek putroe e tajak gata

Meunan lon kheun ubak putroe
Bek roh keunoe gob nyan teuka
Lon peulale hate putroe
Bek roh keunoe seutot hamba

Seubab teumpat ha meulagee
Jeued keumalee lon ngon gata
Nyankeuh sebab treb ulon woe
Lon tham putroe bek geuteuka

Meunan peugah nek Keubayan
Keulakuan putroe muda
Ubak bangta nek peugah ban
Nek Keubayan nyang calitra

Tuan putroe jroh peurawan
Gohlom rakan ngon nanghuda
Hana geantueng nyan suami
Cut putroe ti laen kama

'Oh troh jak nanghuda keunan
Putroe seudang ro ie mata
Geucok sakin keumeung tob droe
Nanghuda woe le jak gisa

Meunan sabe geunap uroe
Nek peugah proe hai nanghuda
Ban neudeungo hab meunan
Teukhem yoh nyan Mara Karma

Teuma nek jok ija bunoe
Neupeu jaroe ubak bangta

Nyoe pat ija cut putroe bri
Yum bungong si geutem jeumpa
Bangta kalon ija cut ti
Meuhambo le ngon ie mata
Han ek saba dalam hate
Bangta eh le atueh keuta
Sinan neu-eh neulungkop droe
Hate rangoe dalam dada
Ponek tanyong he samlakoe
Pakon tamoe duka cita
Neugalak keu cut putroe ti
Istri teungku nanghuda
Meunyo galak keu cut bungong
Jeued lon tanyong he aneukda
Seuot bangta neukheun meunoe
Kon ulon moe he nek raja
Broh lam ija lon geureutok
Jimasok u dalam mata
Meunan neukheun ubak nek droe
Teutap 'oh noe siat haba
Puteh-puteh bungong jambee
Nyang mangat bee bungong jeumpa
Bangta nyang eh teuduek dilee
Lon peuteuntee nyoe keu raja
Puspa Indra raja doli
Neuhei wazir deungan perdana
Teubiet jinoe dum u pasi
Jak tueng Siti judo nanghuda
Peutamong keunoe u dalam
Jak eu peukan putroe muda
Ban jideungo sabda meunan
Teubiet yoh nyan jijak sigra
Troh u pasi seukalian
Kayoh sampan ubak bahtra

Geudayong bak kapai bunoe
Hingga sampoe keunan sigra
Nanghuda kheun bak sidadu
Yue ek laju jarnee teuka

Putroe kalon ureueng that le
Teubiet laju lam kurongnya
Geupeuteubiet ranub bate
Geupajoh le dum geurata

'Oh lheueh ranub seukalian
Peugah saleuem raja Puspa
Seumbah takzim raja doli
Yue keumari jak tueng gata

Bandua ngon cut putroe ti
Yue keumbali u istana
Nanghuda kheun han peue salah
Ban nyang titah nibak raja

Tuan putroe ngui peukayan
Gleueng ngon subang euncien permata
'Oh lheueh meungui dum peukayan
That analan taeu rupa

Miseue buleuen nyang sangat trang
Miseue bintang malam jula
Cahya Khairani that rupawan
Nanghuda nyang galak raya

'Oh lheueh meungui bungong meulu
Neutren laju kapai raya
Tren lam kapai ek lam jalo
Kayoh laju u kuala

Tren lam jalo teungoh u darat
Dumna rakyat peumeulia
Aneuk dara seudang-seudang
Jijak eumpeueng putroe muda

Taeu jidong dum meuseupeh
Jroh meubareh teupat banja

Neu-ek ateueh gajah puteh
Geuba keudeh u istana

Rakyat ireng di beulakang
Rame han ban agam dara
Hingga sampie troh u dalam
Putroe Mayang kalon rupa

Ban neukalon jroh analan
Indah han ban peumeulia
Teuma neukheun haba meunoe
Tamong keunoe he keukanda

Cut Khairani ceuot pantah
Insya Allah he adikda
Manda Ratna meuhei putroe
Peurab keunoe he meutia

Putroe peurab meumat jaroe
Geujok dudoe puan meucintra
Pajoh ranub wahe putroe
Nibak kamoe nyoekeuh nyang na

Insya Allah he ma putroe
Nibak lon nyoe that mulia
Cok le ranub pajoh rijang
Putroe seudang lale mata

Sabe neungieng putroe Mayang
Neupandang han puweh mata
Na sikeujab putroe pandang
Laju meubram ro ie mata

Manda Ratna tanyong meunoe
Pakon tamoe bijeh mata
'Oh tapandang putroe Mayang
Pakon meunan ro ie mata

Peue seunaket nibak Siti
Tapeugah kri he meutia
Seuot putroe Cahya Khairani
Sabet umi ulon duka

Kon seunaket he bunda droe
Nyang jeued kamoe that bercinta
'Oh lon pandang atueh putroe
Ulon sidroe ro ie mata

Han ubah ban judo kamoe
Sang-sang adoe lon eu rupa
Neutanyong le na judo droe
He putroe cuba calitra

Teuma peugah cut Khairani
Neurawi bak asai mula
Masa jicok le gogasi
Neurawi sampoe lam bahtra

Habeh neukheun awai ngon akhe
Jigule lam laot raya
Putroe Mayang seungkak pike
Laju ile lom ie mata

Yoh nyan geuwa takue putroe
Geukheun meunoe he teumuda
That meusampe neupeutimang
Teungku abang neupeulara

Abang kamoe jroh neudidek
Dilon han ek balah guna
Tuhan sidroe nyang ek balah
Nyang ka payah neuusaha

Putroe Mayang nyang meutuah
Peunoh limpah ro ie mata
Bukon sayang teungku abang
Jibuang lam laot raya

Payah mantong lon neudukong
Jeueb-jeueb huteuen ulon neuba
Han meusapat le ngon kamoe
Jeueb-jeueb ngangroe gob enaya

Patkeuh jinoe teungku abang
Lon meupandang sikleb mata

Lheueh neukheun nyan putroe intan
Reubah pingsan hanle haba
Bak masa nyan laju pingsan
Ureueng pandang hate duka
Jijak laju yoh nyan pantah
Bak daulat syah bangta muda
Jikheun putroe pingsan reubah
He daulat syah neujak gisa
Ban neudeungo haba waki
Mangindan Sari neuwoe lanja

'Oh troh neuwoe Mangindan Sari
Ulee Siti neumueng sigra
Cok iemawo laju geuboh
Bangta sampooh nibak muka
Yoh nyan jaga puteh leusoh
Hana teudoh geumoe pula
Po teuraja pika keunan
Tanyong yoh nyan pakon rugha
Pakon tamoe he buleuen trang
Peugah rijang he meutia
Jeued sidumnoe sampie pingsan
Peue susahan duka cita
Meunan sabda raia nanggroe
Seuot putroe nyang jroh rupa
Asai mula dua putroe
Neuharutoe ubak raja

Lheueh neupeugah dum sinaroe
Raja nanggroe lom meusabda
Raja tanyong ubak putroe
Tahareutoe he meutia
Judo gata na disinoe
Lam nanggroe nyoe Mara Karma
Seuot putroe daulat ampon
Euncien bak lon geubri tanda

Yoh lam kapai mantong ulon
Nyoer kiriman ubak hamba
Putroe Mayang kalon euncien
Leubeh yakin keu kakanda

Sabet beuna tuanku droe
Euncien kamoe bak syedara
Yoh lon bungka tinggai nanggroe
Euncien nyoe neubri le bunda

Lheueh neupeugah uleh putroe
Raja nanggroe neumeusabda
Raja pangge wazir meuntroe
Troph le sampie keunan teuka

Himpon rakyat dum sinaroe
Jeueb-jeueb nanggroe beutroh sigra
Beuhabeh bandum tapanggil
Besar kecil tua muda

Phon lam banda sampie u gle
Bek tinggai le duson rimba
Bek tatinggai pi meung saboh
Dum tauroh keunoe teuka

Bujang-bujang yoh nyan beudoh
Jijak uroh jeueb-jeueb banda
Perdana jak dalam nanggroe
Bak jaroe mong-mong teumaga

Jipeh mong-mong jikheun meunoe
He kawom droe tuha muda
Teubiet jinoe jak u mideuen
Raja yue kheun ubak gata

Bek na tinggai dalam gampong
Beuta usong nyang hana pha
Nyang buta tayue me tungkat
Tahue leugat uleh gata

Tajak laju bekle lambat
Ubak daulat Puspa Indra

Nyang lepe tame ngon usong
Nyang puntong tungkat tayue ba
Nyang capiek pi beutroh jitren
Taseuon nyang tuha-tuha
Meunan jikheun sira peh gong
Banda duson jiseureuta

Bak masa nyan rakyat jitren
Meuron-ron han ek takira
Capiek buta habeh jitren
Meuhimpon u mideuen raja

Hajat raja meung khanduri
Tueng putroe ti judo nanghuda
Phon di gle sampoe u pasi
Tan beureunti rakyat teuka

Suka hate dum sinaroe
Jak eu putroe nyang jroh rupa
Nyang teungoh jak rame han soe
Nyang ka sampoe han ek kira

Rakyat jitren miseue hujeuen
Han lot mideuen kuta raja
Lua dalam peunoh ureueng
Miseue naleueng rakyat teuka

Po teuraja yoh nyan neukheun
Bak cut buleuen putroe cahya
Wahe putroe tren u mideuen
Ngieng cut buleuen judo gata

Cuba kalon lam kawan nyoe
Nyang toh lakoe nyak digata
Saleh cit na kadang sinoe
Kheun bak kamoe laju sigra

'Oh lheueh sabda nibak doli
Cut putroe ti jak pareksa
Cut putroe Cahya Khirani
Ngieng suami lam kawan bha

Habeh neungieng kanan kiri
Po juhari neu-eu hana
Yoh nyan neujak cut putroe ti
Ubak doli peugah hana

Daulat ampon payong nanggroe
Gohlom keunoe bangta muda
Mantong tinggai dalam nanggroe
Gohlom sampoe keunoe teuka

Meunan narit cut putroe ti
Raja sudi bak perdana
Raja tanyong ubak waki
Habeh ile rakyat dumna

Na tinggai mantong di nanggroe
Hana keunoe lom troh teuka
Waki seuot angkat jaroe
Habeh nanggroe ulon bungka

Capiek luka habeh jitren
Banda duson troh lam rimba
Nyang na tinggai dalam gampong
Sidroe ureueng cit nek tuha

Ponek peugah han ek geujak
Batok isak dalam dada
Gob nyan sidroe nyang hana jak
Sebab isak kureueng hana

Sabda raja beukit meunan
Jak tueng nek nyan keunoe taba
Ban jideungo sabda meunan
Jijak yoh nyan bak nek tuha

'Oh troh bak nek jihareutoe
Neujak jinoe suroh raja
Ponek deungo meunan bagoe
Leungo asoe miseue geumpa

Saleh keupeue neuyue pangge
Meunan pike ureueng tuha

Teumakot that hana lagee
Geucok bajee tinggai ija
'Oh sare troh geusujud le
Dalam hate that geumeunta
Teumakot that nek Keubayan
Sangka waham peue-peue bala

Raja tanyong teuma laju
Hoka cuco hana neuba
Ponek seuot teuma laju
Daulat tuanku raja hamba

Han ek jijak tuanku droe
Saket asoe bangta muda
Teuka ciret ka lhee uroe
Leumoh asoe hana daya

Jeueb-jeueb urat sang-sang putoh
Sinan teu eh dalam tika
Nyankeuh seubab jih hana troh
Tuanku beh keunoe teuka

Suroh raja jak me usong
Karayueng keunoe kabawa
Meunan sabda bak tuanku
Beudoh laju dua tiga

Jiba usong deungon kaso
Jiba laju u rumoh nek ya
Lam gle paroe meusu himbee
Di cong kayee leuek jikuwa

Ureueng yang jak teiduek dilee
Laen lagee ayat lon ba
Meureudu ngon keude Pangwa
Lampoh saka rab ngon Sigli

AMMA BAKDU he syedara
Meugisa bak banta juhari
Mara Karma nyang analan
Neiduek sinan bak rumoh ni

'Oh ban leupah nek Keubayan
Panggilan bak raja doli
Bangta beudoh cok malakat
Nyang jroh that keumala sakti

Cok keumeunyan ka neuhasap
Malakat yoh nyan menjadi
Lheueh neuhasap nyan keumala
Peuet ploh guda ka meuriti

Taloe keukang meuh suasa
Peulana intan meuhuke
Saboh guda sidroe ureueng
Lhee ploh sikureueng tari-tari

Muda-muda seudang-seudang
'Oh tapandang hana neuri
Hana saho leubeh kureueng
Teudong di leuen that juhari

Guda puteh bulee soebroe
Intan pudoe krang-kring bunyi
Hana saho leubeh kureueng
Teudong dileuen that juhari

Guda puteh peureuseh han ban
Nyang analan hana sakri
'Oh ka cukop seuleungkapan
Nek Keubayan troh kembali

Ngon perdana nyang me usong
Dalam keubon geutamong le
Nek Keubayan ban neukalon
Ka teuceungong teukab bibi

Neungieng ureueng muda-muda
Peuet ploh guda sama rani
Hantom neu-eu dilee nyang ka
Pane teuka troh keumari

Ho berjalan dumna guda
Aneuk raja pane negeri

Dalam hate hana meu'oh
U rumoh laju neutiti
'Oh sare troh ek u rumoh
Neu-eu mehmoh bangta ahli
Ka cukop deungon peukayan
Meudram-dram ngon bee kasturi
Sang-sang taeu aneuk Indra
Meublet-blet cahya miseue hari
Ban neukalon dum lakuan
Nek Keubayan com di gaki
Sireuta deungon geukheun meunoe
Sira geumoe su meu'i-'i
Wahe bangta cuco kamoe
Gata jinoe suruh doli
Ureueng ka troh suruh raja
Jak tueng gata bintang pari
Sabab lon kheun saket gata
Ka troh teuka ngon keurus
Nek Keubayan meunan neukheun
Ka teusinyom bangta ahli
Bangta neukheun he nek kamoe
Neuyue jak woe dumna waki
Neukheun ulon masok khaluet
Troh peuet ploh peuet malam hari
Ka lheueh sumpah ngon jen rimba
U lua han sagai jibri
Meung lon teubiet troh u lua
Dumna guda jikab kami
Han troh lon jak ubak raja
Buet guda deungon jen pari
Meung ka troh hat ba^k tanggoh droe
Ulon sampoe ubak doli
Meunan he nek jak hareutoe
Ubak meuntroe deungan waki

Ban neudeungo meunan haba
Bak perdana neupeugah kri
Geuyue jak woe ban sineuna
Ban nyang sabda bintang pari
'Oh leupah woe peusuroh raja
Bangta muda kheun bak nek ti
Tinggai gata he nek badan
Lon berjalan ubak doli

Meunyo hana sapeue rintang
Keunoe rijang lon keumbali
Tajak aneuk beuseulamat
Beuta ingat ulon ini

Lon ka tuha puteh leumat
Saket mangat soe peudoli
Bek taboh-boh ureueng tuha
Sajan taba ho peureugi

Sira geumoe meunan haba
Ureueng tuha that weueh hate
Bangta muda yoh nyan peugah
Bek neugundah wahe nek ti

Meung na umu neubri le Allah
Han lon keubah nek juhari
Ho nyang long jak nek jeunulang
Lon ba sajan nek sendiri

Ban neudeungo meunan haba
Ureueng tuha mangat hate
Lakee izin bangta muda
Ateueh guda neulumpat le

Neumat keukang neupoh lawa
That perkasa hana sakri
Deungon rakan bandum sama
Sajan bangta kanan kiri

Ban peuet ploh droe that perkasa
Ateueh guda sama rani

Guda lumpat laju tajo
Troh bak pinto raja doli
Rakyat kalon bandum tahe
Pane linto tren keumari
Aneuk raja pane teumpat
Baroekon pat geuberhenti
Deungon rupa sangat hebat
Tahe rakyat teukab bibi
Ngon peukayan bandum sasa
Ngon rupa pi tari-tari
Saleh cit nyan aneuk Indra
Pasang guda sama rani
Nyang toh cuco nek Keubayan
Ladom meunan jitanyong le
Taeu rupa bandum saban
Ngon peukayan that juhari
Sabab sama-sama taeu rupa
Toh nyang raja toh nyang waki
Raja kalon hireuen raya
Aneuk raja pane neugri
Neupeutamong dalam kuta
Duek meubanja bak keurusi
'Oh lheueh piyoh jamee teuka
Tanyong raja bak Khairani
Lam kawan nyoe wahe putroe
Kalon keudroe toh suami
Cuba beudoh tamat jaroe
Nyang judo droe nak lon turj
Yoh nyan beudoh bungong kundo
Jak ngieng judo cut putroe ti
Ban geukalon teungku linto
Putroe tajo com di gaki
Bangta sambot laju sigra
Putroe cahya moe meu'i-'i

Wahe teungku judo payong
Neutinggai lon susah hate
Bak lon sangka hanle untong
Teungku ampon sang hana le

Adat mate teungku sidroe
Ulon tob droe bek hudep le
Meunan jikheun sinyak putroe
Sira jimoe su meu'i-i

Teuma seuot po samlakoe
Bek le tamoe bintang pari
Bek le tamoe bintang kala
Ulon duka susah hate

Khendak Tuhan po Nyang Esa
Tuah gata troh keumari
Janji Tuhan lon ngon gata
Meuhan cit laju mate

Buet nyang kalheueh bek meuteuoh
Bek tarawoh on kayee gle
Meunyo tamoe he putroe jroh
Ulon gadoh bek taeu le

Putroe deungo narit bangta
Teumakot ka dalam hate
Seungab putroe bungong tajok
Hanle dawok cut Khairani

Nyang na mantong meusok-meusok
Duek teuseupok bak keurusi
Dalam kama putroe Mayang
Cut abang geujingeuk sabe

Keudeh keunoe geujak pandang
Teungku abang gohlom meuri
Geumeung pandang sikleb mata
Sebab cinta dalam hate

Jeh 'oh cre lam huteuen
Deunong aduen han dapat le

Nyankeuh susah putroe meugleueng
Teuma neukheun leuh umi

Saba dilee wahe putroe
Jeued ngon kamoe tapeureugi
Eнтreuk tajak he sambinoe
Ngieng aduen droe nyang juhari

Bek dilee tapeususah droe
'Oh seungoe tajak ngon umi
Ban neudeungo narit ibu
Putroe laju duek teupike

Sabet beuna han kheun ibu
Bek jeued karu susah hate
Bangta duek dua ngon judo
Ureueng tahe keunan sabe

Jieu rupa jroh siuko
Teungku linto ngon putroe ti
Sabe uko ban dua blah
Hana tiwah meung sipade

Hana saho leubeh kureueng
Meunan jikheun rakyat sare
Raja kalon hate suka
Tanyong haba mula jadi

Neupeugah le uleh bangta
Asai mula hingga akhe
Masa jitiek u dalam krueng
Meusareueng bak saboh pante

Ka neupeugah yoh nyan bandum
Neubri maklum ubak doli
Lom jitulak dalam laot
Ji'uet le eungkot troh rumoh Ni

Habeh bandum neuhareutoe
Raja nanggroe that weueh hate
Rhet ie mata dum meataloe
Neukheun meunoe uleh doli

Payah mantong lon yue mita
Dalam rimba jeub lungkiek gle
Habeh jijak jeub beulaka
Seutot gata he boh hate

Tan meuteumeung dengon gata
He meutia that meusampe
Nyoekueh baro lon eu rupa
Mantong nyawa Tuhan neubri

Teungoh-teungoh pengah haba
Trok le teuka Mangindan Sari
Meumat jaroe deungon bangta
Pameulia jroh han sakri

Geumeucom-com geumeuwa-wa
Ngon ie mata laju ile
Soe-soe nyang na sinan lingka
Habeh rata moe meu'i-'i

Raja-raja huleebalang
Bandum sayang that weueh hate
Lheueh nibak nyan beudoh raja
Peiduek bangta bak keurusi

Si rot uneun meukuta nanggroe
aneuk droe di siblah kiri
Di uneun nyan rakan bangta
Duek meubanja bak keurusi

Lheueh meuhato sikalian
Putroe Mayang geuyue pangge
Deungon bunda teubiet rijang
Dum dendayang ireng cut ti

'Oh ban sare meuhandapan
Meumat tangan com di gaki
Sira geumoe putroe Mayang
Bak abang geulungkop diri

Mantong umu teungku abang
Ka meulang-lang jeueb-jeueb neugri

He keukanda that meusampe
Tuhan peucré deungon kami
Macam-macam putroe meuca-e
Han ek kheun le wahe akhi
Cit ka maklum beuranggasoe
Sebkeuh 'ohnoe ulon rawi
Geupeuduek le putroe Mayang
Siblah kanan cut Khairani
Manda Ratna di geunireng
Laen ireng siblah kiri
Po teuraja neutanyong lom
Hai lakukan bangta ahli
Saket mangat jeueb-jeueb nanggroe
Ngon putroe Cahya Khairani
Bangta peugah dum sinaroe
Habel dumpeue lom neurawi
Ureueng duson nyang poh bangta
Neupeuhaba ubak doli
Ka jireupah lom keumala
Jitiek bangta troh u pasi
Ban neudeungo uleh raja
Hanco rasa dalam hate
Raja tanyong laju sigra
Wahe bangta na taturi
Na tatusoe ureueng duson
Cuba kalon bintang pari
Na disinoe aneuk bajeueng
Cuba takheun ubak kami
Seuot bangta laju rijang
Han lupaan wahe doli
Jeh nyang duek bak jambo geundrang
Nyankeuh ureueng nyang teumaki
Ban neudeungo uleh raja
Yue drob sigra si abeudi

Jiba laju ubak bangta
Badan geumpa jeueb-jeueb seundi
Jicok yoh nyan ngon keumala
Wahe raja ampon neubri

Nyoe|le peue pat barang gata
Bek neuseksa hamba ini
Lheueh jipulang nyan malakat
Jih geukat jaroe gaki

Sabab bangta jiboh taloe
Dalam sungoe jipeuile
Nyan balasan Tuhan sidroe
Keujih meuwoe bala neubri

Lheueh geukat ureueng duson
Bangta kalon jurumudi
Ngon nanghuda pina sinan
Bangta tanyong haba takwi

Pajan keunoe lem nanghuda
Deungon raja na roh wali
Jiseuot le gohлом lama
Keunoe teuka dua hari

Hoka putroe hana taba
Nyang tacinta malam hari
Ban jideungo meunan haba
Ka geunta jaroe ngon gaki

Teumakot that keubuet nyang ka
Takot geudra hana lheueh le
Bak jipike hanle daya
Ka troh masa sampie janji

Jimita rot jikeumeung plueng
Mita reuweueng keumeung lari
Ban neukalon uleh raja
Dalam dada ka teupike

Pakon meunan haba bangta
Ngon nanghuda hana meukri

Raja pike na peukara
Bangta muda na jitaki

Saboh buet ngon ureueng duson
Saboh kawom taloe wali
Saboh wareh ngon ureueng nyan
Buet jih saban ngon pancuri

Raja kalon bak nanghuda
Mirah muka hana meukri
Neukalon ka lenglot mata
Neutupeue ka uleh doli

Raja neukheun bak lasyka
Drob nanghuda ba keumari
Peusapat ngon ureueng duson
Jih nyan kawom saboh wali

Jak ba laju aneuk bajeueng
Kagantung bak teupi pante
Lheueuh perintah nibak raja
Jidrob sigra le sipa-i

Ka jiikat sapat dua
Laju jiba hana lanti
Keudeh jiba laju u krueng
Jigantung ban suroh doli

Kakeuh mate dua ureueng
Akai bajeueng buet teumaki
Sabab buet that keujeuhatan
Nyan balasan Tuhan neubri

Sinan mate jih geurajam
Khendak Tuhan ka troh janji
Lheueuh geugantung ureueng dua
Nanghuda gantoe le doli

Ka neubadai uleh raja
Keu nanghuda jurumudi
Sebab jroh akai bicara
Nibak raja pangkat tinggi

Lheueh neugantoe uleh raja
Kapai bungka laen neugri
Teiduek 'oh nan keu nanghuda
Po teuraja lonpeugah kri

Raja peugah ubak bangta
Adekda kana suami
Kalheueh kawen putroe Mayang
Ngon aneuk lon Mangindan Sari

Na rela bak gata intan
Tapeugah ban ubak kami
Meunyo cit han beutapeugah
Harap maaf siploh kali

Bangta deungo meunan ulah
Peunoh limpah ie mata ile
Bangta jawueb laju sigra
He meukuta tanglong neugri

Pakon meunan neumeuhaba
Nibak hamba sang han meukri
Peue lom nyang ka neubri judo
Adat neuyue jak meurabe

Yue peu-ek ie kayee jiplah
Rela leupah nibak kami
Adat konna tuanku sayang
Dalam huteuen jih ka mate

Tinggai-bangke dalam huteuen
Jimakeuen le binatang gle
Peue lom nyang ka jeued keu putroe
Lam meuligoe tuan Siti

Nibak ulon seunang han soe
Tuhan sidroe balah budi
Tuhan sidroe balah guna
Bak lon hamba han ek lon bri

Meunan narit nibak bangta
Po teuraja seunang hate

Lom neutanyong le Khalifah
He mumirah bintang pari

Ulon tanyong beuta peugah
Soe nan ayah deungon umi
Peue nan gampong deungon kuta
Aneukda soe nan geurasi

Soe nan putroe judo gata
Wahe bangta tapeugah kri
Soe nyang beunci dua gata
Dalam rimba jijak bumi

Peugah ban buet bek duseuta
Soe boh gata lam rimba gle
Lheueh neutanyong uleh raja
Cut bangta ie mata ile

Ka teupike dalam dada
Pakri daya lon peugah kri
Meung kupeugah nyang sibeuna
Takot teuma ubah janji

Neupeugah droe aneuk raja
Neupeucaya uleh doli
Takot dodox ka meutuka
Konle raja dodox neugri

Kadang cit ka jatoh papa
Jeueb rimba mita rezeuki
Singoh malee lon ngon raja
Peuna-peuna peugah diri

Lheueh teupike meunan macam
Peuseumbahan jaweueb neubri
Ampon tuanku cahi alam
Ulon tuan tan keutahui

Han lon tusoe boh lam huteuen
Dua ulon ngon adek ti
Sabab ulon ureueng hina that
Miyub pangkat hana tinggi

Kon bangsa lon huleebalang
Meulaenkan ureueng han meukri
Nyankeuh sabab lon jibuang
Untong sayang nibak doli

Meunan neukheun uleh bangta
Rhet ie mata raja neugri
Nibak takue neuwa bangta
Bek duseuta bintang pari

Tapeugah haba nyang beuna
He bangta keu mangat hate
Bangta kalon neumoe raja
Neupeugah le nyang sibeuna

Daulat ampon cahi alam
Patek laman nan geurasi
Maha raja Mara Karma
Adekda Nila Kasomi

Tuan putroe nyang ulon ba
Bernama Cahya Khairani
Nan ayah Indra Angkasa
Nama bunda Ratna Dewi

Nanggroe kamoe jioh raya
Nama banda Puspa Sari
Nyang jeued geuboh lon lam huteuen
Sebab jikheun hana bagi

Jitipee le ahli nujum
Jibri maklum ubak abi
Jikheun paleh hana tuah
Fitnah bak laen neugri

Di nanggroe Antah Beurantah
Jifitnah ubak abi
Indra Dewa nyang peugah nyan
Raja sinan laen neugri

Nyang jeued geuboh ulontuan
Dua sajan ngon adek ti

Awai akhe neupeugah ban
Soe deungaran moe meu'i-i

Ban neudeungo uleh raja
Ngon ie mata laju ile
Yoh nyan raja neumeusabda
He peurdana meuntroe wazir
Himpon rakyat balantandra
Ngon seunjata dum beuhase
Bahle taprang Indra Dewa
That cilaka raja 'asi

Ban neudeungo sabda raja
Bangta muda jaweueb neubri
Ampon tuanku meuribee-ribbee
Saba dilee bek beurangkari

Uroe malam neumeulakee
Nyan sitree þeu-ek neuungki
Meung na umu khendak Tuhan
Ulon lawan raja kafe

Jinoe nyang he meukuta
Bah tasaba lhee peuet hari
Meung ka reumbang bak kutika
Lon bri haba ubak doli

'Oh ka lon prang raja asee
Keunoe teuntee haba lon bri
Meunan narit bungong keumee
Di panghulee seunang hate

Seungab raja hanle haba
That geumbira dalam hate
Sabab putroe deungon bangta
Aneuk raja pangkat tinggi

Ka raja tueng keumeulintee
Han malee bak aneuk neugri
Umu teungoh muda seudang
Rupa sang-sang budiadari

Cut Khairani pithat suka
Sebab bangta rupa tari
Dan lagi pangkat sultan
Han tiwasan dalam neubri

Habeh haba bangta muda
Po teuraja meung khanduri
Geupeusunteng bangta muda
Siti Cahya ngon suami

Sie ngon lomo dua lhee ploh
Rakyat pajoh 'alem paki
'Oh habeh nyan laen ka troh
Subra riyoh hana sakri

Makeueun minom meuseusuka
Rakyat teuka malam hari
Tujoeh uroe tujoeh malam
Peujamuan rumoh doli

Sireuta deungon dum pehasan
Tambo geundrang suleng bangsi
Dumna rakyat bersukaan
Sultan hate beureuhi

Sangat rame uroe malam
Tet meuriam deungon beude
Tujoeh uroe tujoeh malam
Pehasan yoh nya beureungi

Ka seungab gong hanle geundrang
Subra kiam hanle 'a-'i
Yoh nyan rakyat maseng gisa
Woe u tangga bak isteri

Seungoe mideuen deungon kuta
Mara Karma teumpat geubri
Neubri teumpat uleh raja
Pumeulia hana sakri

Neubri teumpat jroh pandangan
Taman meunidam nan geurasi

Nyankeuh teumpat that analan
Teutap sinan bangta ahli

Deungon putroe nyang budiman
Geukheun nan Cahya Kharani
Bangta jak tueng nek Keubayan
Neuba sajan duek ngon cut ti

Mara Karma teutap sinan
Bersukaan deungon isteri
Padumna treb teutap sinan
Teuingat yoh nyan Puspa Sari

Teuingat bunda di nanggroe
Bandua droe deungon abi
Kadang pakri ka meupaloe
Jeued teugoe-goe bangta ahli

Bangta neutren jak bak adoe
Khendak jak woe sawue umi
'Oh troh bangta dalam meuligoe
Ngieng le adoe neumeuhei le

He keukanda neu-ek keunoe
Ubak kamoe nyang adek ti
Mara Karma neu-ek pantah
Putroe indah duek seundiri

Mangindan Sari cit ka leupah
Jak ziarah ma ngon abi
Bangta neujak got kutika
Jak meuhaba ngon adek ti

Hana sidroe manusia
Peugah haba seunang hate
Khendak peugah uleh bangta
Hajat bungka saweue umi

Nila Kasom tanyong sigra
He keukanda jinoe pakri
Pajan tawoe he keukanda
Saweue bunda deungon abi

Bangta seuot laju pantah
Insya Allah takeumbali
Nyankeuh hajat lon meung peugah
Musyawarah ngon adek ti

Hajat ulon keunoe teuka
Nibak gata izin tabri
Bahle ulon dilee gisa
Tinggai gata bek peureugi

Got bek dilee tawoe gata
Jeued seungsara bak lon pike
Meunyo sigo tawoe dua
Lethat tandra dum peureugi

Cit han geubri uleh raja
Meungkon taba dum·sipa-i
'Oh troh keudeh kon ban nyang ka
Kon le raja du di neugri

Kadang ayah kon le raja
Ka papa kadang he nyak ti
Jeued keumalee lon ngon gata
Deungon raja nyang di sini

Sabab ulon deungon gata
Meungaku ka deungon doli
Lon peugah droe bak meukuta
Aneuk raja Puspa Sari

Kadang singoh kon ban haba
Malee raya hana meukri
Jikheun haba peuna-peuna
Nak mulia bek geutadi

Nyang jeued lon woe jak pareksa
Pakri ban ka ma ngon abi
'Oh troh keudeh lheueh lon kalon
Lon riwang lom bak adek ti

Ban neudeungo Nila Kasom
Sabet ban kheun abang ini

Meunyo meunan he keundada
Ban kheun gata rela kami
Pajan teuma jadeh gisa
Kheun bak hamba nyang adek ti
Seuot bangta singoh uroe
Tinggai adoe beujroh budi
Bumangat su geunap uroe
Ngon judo droe Mangindan Sari
Bek sagai tabri seunaket
Bungong ruseb beujroh budi
Bek meututo narit nyang phet
Bak bri saket hate suami
Got ngon raja got ngon putroe
Got beurangsoe aneuk neugri
Beuta gaseh dum sinaroe
Narit seungkoe bek tabri-bri
Bek troh dam-dam hate saket
Nyankeuh wasiet nibak kami
Beurangpeue buet bek meubantah
Bek peuleumah saket hate
Adat saket dalam dada
Bak muka bek leumah meuri
Geunap uroe bek talupa
Teumuda Cahya Khirani
Tameugot-got he adekda
Sayang gata judo kami
Sabab jih aneuk piatu
Han meupat du deungon umi
Adat pi na deungon du
Hantom jieu treb that ka cre
Putroe Nila seuot meunoe
Sira neumoe su meu'i-i
Bek kheun meunan he abang droe
Sayang kamoe that keu cut ti

Digob nyan cre deungon bunda

Jipeulara le gogasi

Di geutanyoe ureueng geuboh

Han soe teuh lam rimba gle

Alah citna gob tem sayang

Adat han kadang citka mate

Hana ek lon balah guna

Teumuda Cahya Khairani

Adat kon gob nyan nyang peulara

Han meuho ka abang kami

Cut han meuho tunong baroh

Pajan troh bertemu lagi

Insya Allah ulon patoh

Ban nyang suroh abang kami

Nila Kasom meunan haba

Bangta muda neukeumbali

Lakee izin bak syedara

Jak bak raja tanglong neugri

Ban sare troh bangta keunan

Meumat tangan deungon doli

Na siat ka jibet puan

Ranub sajan meukoh tangke

Pajoh ranub na sigapu

Lheueh nyan laju neupeugah le

Daulat ampon he tuanku

Hajat nafsu patek ini

Hajat siat woe u gampong

Lon jak kunjong ma ngon abi

Saleh mantong na di gampong

Kadang untong cit ka mate

Raja tanyong pajan tawoe

Kheun bak kamoe boh hate

Seuot bangta singoh uroe

Ulon woe dua lhee hari

Raja neukheun tapreh siat
Lon krah rakyat meuntroe wazir
Lon yue himpon bandum rakyat
Jijak intat bintang pari
Seuot bangta teuma leugat
Han peue rakyat wahe doli
Lon woe sidroe dilee siat
Jak kalon rot jalan ile
Ulon jak eu jalan teupat
Bek jeued sisat lam rimba gle
Adat meunan tajak siat
Taba rakyat bek sendiri
Adat han le meulimong droe
Kadang peue-peue lan rimba gle
Mangindan Sari pikheun meunan
Bek he cutbang jak sendiri
Kahan neuba le ngon rakan
Ulon tuan jak beusare
Mara Karma seuot sigra
He adekda bek weueh hate
Ulon jak nyoe he adek beh
Kalon rot-ueh nyang tan durj
Meung ka meuho teupat jalan
Ulon riwang cit keunoe le
Lon tueng gata teuma dudoe
Putroe-putroe bandum sare
Lheueh neupeugah sikeulian
Meumat tangan woe keumbali
Bangta neuwoe taman meunidam
Hingga malam laju hari
Habeh malam teuka suboh
Bangta beudoh ngon putroe ti
Lakee izin bak putroe jroh
Bangta beudoh woe bak umi

Tinggai gata wahe putroe
Ulon jinoe siat ka cre
Lon jak saweue bunda kamoe
Ibunda droe deungon abi
Saleh mantong hudep jinoe
Kadang cit nyoe ka lheueh mate
Cut Khairani seuot meunoe
Ulon sinoe susah hate
Bek neukeubah ulon sinoe
Ba sajan droe ampon doli
Bangta seuot teuma leugat
Lon woe siat bintang pari
Lon jak kalon jalan teupat
Bek sisat tanyoe dalam gle
Bek tagundah he judo droe
Rijang keunoe lon kembali
Lom neuseuot tuan putroe
Neuba kamoe wahe doli
Teungku neujak hanle neuwoe
Tinggai kamoe mangat hate
Bangta muda lom neujawueub
Tinggai pocut bek peureugi
Deumi Allah wahe pocut
Kon lon peungeut gata nyak ti
Lom putroe kheun haba meunoe
Beusajan droe lon peureugi
Beuthat singoh neuwoe keunoe
Neuba kamoe wahe doli
Ho nyang neujak ulon neuba
He meukuta judo kami
He putroe bek tajak gata
Dalam rimba huteuen duri
Meunyo hana jalan teupat
Tanyoe sisat lam rimba gle

He judo beuranggapeue bala
Ulon rela beuthat mate

Bek sidroe teungku neubungka
Mate gata ho troh kami
He putroe nyang mubahgia
Allah Taala Maha Ghani

Meung mate lon dalam rimba
Keugata hikmah lon bri
Nyoe pat euncien meuh keumala
Kue bak ija bintang pari

Cahya hu peungeuh lam kuta
Tanda hamba he putroe ti
Meunyo mantong umu hamba
Nyoe keumala cahya meuble

Meunyo mate lon lam rimba
Hilang cahya euncien ini
Ban neudeungo uleh putroe
Seungab neumoe hanle 'a-'i

'Oh izin nibak putroe
Bangta sidro neupeureugi
Neupeuteupat ret lam huteuen
Troph sibuleuen jak ngon gaki

Teuka sisat bungong seumpueng
Dalam huteuen neujak sabe
Han meuho le tunong baroh
Bangta bloh lam duroe awe

Uroe malam neujak sunggoh
Bu neupajoh hana tom le
Padum lawet sabe meunan
Rimba Tuhan hanle meuri

Sabab ka treb neusang abrang
Bangta seudang meunoe pike
Meunyo meunoe lon meurawoh
Han meujan troh u Puspa Sari

Han meupat rot sangat jioh
Meuhat han troh lon kembali
Bangta neumat le keumala
Neupet bangta bintang pari

Bangta kasad dalam dada
teubleut mata troh u neugri
Puspa Sari ka troh sampoe
Neu-eu nanggroe hanle meuri

Hana ureueng le meung sidroe
Yoh nyan neumoe bintang pari
Ngon ie mata ro meureb-reb
Ayah lon bit ho peureugi

Saleh citna mantong hudep
Saleh ka treb gob nyan mate
Yoh nyan neumoe bangta muda
Lakee do'a ubak Rabbi

Ya Allah wahidu l-qahar
Peutroh pinta hamba ini
Beureukat Makah ngon Madinah
Beureukat Ka'bah teumpat suci

Beureukat intu Nabi Adam
Neubri pham kheun lam hate
Meunyo mantong ayah kamoe
Lam donya nyoe goh lom mate

Bumeurumpok deungon kamoe
Bandua droe ma ngon abi
Adat mate ya Tuhanku
Neubri lon eu kubu abi

Neubri meurumpok deungon kubu
Ya Tuhanku du ngon umi
Lheueh meudo 'a bangta muda
Bak muka neurahob jari

Bangta sampoh ngon ie mata
Beudoh sigra n̄eupeureugi

Jak seutot ayah ngon bunda
Saleh citna lam huteuen gle

Teungoh bangta jak lam rimba
Berjumpa ureueng sinan le
Ngon peukayan ruya-rayoe
Bak jaroë parang ngon baci

Bangta tilek atueh rupa
Nepareksa neukalon hi
Ka neuturi ayah bunda
Lam rimba mita rezeuki

Koh rangkileh reulek duroe
Jak publoe keu kayee api
'Oh hat glah keu breueh sicupak
Sipeng tapak bloe eungkot tri

Dalam huteuen ka meurumpok
Neungieng layak ka neuturi
Ban neukalon uleh bangta
Ngon ie mata laju ile

Bangta peurab laju keunan
Horeumat tangan neusujud le
Ureueng dua tanyong yoh nyan
Pajan datang bintang pari

Pane gampong keunoe teuka
Ho tahala peue tacari
Bangta seuot ngon ie mata
Paleng muka bek leumah ri

Ulon jak nyoe peusurohan
Nibak sultan raja doli
Suroh raja Puspa Indra
Peulinggam Cahya nama neugri

Geuyue jak bak Indra Diwa
Surat haba geuyue jak me
Meunan neukheun bangta muda
Ureueng dua tanyong laju

Peue meukeusud kirem surat
Raja daulat jioh neugri
Bangta seuot ha lon tupeue
Nibak kamoe tan neukehun kri
Teungoh-teungoh peugah haba
Tanyong bunda he juhari
Bak tajak-jak dalam rimba
Na berjumpa ngon aneuk kamoe
Aneuk lon jijak dua droe
Aduen adoe didalam gle
Adoe ubit mantong sidroe
Nan geupakoe Nila Kasomi
Nyang aduen Mara Karma
Dalam rimba jipeureugi
Yoh nyan seuot bangta muda
Wahe poma deungo kami
Ho neuyue jak jih dua droe
Peue meupaloe dalam neugri
Seuot ayah geukheun meunoe
Suroh kamoe yue peureugi
Sebab phon keunong fitnah
Jipeugah aneuk tan bagi
That cilaka nujum peugah
Han jeued langkah bak khanduri
Han mee tetroh dalam kuta
Indra Diwa nyang peugah kri
Nyankeuh sabab ulon yue jak
Sabab utak tan jipike
Nibak Tuhan ka meunan grak
Neupeujarak aneuk kami
Sabab ulon salah raya
Han jan kira buet beurang kri
Ulon pateh gob peusuna
Jinoe teuma teulah sabe

Habeh bandum geucalitra
Diphon mula hingga akhe
Bangta ueungo ro ie mata
Paleng muka bek leumah ri
Meunyo meunan he panghulee
Masa dilee raja neugri

Jinoe tukang koh-koh kayee
Meubajee hana le meukri
Sabet beuna he meutuah
Buet ka leupah peue lom kheun kri
Beurangpeue buet nyang ka leupah
Tapeu gajah han riwang le
Nyoekueh dilon Tuhan balah
Dalam susah teulah sabe

Bangta tanyong lom sipatah
Ubak ayah deungon umi
Padumna treb ka jibungka
Aneuk dua lam rimba gle

Geupeugah le laju sigra
He meutia deungo lon rawi
Lhee uroe leupah di gampong
Nanggroe tutong habeh reule

'Oh nan keuhat cre di mideuen
Adoe aduen saleh hanle
Meung na hudep aneuk hamba
Deungon gata umu sabe

Umu santeuet bak lon kira
Ruman pisa lon kalon hi
Teuma seuot bangta muda
Wahe poima deungon abi

Tan meurumpok deungon hamba
Aneuk dua lam rimba gle
Nyang na meurumpok nibak raja
Deungon mayet ureueng mate

Sidroe agam sidroe dara
Aneuk mata nyang hana le
Sinan teutiek dalam rimba
Aneuk mata ka jicungke

Ban geudeungo meunan haba
Bandua that seudeh hate
Maken leubeh geumoe rugha
Bandua keumeung jak eu le

Yoh nyan geukheun he aneuk jroh
Ulon saboh han sakon le
Ka meulang-lang han saho troh
Beuna inseueh bungong pade

Kamoe dua taba siat
Nibak teumpat ureueng mate
Kadang cit nyan aneuk jasad
Mangat sapat ulon mate

Sira kheun nyan ro ie mata
Seuot teuma bangta ahli
Bek neumoe le wahe poma
Dalam rimba bek peureugi

Kon aneuk droe mayet bangka
Ureueng tuha hanle gigoe
Kulet keundo gigoe teulhoh
Han le saboh tinggai gusi

Ok ka puteh lagee gapeueh
Han le meu'oh takalon gli
Ban geudeungo haba bangta
Bandua han le peureugi

Geumoe mantong bacut-bacut
Hingga seupot laju hari
Teuma tanyong bangta muda
Wahe poma jinoe pakri

Jinoe pika seupot uroe
Ulon sidroe ho peureugi

Meung na gaseh deungon sayang
Neupeujampang malam ini
Geuseuot le bagah-bagah
Insya Allah bintang pari
Meung na gaseh he meutuah
Tameulangkah bak teumpat kami
Keu makanan peue nyang mudah
Boh birah ngon boh keuladi
Ureueng dua galak leupah
Puwoe bagah po juhari
'Oh ban sare troh u rangkang
Bangta seudang neupiyoh le
Teuma geubri le makanan
Peue mudahan boh kayee gle
Boh birah ngon boh keupila
Laen pina boh keumili
Teuma geukheun ubak bangta
Makeuen sigra nyoe khanduri
Tabeue masen bek takira
Nyankeuh nyang na nibak kami
Yoh nyan seuot bangta muda
Ngon ie mata geusampoh le
Meung nyoe pina nibak poma
Adat hana soe keumeung bri
Nyang baroe kon lon puasa
Lapar dahaga lam rimba gle
Bu hantom na ie han meupat
Timu barat han meuho le
Dalam huteuen padum lawet
Dalam laot ie raya me
Padum buleuen dalam laot
Mantong hayat Tuhan neubri
Yoh nyan tanyong dua ureueng
Peue reuen-mareuen bintang pari

Peue buet tajak dalam huteuen
Pane ureueng nyang that beunci
Kon gob beunci wahe poma
Lon jak tapa jueub-jeueb neugri

Dalam laot padum masa
Dalam rimba padum kali
Peue meukeusud tajak tapa
Dumnan lama lam rimba gle

Peue meuteumeng deungon raja
Indra Diwa nyang that tinggi
Panyang laju peugah haba
Bangta muda han ek theun le

Neukalon hai ayah bunda
Ngon ie mata laju ile
Neuploh bungkoh nyang bangta ba
Neucok ija sutra puji

Dua kudoe neujok ija
Nam rupia neujok tali
Nyoekeuh nyang na nibak kamoe
Neujak meubloe he poma ti

Neujak meubloe bahan makanan
Neubloe asam sira capli
Ceusambot le hate seunang
U peukan singoh geujak le

Geujak meubloe peue nyang patot
Geubloe eungkot sira capli
Lheueh nibak nyan laju geuwoe
U rumoh drue geukembali

Troh u rumoh geutaguen bu
Bri keu teungku bangta ahli
'Oh lheueh makeuen dum makanan
Marit yoh nyan bintang pari

Wahe poma na peue hajat
Tulong siat kalon ini

Hajat ulon khendak meupa
Neujak mita wangi-wangi
Neutob reumpah jinoe sigra
Hajat hamba jinoe mandi
Ban geudeungo haba bangta
Laju sigra geupeuhase

'Oh ka hase dum sibarang
Marit yoh nyan bintang pari
Meung ka cukop sikeulian
Neucok pinggan lon meung mandi

Ban geudeungo mangat hate
Geubeudoh le hana lanti
Geupeuteupat u teupin sungoe
Geujak manoe ngon bintang pari

Cut bangta jak bacut-bacut
Dilikot ayah ngon umi
Troh sikhan ret bangta peugah
Rugoe leupah ulon ini

Neujak poma droeneuh dua
U muka di likot kami
Sabab ulon jinoe siat
Pajoh ubat tieb-tieb hari

Meunyo jijak gob di likot
Cit roh meu'uet ulon mate
Ban geudeungo haba meu'uet
Ka teumakot hana sakri

Geutakot that mate bangta
Geujak lanja dua sare
Tajo laju jak u muka
Bandua ayah ngon umi

Sira geukheun wahe bangta
Ulon kira pantang han le
'Oh sare troh ubak sungoe
Geumanoe bak bineh pante

Geucok reumpah geumeuupa

Geurah ija geupeusuci

'Oh sare lheueh geupeuupa

Beudoh sigra woe keumbali

Troh u rumoh uree sinja

Meucahya bintang meuriti

Meutabu bintang di langet

Meublet-blet cahya u bumi

Ladom rayek ladom seudang

Buleuen pitrang cahya meuri

Hamba Allah that sukaan

Peungeueh alam donya ini

Angen jipot dirui mangat

Sang meukeumat jeueb-jeueb seundi

Angen jipot dirui mangat

Lazat nikmat hana sakri

Mara Karma,puteh lumat

Duek meusapat bunda abi

Bangta neudek peugah haba

Sabab mata teungeut han le

Geukalon le ateueh bangta

Ureueng dua that weueh hate

Rupa indah hana tara

Hana bangsa dalam neugri

Adat mantong aneuk hamba

Deungon bangta han ubah hi

Sira geumoe peugah haba

Ro ie mata tan beureunti

Yoh nyan seuot bangta muda

Wahe poma lon tanyong kri

Adat mantong nyan aneukda

Pakri rupa na neuturi

Seuot laju ureueng dua

Hom hai bangta saleh pakri

'Oh lon tilek nibak rupa
Deungon gata sang-sang meuhi
Sabab dilee yoh jibungka
Cit bandua mantong kecil
Jinoe pakri saleh rupa
Ka treb lama deungon kami
Sira peugah sira geumoe
That bak bunoe lom weueh hate
Teuma geukheun sira geumoe
Taba kamoe bintang pari
Ho nyang tajak jinoe gata
Kamoe dua bek sinoe le
Jeuet tayue buet kamoe dua
Soe rah ija 'oh tamandi
Soe peu-ek ie ngon plah kayee
Taniet asee droh-droh babi
Meuhan taba dua kamoe
Dalam sungoe tatiek bangke
Lheueh nyan tajak ho nyang suka
He cut bangta bintang pari
Adat hudep hana guna
Hate luka tiep-tiep hari
Tiep-tiep uroe hate ngeureb
Nibak hudep bahle mate
Ureueng dua meunan narit
Bu ngong grieb-grieb han ek theun le
Seungkak nafah dalam dada
Sayang bunda deungon abi
Teuma neukheun uleh bangta
Wahe bunda deungon abi
Bek keuh ulon nyang ceulaka
He ayahanda nyang tan bagi
Nvang neumeung poh yoh saboh roe
Nyoe katroh woe lon jak mate

Sabab rindu lon keu gata
Dalam rimba han ek theun le
Ulon sisat keudeh keunoe
Nibak meunoe bahle mate

Mangat neupohjinoe leugat
Nyankueuh hajat lon keumbali
Bekle susah jeueb-jeueb nanggroe
Mangat jinoe neukoh lihe

Mangat mate lon he ayah
Bek neukeubah biek pancuri
Meunan neukheun bangta muda
Ngon ie mata rhet u bumi

Ban geudeungo meunan haba
Bandua reubah meugule
Hana haba reubah pingsan
Tajo yoh nyan bintang pari

Cok ie mawo ka neusiram
Puleh pingsan ayah umi
'Oh ban jaga bandua droe
Mantong geumoe su meu'i-i

Sira geumoe geumeung seumbah
Aneuk lidah nibak gaki
Ban neukalon uleh bangta
Neumat sigra jaroe umi

Sira neukheun laju meunoe
Bak uroe nyoe lon ka mate
Hana mate keunong fitnah
Keunong seumbah meuhat mate

Ban geudeungo meunan haba
Bandua han geusujud le
Tapeumeuah he aneukda
Dosa bapa deungan umi

Sabab akai lon that singkat
ka sisat setan peurabe

Gata tawoe intan payong
Nila Kasom ho peureugi

Hana lagoe sajan gata
Ho syedara bintang pari
Bangta seuot teuma meunoe
Deungo kamoe wahe abi

Nila Kasom han lon bri woe
Bahle kamoe dilee peureugi
Jih lon keubah di Peulinggam
Bak makam nanggroe suami

Geutanyong lom soe peukawen
Puteh licen judo soe bri
Teuma peugah le aneukda
Ngon raja Mangindan Sari

Habeh bandum neupeuhaba
Phon bak mula hingga akhe
Ban neudeungo le ayahanda
Hana reuda geumoe sabe

Neupeuampon dumna dosa
Kamoe dua ka teukeuse
Meuhan ampon nibak gata
Laen hana soe sayang le

Bangta seuot laju sigra
Ampon dosa nibak Rabbi
Nibak ulon hana dosa
Bandua ayah ngon umi

Sinan he du lakee ampon
Nibak ulon tan dosa le
Nyang neulakee ampon dosa
Bak Rabbana malam hari

Meunan narit bungong sukon
Lheueh nyan neutren po juhari
Lheueh neupeugah bak ayahanda
Teubiet bangta u lua neugri

'Oh sare troh u binch rimba
Cok keumala mat di jari
Lheueh neuhasap ngon keumeunyan
Mohon yoh nyan ubak Rabbi

Ya Tuhanku po dikamoe
Peutroh jinoe pinta kami
Ngon meutuah keumala nyoe
Neubri nagngroe beumeunjadi

Ban nyang dilee meunan jinoe
Pinta kamoe he ya Rabbi
Lheueh meudo'a rahob jaroe
Teuma neumoe bintang pari

'Oh lheueh do'a bangta muda
Huteuen rimba han meuho le
Gadob huteuen teudong kuta
Leubeh raya meuploh kali

Leubeh raya nibak dilee
Kuta batee Puspa Sari
Ngon angkatan meuploh ribee
Meuploh sukee dum sipa-i

Ngon meuriam dum meuhato
Sidadu le han ek kheun kri
Dum pahlawan beuhe-beuhe
Bajee hijo tari-tari

Deungon beude dum jigulam
Pahlawan gagah beurani
Tujoh lapeh kuta dalam
Maknikam intan ngon pudi

Meuligoe jroh meuteurapan
Peungeueh alam cahya meuri
Kuta lua kuta dalam
Lhee ploh macam ka meuriti

Keurusu meuh dum meuhato
Meulabo ngon bee kasturi

Soe nyang kalon hireuen tahe
Ureueng nyang le teuhing gigi
Lom ngon bungong jroh meubanja
Ban seulingka kuta neugri
Wie ngon uneuen 'oh tapandang
Siulahan syeureuga tinggi
Lom meuriam saboh sagoe
Meusu keudroe tan beureunti
Ngon pupanji meuploh bagoe
Tanda ka woe bintang pari
Meusu tambo deungon geundrang
Ngon su gambang seurune kale
Angen jipot bacut-bacut
Dirui mangat jeueb-jeueb seundi
Nyan alamat keusukaan
Sultan Yuhan keumbali
Jeued keu raja lam meuligoe
Ureueng nanggroe dum jiile
Tujoh uroe meuseusuka
Duek bak tahta raja doli
Makeuen minom uroe malam
Bersukaan bandum sare
Baginda Indra Angkasa
Bandua that suka hate
Galak hate hireuen mata
Karunia Tuhanku Rabbi
Ngon meutuah nyan aneukda
Teudong kuta jroh meuriti
'Oh ka sampoe tujoh malam
Sultan neumeukhanduri
Geusie lumo dum meuploh-ploh
Rakyat pajoh alem paki
Lheueh nyan raja salen rakyat
Ban nyang adat meuntroe wazi

'Oh lheueh salen bandum rata
Bangta muda neumarit le
Neupeugah bak ayah bunda
Aneukda jinoe peureugi

Beule doa droe nyan dua
Ulon bungka jak eu Siti
Izin keu lon he ayahanda
Beule doa malam hari

Izin bak lon cahya mata
Beu seujahtra Tuhan neubri
Raja pandang atueh rakyat
Yue jak intat bintang pari

Bangta kalon raja pandang
Neukheun yoh nyan bak syah doli
Bek dilee neuhimpon rakyat
Ulon hajat jak seundiri

Lon jak sidroe na meukeusud
Masok khaluet peuet ploh hari
Raja nanggroe hale haba
Aneukda laju meuhase

Ban neudeungo uleh bunda
Perdana laju neupangge
Tajak intat bangta muda
Nyoe hidang tame keu doli

Ban neudeungo uleh bangta
Ubak bunda neusujud le
Wahe bunda ma panghulee
Bek dilee kirem khanduri

Sabab ulon kheun ubak raja
Lon bungka han troh keumari
Meunyo neungieng na kireman
Geukheun ulon ubah janji

Ka sulet lon deungan sultan
Nyang jeued lon tham wahe umi

Ban geudeungo haba meunan
Geukheun yoh nyan bek tame le
Lakee izin yoh nyan leugat
Neubeurangkat bintang pari
Bunda neukheun putik langsat
Beurijang that takeumbali

Tajak aneuk beuseulamat
Beu jioh lakan Tuhan neubri
Beuphet kulet asoe mangat
Beu taingat akan umi

Neujak intat le ayahanda
Lom sireuta meuntroe wazi
'Oh sare troh u lua kuta
Marit bangta neupeugah le

Wahe ayah deungon bunda
Tinggai gata siat ka cre
Inbat-ingbat wahe ayah
Ubak Allah taubat sabé

Geutanyoe akan meuteumee
Deungon sitree raja kaphe
Di gob rakyat le meukatoe
Di geutanyoe pat tapangge

Meulaenkan bak Tuhan sidroe
Tapeugah droe malam hari
Meunan narit bangta muda
Seuot raja tulong Rabbi

Lon meulakee uroe malam
Ubak Tuhan Rabbul Qade
Yoh nyan raja com aneukda
Beu seujahtera he boh hate

Beu rijang troh keunoe tawoe
Bek meupaloe Tuhan neubri
Yoh nyan bangta meumat jaroe
Bandua droe ayah umi

Huleebalang bandum rata
Cut bangta sujud bak gaki
Lakee meuah ubak bangta
Lheueh nyan sigra neupeureugi

Tamong huteuen teubiet rimba
Neujak lanja malam hari
'Oh ban leupah bangta bungka
Po teuraja woe keumbali

Padum uroe lheueh nibak nyan
Rakyat yoh nyan lom neupangge
Neuyue peh gong deungon canang
Yue peh geundrang boh pupanji

U dalam gle tajak rijang
Tapreh bintang jikeumbali
Lhee uroe jak dalam huteuen
Sinan bandum tabeureunti

Ban jideungo uleh rakyat
Jicok alat jibungka le
Lhee uroe jak sinan piyoh
'Oh nan jioh dum si pa-i

Ureueng nyang preh siat teudoh
Ulon ratoh bangta ahli
Bungong rom ngon bungong riwat
Meusapat ngon bungong rihan

AMMA BAKDU ngo beucakap
Nyoe hikayat leen macam
Bahle meunoe siat ayat
Kadang manat keudeungaran

Muwoe kisah bangta daulat
Beurangkat lam rimba Tuhan
Padum lawet neujak lam gle
Gohlom sampe u Peulinggam

Puspa Indra raja ade
Neuyue pangge huleebalang

Yue peuhase ngon seunjata
Khendak bungka seutot bintang
'Oh sare troh bala tandra
Meuhadap ka ngon sultan
Musyawarah di meuligoe
Pakon treb woe aneuk badan

Pakri pike dum geutanyoe
Nyang got jinoe taberjalan
Tajak seutot dalam rimba
Kadang sit ka sisat jalan

Teungoh-teungoh peugah haba
Surak subra lua dalam
Jikheun bangta ka troh gisa
Geutanyoe ka hate seunang

Ban geudeungo meunan haba
Jak u lua uleebalang
Jireng le raja-raja
Balatandra seukalian

Mangindan Sari hate suka
Jak u lua jak tueng abang
Neubri saleueum peumeulia
U istana neuek rijang

Raja tanyong bak samlakoe
Pakon keunoe treb neuriwang
Seuot bangta tuanku droe
Lon meupaloe dalam hutan

Ulon sisat jeueb-jeueb sawak
Han meurumpok deungon jalan
Ulon sinoe seuot raja
Hate goga uroe malam

Lon preh-preh troh gata gisa
Himpon tandra seukalian
Hajat singoh keumeung bungka
Sabab gata tan meuriwang

Teuma seuot bangta muda
He meukuta cahi alam
Lon meulakee ubak Allah
Beumeusiblah bala datang

Lheueh nibak nyan bangta indah
Ubak zaujah neuwoe rijang
Lekee izin nibak raja
Neugisa u taman meunidam

Cahya Khairani hate suka
Neungieng bangta ka meuriwang
Putroe beudoh peumeulia
Bungong jeumpa that sukaan

Leupah neuwoe bangta muda
Kasom Nila seutot rijang
Deungon judo neujak dua
Jak berjumpa dengan abang

Jireng le aneuk dara
Muda-muda dum dendayang
Ban neukalon uleh bangta
He adekda keunoe rijang

Nyoe baro troh ulon' gisa
Bak gata hanalon datang
Sabab leumoh gaki jaroe
Nyang jeued lon woe keunoe rijang

Teuma neu-ek tuan putroe
Ngon judo droe sajan-sajan
Neudong le rab sinan laju
Deungon teungku bangta seudang

Na sikeujab ka jibet bu
Keu tuanku dalam hidang
'Oh lheueh bangta neupajoh bu
Ngon cut meulu makeuen sajan

Pinah hidang dikeue teungku
Ka troh laju jibet puan

Deungon pineung jroh meulason
Ranub meuon jroh meukarang
'Oh lheueh ranub bungong sukon
Nyan baro phon buka kalam
He adekda jak meuhase
Hana treb le taberjalan

Tawoe siat ubak umi
Suntok sabe lam dukaan
Suntok masa sabe neumoe
Preh geutanyoc troh tariwang

Lam bercinta geunap uroe
Teugoe-goe keu aneuk badan
Insya Allah he keukanda
Meubek teuka sapeue rintang

Watee tawoe ubak bunda
Cit bek taba nek Keubayan
Sabab gob nyan ureueng tuha
Han kuasa bak beurjalan

Ponek deungo meunan haba
Geumoe sigra geukheun nyoe ban
Meuhan neuba ulon sidroe
Bahle jinoe nyawong hilang

Neupoh mate lon he putroe
Teuma dudoe neuberjalan
Seuot bangta sira teukhem
Neupaleng bak nek Keubayan

Bekle neumoe he nek hamba
Jimeuseunda adek badan
Jimeuayang pura-pura
Jeued ulon ba nek jeunulang

Meunan neukheuen bangta ahli
Seunang hate nek Keubayan
Ponek teukhem leumah gusi
Mangindan Sari kheun lom yoh nyan

Wahe ponek nyang got jinoe
Mita lakoe neumeukawan
Adat saket nek lam ranto
Na soe bubo nek jigulam

Nek Keubayan seuot meunoe
Neubri lakoe cit sukaan
Teutapi bek nyang ka tuha
Nyang muda mantong peurawan

Nyang sa rupa ngon meukuta
Supaya teuga jigulam
Ban geudeungo nek meuhaba
Khem meubura dum sibarang

Teuma neukheun lom le bangta
Bak nek tuha haba wayang
Meunyo meunan he nek teungku
Deungo lon ato saboh padan

Neusok bungong mirah hijo
Neusado ngon bungong peukan
Neujampu ngon bungong meurak
Mangat galak ureueng agam

Sabab nek utoh deungon bijak
Teuntee galak jitem rijang
Meung ka lheueh nek neumeunikah
Neuba pantah ho beurjalan

Ban geudeungo bangta peugah
Khem meuhah-hah nek Keubayan
Ka teuingat dilee masa
Nek bawa bungong meukarang

Dum dendayang putroe muda
Khem teutawa jikheun nyoe ban
Mita bungong kaman pantah
Nek nyang cidak sinoe tukang

Hana payah tabri upah
Ngon meutuah nek Keubayan

Ponek seuot laju pantah
Peue tapeugah putroe intan

Adat hana nek seuleuah
Na nyang Cidah Siti tukang
Ban buet jaroe bangta muda
Keunoe taba bungong rijang

Geudeungo buet jaroe bangta
Maken gura khem hana ban
Yoh nyan bandum khem teutawa
That geumbira beursukaan

Teuma beudoh Kasom Nila
Jok ija keu nek Keubayan
Bri siseun tren bajee ija
Keu nek tuha peursalenan

Nek neusambot hate suka
Lagi ija pi got ragam
Lheueh nibak nyan Kasom Nila
Peurab sigra bak cut abang

Lakee izin bak keukanda
Teuma gisa putroe seudang
Putroe neuwoe u istana
Bandua ngon judo badan

Yoh nyan putroe neumeuhase
Bakai neume 'oh beurjalan
Dum peukara cukop hase
Ubak doli neujak rijang

Ban sare troh u istana
Geukheun teuma meunoe macam
Mara Karma pika teuka
Ubak raja cahi alam

Peu-ek seumbah ubak raja
Patek hamba khendak jalan
Putroe Nila lon jak puwoe
Ayah kamoe rindu deundam

Sabab manyak cre di mata
Lam bercinta uroe molam
Harap izin po meukuta
Ulon bungka meung lhee malam

Seuot raja nyang khalifah
Insya Allah wahe intan
Izin bak lon he meutuah
Bunda ayah tajak julang

Lheueh nibak nyan po teuraja
Perdana neupangge rijang
Teubiet jinoe jak u lua
Sigo taba deungon alam

Tapeuteubiet dum beuhabeh
Hijo puteh mirah hitam
Tajak jinoe tuha muda
Intat bangta bungong peukan

Ban geudeungo suroh raja
Teubiet sigra dum sibarang
Jipeuteubiet dum pupanji
Jipeunari payong hitam

Mangkong gaca na dua boh
Hu seumeulhoh lua dalam
Meutatah intan dengon pudoe
Ban peuet sagoe geuboh pualam

Puspa ragam ban silingka
Laaen teuma dum maknikam
Meuriti deungon peurmata
Keumala panca warnaan

Keu alamat bangta bungka
Mangkong gaca jroh hana ban
Cahya indah soe ngieng hireuen
Ban buleuen jilingka awan

'Oh ka hase dumpeue leungkap
Jiba leugat le dendayang

Jipeu-ek meulapeh-lapeh
Hijo puteh mirah hitam

Ban riyeuek musem keunong sa
Meulumba-lumba hana pirang
Miseue gamba lam beseukop
Leumah siat lheueh nyan hilang

Meunan rakyat jak meusaf-saf
Rame leupah dum beurjalan
Dengon alat cukup rata
Raja-raja huleebalang

Teuduek siat 'oh nan haba
Laen banja lon peuriwang
Ragam laen lon peugisa
He syedara deungo beutrang

Di timu na bintang takat
Di barat na bintang kala
AMMA BAKDU peugot siat
Ujong ayat ulon tuka

Meunyo sot-sot ujung ayat
Kureueng mangat bak lon kira
Lagi pilom karab tamat
Beuseulamat teungku baca

Mara Karma ngon isteri
Cut Khairani nyang jroh rupa
Nila Kasom ngon suami
Mangindan sari aneuk raja

Dua bangta dua putri
Jak mohon diri bak meukuta
Lakee izin ban sinaroe
Hajat jinoe keumeung bungka

Lafaz izin ka geukheun jeued
Geucom ban peuet uleh raja
Sira neumoe raja daulat
Neukheun leugat he meutia

Tajak aneuk beu meusapat
Bek siat jarak ngon gata
Beu Tuhan bri sampoe hajat
Troh bak teumpat ayah bunda

Mangindan Sari aneuk lidah
Pat nyang salah beu taaja
Sabab jih nyan aneuk meutuah
Han tom leupah laen banda

Sajan ulon hana tom cre
Han jituri rugoe laba
Tabeue masen masam keu-eueng
Aneuk ulon goh jirasa

Saket mangat tan jitu'oh
He intan jroh beu tajaga
Lom lon wasiet aneuk badan
Peue na rintang tabri haba

Peue-peue na buet keusalahan
Beu tapeusan lon ayahanda
Jaweueb bangta insya Allah
Ban nyang titah po meukuta

Meung na umu Tuhan keubah
Meung bek Allah neubri lupa
Beudoh putroe teuma dudoe
Geucom ma droe deungon bapa

Neubri izin he ma keu lon
Neupeuampon barang dosa
Umi seuot izin kamoe
Geucom bak dhoe ngon ie mata

Tajak aneuk beu meusaho
Beu troh tawoe ubak bunda
Putroe seuot laju meunoe
Beu bek sapeue teuka mara

Beu na izin ma keu kamoe
Bak uroe nyoe ulon bungka

Adat mate han troh lon woe
Keu kamoe doa neupinta
Meuah bak lon he boh hate
Akan umi bek talupa
Peue lakuan intan payong
Ta tinggai lon tajak gata
Ngon soe jinoe lon meupakat
Aneuk jasad cre di mata
Beu meutuah bintang pari
Beu Tuhan bri troh ban pinta
Putroe dua pika teumoe
Geudeungo nyoe tuto bunda
Wahe poma lon jak siat
Han treb lambat ulon gisa
Meung na umu Tuhan keubah
Insya Allah han lon lupa
Leupah bungka bintang pari
Raja doli dong bak jeundila
Neukalon aneuk beurangkat
Jiintat le balatandra
Putroe dua jroh sipadan
Geutamong lam mangkong gaca
Seureuta deungan dendayang
Nyang gasehan putroe muda
Saboh gaca cut Khairani
Saboh lagi Kasom Nila
Nek Keubayan pi geutamong
Ngon cut bungong putroe Cahya
'Oh ka hase si leungkapan
Rakyat yoh nyan pasang guda
Ateuah guda dum geupasang
Yoh nyan geundrang meusuara
Alamat raja beurangkat
Geutot nubat ngon boh lila

Meutum beude meuble kilaṭ
Dumna rakyat hate suka
Ngon pupanji jroh meuhato
Ban peuraho lam laot raya

Puteh kuneng hijo biru
Rakyat tahe kalon rupa
Ulee kawan raja Rom Syah
Nyang peuleumah jalan raya

Nyang jeued gob nyan di hadapan
Sabab gob nyan ureueng tuha
Lagi areh that analan
That geutuban dum peukara

Sangat utoh lagi meugah
Lom ngon gagah that perkasa
Pangkat tinggi raja Rom Syah
Beuhe gagah han sabe sa

Lom ngon sakti han soe teuntang
Di dalam prang guna biasa
Puplueng guda miseue kilat
Han soe dapat Rom Syah tuha

Geupasang guda peulanggi
Samarani jroh that rupa
Peulana meuh meujeureulang
Taloe keukang meupermata

Meutatah ratna mutu maknikam
Dengon alam panca warna
Nyang jak di keue sangat girang
Huleebalang dum di lingka

Rakyat ireng seukalian
Guda kandran meuploh laksa
Di likot nyang raja pari
Ka meuriti deungon tandra

Peulana meuh guda puteh
Hu seumelhoh meublet-blet cahya

Ngon pupanji han peue peugah
Hijo mirah hitam pina

Jak meusaf-saf dum meukawan
Rakyat ireng siseun lingka

Ngon su beude hana macam
Su meuriam seun-seun dua

Di likot nyan lom berjalan
Keureudan saboh raja

Geupasang guda teureubang
Ngon alam cahya permata

Geutot beude dalam kawan
Sang meuguncang alam donya

Ngon pupanji bandum sare
Meuhuke meurak diwangga

Padum lawet geujak sabe
Troh dalam gle balatandra

Saboh teumpat indah sangat
Tahe lazat soe ngieng rupa

Ie krueng ile bacut-bacut
Angen jipot sang syeureuga

Ie jeureungeh sang ceureumen
Mata ingen hate suka

Rakyat piyoh bak teumpat nyan
Sekalian jak meuupa

Geupoh kachuk saloe ale
Cut putroe geuphuk-phuk ija

'Oh lheueh manoe seukalian
Jak meusalen tuha muda

Lheueh meusalen sileungkapan
Bri keu rakan peue-peue nyang na

Rasa lazat dum peunajoh
Mangat tuboh hate suka

Peugah haba peue-peue nyang roh
Meungeureupoh wayang seunda

Putroe kalon bungong le that
Bee pi mangat miseue jeumpa
Nek Keubayan neuhei leugat
Keunoe siat he nak hamba

Le that bungong lon eu sinoe
Bungong nyoe indah that rupa
Bak sok bungong nek peurunoe
Sabab lamoe hate suka

Nek Keubayan khem meusilee
Sang-sang malee bak ri rupa
Lom putroe kheun nek panghulee
Bek malee peurunoe hamba

Hoka lalat nyang that raghoe
Cuba jinoe yue sok bunga
Mangindan Sari seuot meunoe
Han le jinoe lalat nek ya

Lalat hijo ka jiboh droe
Bak nek nyoe han le jigisa
Sabab umpeuen han tom geubri
Dan lagi doa han tom na

Bak rupa nek tan padoli
Geunap hari geuseurapa
Lalat beungeh jipo laju
Soe nyang meuhoi keunan teuka

Soe nyang tem bri ie ngon bu
Lalat hijo keunan teuka
Saleh cit na lam kawan nyoe
Lam kawan nyoe peugot cintra

Na geupeugot cintra beusoe
Keunan jiwoe lalat nek ya
Mara Karma teusinyom khem
Geukeureuleng bak nek tuha

Mara Karma kheun lom meunoe
Ubak nek droe ka geubasa

Soc nyang galak bak uroe nyoe
Nek peurunoe bak sok bunga

Nak jikalon buet jaroe droe
Bek teugoe-goe duka cita
Yoh nyan teukhem nek Keubayan
Geukheun yoh nyan hana kaca

Ceureumen lon dilee gaduh
Jinoe han deuh lon eu rupa
Keudek keunoe ulon cari
Teutapi meuteumeung hana

Ban jideungo uleh dendayang
Jijok rijang peulandok tuha
Ka jipeuduek u hadapan
Nek Keubayan tanyong sigra

Peue nyan saleh dalam bungkoh
Peue peunajoh keunoe taba
Teuma seuot le dendayang
Jikheun nyoe ban bak nek tuha

Ceureumen nek nyang ka gaduh
Rhet bak rot ueh yoh baroe sa
Nyoe geugantoe lalat hijo
Nyang beuhe peulandok tuha

Leubeh carong nibak lalat
Nek sok leugat bungong jeumpa
Ban jideungo haba meunan
Seukalian khem teutawa

Peue jime ceureumen meujawong
Jipeuwayang ureueng tuha
Teungoh-teungoh poh beurakah
Gong peungarrah meusuara

Alamat raja beurangkat
Dumna rakyat salen ija
Hase cukop dum di asoe
Ban sinaroe laju bungka

Dumna rakyat jak meususon
Lagee yoh phon lon peuhaba
Padum lawet perjalanan
Dalam huteuen balatandra

Yoh nyan leumah saboh nanggroe
Luah han soe jroh meubanja
Mangindan Sari tanyong rijang
Bak cut abang bangta muda
He keukanda peue leumah joh
Puteh-puteh sang-sang paya
Mara Karma seuot meunoe
Nyankeuh nanggroe Indra Diwa

Nyankeuh nanggroe yang prang raya
Nyang that luah dalam donya
Mangindan Sari tanyong yoh nyan
Wahe abang neucalitra

Agama pakri di sinan
Na Islam atawa hana
Seuot bangta jih nyan kaphe
Jimeuungki keu agama

Meunyo meunan wahe abang
Jih nyan taprang tatueng kuta
Wahe adek pakri taprang
Geutanyoe han tom biasa

Peukakah tan rakan pihan
Pakri keuban tabicara
Lom geutanyoe pi aneuk miet
Han ek tawiet ureueng tuha

Lagi utoh bijak han soe
Jih nyan sidroe rakyat meulaksa
He keukanda bek neugundah
Nibak ayah talakee tandra
Padumia le rakyat ayah
Han ek tiwak Indra Diwa

Rakyat jile that barollah
Ngon ayah han sabe padra
Beuthat meunan wahe cut abang
Lakee tulong bak Rabbana
Tuhan geutanyoe that geumaseh
Neupileh nyang na agama
Adat mate dum geutanyoe
Page dudoe lam syeureuga
Keu kaphe han neubri kuat
Walee le that balatandra
Menyo meunan wahe adoe
Laen uroe jeued takira
Meung na umu neubri le Tuhan
Nakeuh jalan singoh lusa
Teungoh-teungoh geuberjalan
Su pehasan sangat gura
Raja Rom Syah tanyong meunoe
Peue meusu nyoe wahe bangta
Saleh rakan saleh musoh
Bak tapiyoh sikutika
Bangta peugah bek tapiyoh
Tajak beutroh tapareksa
Meunyo musoh na alamat
Tatanyong pat keunoe teuka
Geujak laju sampie keunan
Teuma yoh nyan geupareksa
Peue pupanji puteh kuneng
Ho berjalan dum na gata
Ho peureugi pane nanggroe
Lam kawan nyeo panglima
Raja Rom Syah tanyong meunoe
Gata dum nyoe pane teuka
Ho tameuba dum alam nyam
Pat na nanggroe nyang prang raya

Jiseuot le hana sapat
Meujak siat suroh raja
Neunyue jak preh bangta nyang woe
Lhee uroe jarak ngon kuta

Teuma seuot raja Rom Syah
Neupeugah bak rakyat dumna
Meunyo meunan wahe meuntroe
Nyoekueh kamoe rakan bangta

Tajak peugah laju jinoe
Ka troh woe Mara Karma
Ban jideungo haba meunan
Jiplueng yoh nyan deungon guda

Han jan siat ka troh jiwoe
Jak hareutoe ubak raja
Daulat ampon cahi alam
Le that geundrang keunoe teuka

Sideh di gle jinoe mantong
Teuma lon plueng keunoe sigra
Raja deungo haba meuntroe
Bandua droe geujok ija

Raja teubiet deungon putroe
Bandua droe jak u lua
Hana jan geupangge meuntroe
Geujak jinoe rakan hana

Ban jikalon uleh meuntroe
Raja nanggroe ka u lua
Ka jibaplueng gajah puteh
Jiba keudeh bak meukuta

Daulat ampon cahi alam
Ek Cong kandran wahe raja
Bek berjalan ateuh bumoe
Han got bagoe gob eu rupa

Jak ngon gaki kureueng reusam
Jipandang le raja-raja

Jikheun kamoe tan padoli
Ayeb keuji malee raja

Raja neu-ek ateueh gajah
Dum kafilah ato banja

Nyang jak di keue ureueng patot
Di likot rakan panglima

Jak diteungoh raja doli
Meuntroe wazir ireng lingka

Jibeutot alam ngon pupanji
Jipeunari lingka raja

Jitet beude ngon meuriam
Meupehasan raja raya

Jipeh tambo dengan geundrang
Jipeh mong-mong ngon nukara

Ngon su beude sang beureuteh
Sampoe keudeh dalam rimba

Taeu geujak jroh meubareh
Gajah puteh kandran raja

Bangta deungo su pehasan
Kheun bak rakan piyoh sigra

Neuyue peh gong beuot ngon alam
Ateueh kandran jroh meubanja

Raja pitroh keunan datang
Huleebalang peumeulia

Raja neutren ateueh gajah
Geuseumbah uleh aneukda

Mara Karma com di gaki
Mangindan Sari sama juga

'Oh lheueh bangta seumah abi
Neutanyong le ubak bangta

Wahe aneuk bungong tanjong
Nila Kasom hoka taba

Patkeuh jinoe Nila Kasom
Gohлом ulon kalon rupa

Mara Karma laju seuot
Jeh di likot he ayahanda
Mantong tinggai jih di likot
Sajan pocut nyak ti Cahya

Raja beudoh jak kalon pat
Ireng rakyat ban seulingka
'Oh troh keunan raja daulat
Geubri teumpat nyang jroh rupa

Tarek layeue leueng hamparan
Dalam padang siteuntang mata
Raja piyoh bak teumpat nyan
Ngon bee-beewan gahru jeumpa

Ka jiantri deungon alam
Guda kandran ban seulingka
That meukeunong bak jihato
Soe ngieng tahe suka-cita

Bangta dua neupeureugi
Jak tueng Siti dalam gaca
Ban geukalon uleh putroe
Lam peutoe teubiet u lua

Ngon dendayang di geunireng
Putroe leunteng jak bak bunda
'Oh sare troh u hadapan
Laju meubr'm rhet ie mata

Sira sujud com di gaki
Cut putroe ti meunoe haba
Wahe bunda cutma payong
Meuteumeung lon lom ngon gata

Habeh rasa dalam huteuen
Nyang goh lom meung hilang nyawa
Sabab paleh aneuk neunyoe
Nyang jeued meunoe haro-hara

Ban geudeunge uleh ma doe

Sira geumoe geucom geuwa
Wahe aneuk bungong uroe
Tapoh jinoe kamoe dua

Adat aneuk han tawoe le
Meuhat mate lon lam rimba
Patot aneuk takheun meunan
Jeueb-jeueb huteuen tapeurasa

Tuah kuta rame ureueng
Tuah mideuen mantong raja
Tuah aneuk asoe leumueng
Troh tariwang saweue bunda

Kamoe ba-e han peue peugah
Yoh nyan langkah po teuraja
Sira neumoe neucom bak dhoe
He aneuk droe meubahgia

Cit ka rayek bak tajak-jak
Puteh meuprak troh tagisa
Seuot putroe bungong tajok
Cit ka rayek he ayahanda

Sabab ulon cilaka that
Dumpeue mangat lon peurasa
Keu makanan tarok huteuen
Ulon makeuen deungon keukanda

Makanan lutong boh kayee gle
Nyan rezeuki po karonya
Jeueb-jeueb huteuen lon meurawoh
Habeh gadoh bue deungon kra

Makanan jih kamoe seunoh
Nyan peunajoh ngon keukanda
Nyang jeued rayek he ayah droe
Ka troh lon woe saweue gata

Mangat neupoh ulon jinoe

Sabab kamoe pika raya
Meunan narit bungong keumee
Raja layee pingsan sigra

Bangta peurab neumueng ulee
Neulakee ie mawo jeumpa
Teuma peurab cut Khairani
Teurahob le nibak muka

Puleh pingsan raja doli
Neubeudoh le sampoh mata
Mantong neumoe di sultan
Nek Keubayan yoh nyan teuka

Ubak teuot laju geusembah
Lakee meuah ureueng tuha
Yoh nyan raja gusuek bak rueng
Sireuta neukheun he aneukda

Tapeumeuah dosa ulon
Bekle takheun meunan haba
Yoh nyan teukhem nek Keubayan
Geukheun rijang lon he raja

Kon aneuk cut Nila Kasom
Sabet ulon ureueng tuha
Yoh nyan raja teukeujot that
Tanyong leugat soe sit gata

Mara Karma peugah rijang
Nek Keubayan he ayahanda
Nyankeuh ureueng peulara lon
Di gampong peulinggam Cahya

Ban neudeungo le sultan
Nek Keubayan neumat sigra
Got that guna khendak Allah
Peue balah keu ureueng tuha

Nila Kasom khem teuseunyom

Kalon bangon nek ngon bapa
Putroe sujud nibak ayah
Lakee meuah nibak dosa
Neupeuampon wahe ayah
Barang salah patek hamba
Raja neucom aneuk lidah
Hana salah bijeh mata

Patot kamoe lakee meuah
Peue nyang salah nibak gata
Adat hana le tasayang
Lon meulang-lang dalam rimba

Treb nibak treb ulon mate
Sabab sabe duka cita
Na sikeujab lheueh nibak nyan
Gong ngon canang meusuara

Ngon seurumpet meusu leugat
Nyan alamat saboh tanda
Ban geudeungo nyan alamat
Beudoh leugat woe lam kuta

'Oh troh rakyat woe u mideuen
Raja salen ban nyang kada
Bandum neubri persalenan
Peukayan bajee ngon ija

Tujoh uroe meupehasan
Di dalam kuta istana
Makeuen minom bersukaan
Ngon pehasan le that rupa

Geusie limo dum meuploh-ploh
Jipajoh le rakyat dumna
'Oh habeh nyan laen ka troh
Subra riyoh hana tara

Tujoh uroe tujoh malam

Pehasan yoh nyan ka reuda
Ka seungap gong deungon geundrang
Teuma syahdan lon calitra

Bungong jeumpa mirah puteh
Ta pileh ta boh lam ija
AMMA BAKDU laen lapeh
Nyoe nyang mameh nibak nyang ka

Miseue madu jampu dadeh
Hate puleh soe nyang rasa
Saket mangat sinoe habeh
Teungku pileh toh nyang gura

Nyoe kisah meuriwang bak phon
Deungo lon suson lhee peuet banja
Indra Diwa raja payong
Pangkat lambong dalam donya

Bak maså nyan raja nanggroe
Jideungo ka woe Mara Karma
Deungan istri ka jipuwoe
Tuan putroe elok rupa

Dengon indah putroe canden
Aneuk jen Malikasana
Khendak Allah keunan neubri
Raja mate aneuk dua

Nyang tuha nama geurasi
Cahya Khairani judo bangta
Nyang keudua aneuk agam
Geuboh nan raja Bijangga

Bijangga jak geunap uroe
Ngon rakan droe Tasik Indra
Soe nyang teuka bak teumpat nyan
Mangat badan hate suka

Sinan teumpat dum aneuk jen

Jak meu-en bak watee asa
Masa bangta neucre nanggroe
Troh sampoe teumpat Bijangga

'Oh troh keunan neumeurakan
Deungon jen raja Bijangga
Padumnā treb bangta sinan
Lakee izin teuma bungka

Teuma raja bri saboh alamat
'Oh meularat tameuheu hamba
Hingga 'ohnan ulon peugah
Meuwoe kisah Indra Diwa

Indra Diwa hate susah
Jideungo gah ka woe bangta
Jideungo nanggroe Puspa Sari
Meuploh kali nibak nyang ka

Troh jigisa lom bak umi
Hana mate aneuk cilaka
Dumnan bala han ek punah
Bit that tuah han sabe sa

Keurajaan maken luah
Meutamah gagah perkasa
Lasykar le barat timu
Barat timu balatandra

Kuta mideuen jroh meulaku
Meuhato meuriam lila
Meuhat teuntee ulon jiprang
Hana untong ek kudaya

Teuntee talo bak kupike
Kee nyoe mate bak kurasa
Meungka taklok jih panghulee
Hana lagee malee mata

Raja-raja jikheun geusuen

Han kulawan meung sikada
Hana susah hana peue kheun
Dumna nujum jiyue teuka

'Oh troh nujum u meuligoe
Angkat jaroe di jeumala
Teuma sabda raja nanggroe
Deungo kamoe teungku dumna

Wahe nujum dengo kamoe
Takbi lumpoe taboh makna
Lon lumpoe ie troh di tunong
Peunoh gampong deungon kuta

Ile laju dum u laot
Ulon hanyot ie raya ba
Lon mumat bak cabeueng kayee
Ka patah lhee lon meupala

'Oh sare troh ubak batee
Lon tiek singkee bek jibawa
Leukang batee laju hanyot
Troph u laot ulon jaga

Nyankeuh lumpoe dalam teungeut
Nyang meukeusud neuboh makna
Yoh nyan nujum buka kitab
Jidarab jipupoh angka

Habeh jingieng sigala bab
Hingga dapat jiboh makna
Yoh nyan nujum jihareutoe
Ampon kamoe po meukuta

Meunyo meunan raja lumpoe
Jitueng nanggroe uleh bangta
Nanggroe jiprang raja jipoh
Meunan saboh leumah tanda

Ban jideungo haba nujum

Maken seuuem nibak nyang ka
Pakri jinœ wahe nujum
Cuba takheun uleh gata

Ampon Tuanku got bak kamoe
Bah taiem droe got tasaba
Han ek taprang he Tuanku
Le that bantu bangta muda

Nibak bangta le that rakyat
Lom meusapat ngon jen rimba
Lagi utoh le peukakah
Sabab tuah that meuganda

Meung talawan jih nyan sidroe
Dum geutanyoe hilang nyawa
Blah musoh sidroe han mate
Deungan sakti meuganda-ganda

Adat leumah taeu ureueng
Tacang di rueng putoh dua
'Oh ban reubah ka seulinteueng
Konle ureueng ka jeued keu nuga

Lom geutanyoe jilet laju
Jicang pra-pru jeued keu sira
'Oh tacang jih jeued boh labu
Asoe teulhu gatai raya

Garo gatai ka seb gadoh
Treh musoh jicang meukeuba
Adat takheun han talawan
Tanyoe jiprang han jikira

Meunan narit ahli nujum
Lom raja kheun meunoe haba
Meunoe mate meudeh mate
Gotkeuh bahle kuseurepha

Soe han pateh bak buet ku nyoe

Musoh kamoe ban sineuna
Kucang habeh bak uroe nyoe
Beuranggasoe han kukira

Raja beungeh hana bagoe
Nujum iem droe hana haba
Jikrah rakyat toe ngon jioh-
Beu habeh troh tuha muda

Peugot kuta bak preh musoh
Tunong baroh ban seulingka
Nyang ka brok-brok yue seubaro
Geuhato meuriam lila

Keureuna ion khendak muprang
Kulawan Mara Karma
Jakkeuh jinoe intat surat
Jeueb-jeueb teumpat raja-raja

'Oh nyang taklok ubak kamoe
Bandum keunoe tayue teuka
Hingga teuma haba nyang toe
Rakyat sampoe han ek kira

'Oh lheueh sabda ubak sultan
Rakyat yoh nyan dum keurija
Uroe malam pubuet sunggoh
Ban nyang suroh nibak raja

Timu barat tunong baroh
Kuta kukoh habeh lingka
Hase cukop dumpeue leungkap
Dumna rakyat ngon seunjata

'Oh ka hase dumpeue leungkap
Tamong leugat jak peuhaba
Dua jaroe angkat lambong
Jikheun ampon po meukuta

Dumna rakyat ka meuhimpon

Ho neusuroh dumna hamba
Suroh raja tarek alam
Ngon meuriam yue keulua
Lheueh peurintah nibak sultan
Huleebalang beudoh sigra
Jipeulheueh le boh meuriam
Dalam awan hu meunyala

Ban jideungo su meriam
Seukalian ngui seunjata
Ka jihato guda kandran
Tarek alam meuploh laksa

Jipeh tambo that meuguncang
Dum pahlawan atehu guda
Huleebalang ugoх-ugoh
Pahlawan jroh teuga-teuga

Ngon jisurak sangat riyoh
Sang-sang runtoh alam donya
Panglima prang gagah-gagah
Rincong siwah peudeueng raya

Jiduek ateueh guda mirah
Na ban siwah jipoh lawa
Bak ulee keutopong beusoe
Bak jaroe peudeueng ngon cokma

Ladom gulam cokma beusoe
Hana bagoe hibat rupa
Taloe keukang meuceuradi
Dum sipa-i jak meubanja

Taeu jijak jroh meuriti
Meuntri wazir ngon panglima
Laju jijak dum meuron-ron
Ka meuhimpon balatandra

'Oh troh bak blang padang bandum

Yoh nyan jidum peugot kuta
Kira-kira lhee uroe jak
'Oh nan jarak deungon bangta
'Oh troh keunan bandum jijak
Meuthee le bak bangta muda
Bangta deungo musoh datang
Neujak rijang bak ayahanda

'Oh sare troh u hadapan
Neukheun yoh nyan meunoe haba
Dilon hate sangat susah
Lon deungo gah musoh teuka

Bahle lon jak jinoe siat
Kalon teumpat peue keurija
Dumna tandra ngon pahlawan
Beuna izin ulon bungka

Ban neudeungo musoh datang
Susah han ban po teuraja
Raja neukheun teuma nyoe ban
Wahe intan cahya mata

Wahe aneuk bungong karang
Bek tamuprang he aneukda
Nibak beuhe bahle geusuen
Bah jikheun le ureueng lingka

Indra Diwa raja useueng
Bak muprang guna biasa
Rakyat jih le han ek bileueng
Han soe linteueng ube nyang ka

Cit biasa jih dalam prang
Ngon pahlawan teuga-teuga
Menyo lam prang ka jeued keu bu
Hanle kuyu cit lam suka

Deungon sakti utoh han soe

Dum jikiloe raja-raja
Tapi gata he aneuk droe
Gohлом raghoe lam prang raya

Han tatu 'oh tueng lakuan
Bak muprang hana biasa
Adat jidrop jiboh taloe
Han tatusoe he aneukda

Bahle ulon nyang jak dilee
Lawan sitree ube kuasa
Singoh 'oh ka ulon padee
Bungong keumee ban nyang suka

Mara Karma jawueub neubri
Wahe abi bek that rugha
Meng mantong lon Mangindan Sari
Tinggai doli di istana

Singoh teuma bah buet doli
Meung ka mate kamoe dua
Meunyo neutem bak uroe nyoe
Neupoh kamoe dilee mula

Meung ka mate bandua droe
Bah buet droe meukuta donya
Ban neudeungo bangta peugah
Ile limpah rhet ie mata

Hana daya le neupeugah
Insya Allah neukheun sigra
Wahe aneuk bungong keumee
Lawan sitree raya pahla

Izin aneuk tajak dilee
Wasiet guree bek talupa
Tajak aneuk beuseulamat
Beuta ingat wasiet nyang ka

Tuhan tulong beuseulamat

Di akhirat raya laba
Taprang kaphe musoh Nabi
Syeureuga tinggi dudoe jeumba
Bek teumakot aneuk ngon gli
Kaphe asi musoh kita
Teutapi bak ingat-ingat
Bek siat teukabo ria

Ujob seumeuah pungah teukabo
Sinan nyang le dum binasa
Habeh wasiet nibak po du
Beudoh laju bangta muda

Raja-raja wazir meuntroe
Ireng jinoe laju sigra
Ngon seunjata nibak jaroe
Cokma beusoe peudeueng khanja

Dum pahlawan nyang meugah-meugah
Kreh ngon siwah alat seunjata
Nyang di rakyat han peue peugah
Keumurah ngon beude lila

Bandum beude nibak baho
Jak meuhato santeut banja
Ngon peukayan bandum hijo
Beuhe-beuhe bandum tandra

Peudeueng puteh mat bak jaroe
Dalam.uroe blet-blet cahya
Peh ngon geundrang ngon napiri
Suleng bangsi ngon nukara

Biula ngon dangdi muri
Keucapi hareudom mama
Tarek alam puteh kuneng
Maseng-maseng na panglima

Galak hate soe nyang pandang

Puteh hitam dum warna
'Oh troh u blang padang bahrom
Jipeh geundrang Indra Diwa

Ka jiyue jak sidroe di keue
Yue peureugi ubak bangta
Jiyue tanyong padumna le
Tandra teungku bangta muda

Jijak laju persurohan
'Oh troh keunan jipareksa
Ampon Tuanku syahi alam
Guda kandran pane teuka

Padumna le huleebalang
Pahlawan prang padum laksa
Pakri beuhe ta meulawan
Toh angkatan takheun sigra

Raja kamoe le angkatan
Guda kandran meuploh laksa
Meunyo han ek bek talawan
Taklok rijang bek binasa

Ban neudeungo meunan jikheun
Ka teusinyom bangta muda
Sabet beuna lagee takheun
Leubeh useueng raja gata

Di kamoe kon meujak muprañg
Meudeungo geundrang sangat gura
Kamoe sangka na pehasan
Meujak pandang sikelb mata

Raja gata that gurangsang
Jimeung jak prang kamoe hina
Jak peuleumah droe jih agam
Angkatan bak lon cit hana

Di kamoe nyoe tan angkatan

Seperti ban raja gata
Pane rakyat ulon himpon
Sabab ulon ureueng cilaka

Pat lon lakee soe tem tulong
Meunan neukheun uleh raja
Huleebalang dua reutoh
Teuma lhee ploh raja-raja

Nyankeuh tandra nibak kamoe
Tawoe jinoe jak peuhaba
'Oh jitanyong 'oh troh tawoe
Toh nanggroe nyang jeued seumula

Sabab nanggroe Puspa Sari
Le rezeuki soe nyang teuka
Hana patot lon duek sinoe
Sabab nanggroe that seungsara

Nak jitulong uleh nujum
Meunaŋ takheun ubak raja
Beunta peugah ban amanah
Jak woe bagah tapeuhaba

Ban jideungo dum peuneugah
Jiwoe pantah ubak raja
'Oh troh keudeh ka jiriwang
Jipeugah ban dum peukara

Bangta muda muka hiram
Ulon tuan bek binasa
Adat meungkon lon plueng laju
Rab geubalu bak keupala

Raja deungo meunan laku
Ka mirah hu ngon ie muka
Ji-ek darah muka hitam
Seperti ban bungong kala

Jikheun laju ngon gurantang

Peh geundrang prang laju sigra
'Oh ban meusu dum bunyi-bunyian
Pahlawan dum berlumba-lumba

Ka jigrob-grob dalam padang
Bangta deungo meusu geundrang
Yue epeh canang hareudom mama

Raja Rom Syah bak masa nyan
Lakee izin ubak bangta
Teubiet laju deungon rakyat
Meuhadap lasykar Indra

Indra Diwa sangat garang
Dum pahlawan teuga-teuga
Mara Karma jihei sabe
Jimeusu le raja-raja

Meunan jikheun su raya that
Soe na hajat hilang nyawa
Soe nyang nafsu rijang mate
Bandum sare keunoe teuka

Badan nyawong kumeung peucre
Hari ini nak jirasa
Meunyo nafsu mantong hudep
Jak com teuot raja hamba

Nibak raja lakee nyawong
Bek keunong alat seunjata
Meunan jikheun laknat Allah
Raja Rom Syah troh le teuka

Ban geudeungo nyan jipeugah
Seuot pantah he cilaka
Keupeue kahei raja dilee
Bahle ngon kee jinoe cuba

Raja Rom Syah beuna kathee
Cit Jimalee Jeueb-Jeueb raja

Lheueh neukheun nyan di raja Rom
Ka jihudom ban seulingka

Jitajo meukawan-kawan
Jimeung reupang meunan kira
Raja Rom Syah neugrob lambong
Ka neusayong seun-seun dua

Wie ngon uneun neutak rancong
Ladom puntong takue ngon pha
Mate le jih ka seulinteueng
Guda jiplueng han meuho ka

Ngon su beude hana kureueng
Surak ureueng hana reuda
Asap beude bumoe seupot
Peudeueng hat-huet ban seulingka

Jitak keunoe ka roh keudeh
Kaphe paleh le binasa
Peudeueng patah dum meukhan-khan
Jidrob badan meuhue hila

Ateueh bumoe ka jisumpom
Muka teugom beukah dua
Rotnoe rotdeh lethat mate
Darah ile ban ie raya

That jigagah blah rot kaphe
Rab han ek le Rom Syah tuha
Jilet laju that jigagah
Raja Rom Syah tiwah ghaza

Sabab kreueh that raja Bahrom
Jih pahlawan Indra Diwa
Raja Rom Syah hate kujut
Lethat surot balatandra

Yoh nyan beungeh hana sakri
Guda taji geupoh lawa

Kheun bak rakan bek meusurot
Karat bacut he syedara

Ban jideungo narit meunan
Jiriwang lom miseue nyang ka
Guda jiplueng kameusak-sak
Rom Syah neutak hana reuda

Maken tajam laju jiplueng
Maken di rueng peudeueng seuba
Putoh takue rhet seulinteung
Ladom ureueng nyang puntong pha

Ateueh bumoe ka teugageueng
Ji-ek ureueng jiproph muka
Ngonjisurak hana pirang
Sang neuguncang alam donya

Raja Bahrom tinggai sidroe
Troph le sampoe Rom Syah tuha
Ban jikalon raja Syah Rom
Jikeumeung plueng takot raya

Sabab malee takot gob kheun
Guda yoh nyan jipoh lawa
Jipoh guda that jikarat
Meuhadap ngon Rom Syah tuha

Sare raja ka meuhadap
Leumbeng bulat jigeulawa
Jitob keudeh jitob keunoe
Keunong asoe hana luka

Bandua droe hana kuyu
Meuhumpu ngon save teuga
Jipusu.ngon ali-ali
Hana meugli bulee ruma

Raja Bahrom jikalon ban
Muka masam beungeh raya

Sabab jieu hana meugli

Jipusu le u antara

Aneuk pusu jeued keu apui

Rhet meurui-rui atueh donya

Apui seutot raja Rom Syah

Ie babah geurhom lam hawa

Na sikeujab teuka ujeuen

Angen topan hana reuda

Teuka reudok ngon geulanteue

Kilat soseue miseue sua

Hujeuen angen that meugasui

Len ngon apui han meuhoka

Jitren hat-huet angen peudeueng

Jitak ureueng Bahrom Diwa

Apui ka len keunong hujeuen

Raja Bahrom beungeh raya

Saket hate hana sakri

Ka jitren le atueh guda

Ateueh bumoe jak ngon gaki

Bandua si sabe teuga

Jimeuwa-wa jimeuwiet-wiet

Sabe juwiet han peue kira

Raja laen ka jiteubiet

Jak kalon buet ureueng dua

Sabe teuga sabe beuhe

Han sigeutu tiwah ghaza

Sabe-sabe deungon sakti

Jimeutadi hanban publa

Phon beungoh kon hingga seupot

Hana siat pina reuda

Geupeh tambo tandra pulang

Ka talo prang beudoh gisa

Maseng-maseng woe u teumpat
Jak khidmat raja-raja

Maseng raja geubri salen
Puteh kuneng jroh warna
Makeuen minom suka galak
Boh keulumbak minyeuk ata

Peugah haba macam-macam
Meupehasan hana reuda
Mangindan Sari yoh nyan neukheun
Ubak aduen Mara Karma

He keukanda deungo lon kheun
Yue jak ureueng jinoe sigra
Yue jak ureueng ubak ayah
Tanyoe susah rakan hana

Sabab dilee narit ayah
Neuyue peugah peue-peue bala
Kadang neutem bantu siat
Bek meukarat tanyoe dumna

Indra Diwa bantu lethat
Timu barat keunoe teuka
Di geutanyoe han soe tulong
Meung kon meunan hana daya

Mara Karma seuot pantah
Insya Allah he adekda
Lheueh mupakat dumpeue sudah
Meuheu pantah sidroe tandra

Nyang pantah jak tuho jalan
Sampoe rijang peulinggam Cahya
Geujok yoh nyan saboh surat
Geuyue intat ubak raja

Meunoe haba dalam surat
Lon riwayat meung lhee banja

Seumbah takzim hamba ini
Mangindan Sari Mara Karma

Persembahan keubawah doli
Di neugri peulinggam Cahya
Kamoe dua hana troh woe
Sabab jinoe lam sengsara

Raja Diwa Anta Beurantah
Ka jilangkah jak prang kuta
Wahe ayah kamoe bek neupreh
Buet ka jadeph kamoe ghaza

Meunan haba dalam surat
Jiba leugat le perdana
Hingga teuma haba nyang rab
Troh le leugat u peulinggam Cahya

Bak masa nyan raja daulat
Musyawarat di bale raya
Po teuraja duek meusapat
Mupakat keu hai aneukda

Teungoh-teungoh musyawarat
Troh le surat perdana ba
Geucok laju geuploh lipat
Baca leugat le bentara

Ban neudeungo haba surat
Muka pucat po meukuta
Beungeh neuthat muka mirah
Neuyue jak krah bala tandra

'Oh nyang taklok nibak kamoe
Beutroh keunoe laju teuka
Lheueh peurintah ubak sultan
Beudoh bujang jak seuranta

Hingga teuma habeh jitren
Meuhimpon u mideuen raja

Habeh keunan dum meusapat
Deungon alat cukop rata

Yoh nyan raja musyawarat
Deungon rakyat dum sineuna
'Oh sare lheueh keumah pakat
Dumna rakyat laju bungka

Tinggai ureueng na padum droe
Jaga nanggroe deungon kuta
Laen bungka ban sinaroe
Raja nanggroe pi sireuta

Laju geujak hana piyoh
Surak riyoh dum lasyka
Uroe malam geujak sunggoh
Laju geubloh rot lam rimba

Raja nyang jak teiduek dilee
Bah meuseubee siat haba
Ulon peugah laen dilee
Bungong keumbee Mara Karma

Mara Karma puteh leumat
Ka teuingat dalam dada
Masa dilee na amanat
Alamat nibak jen rimba

Sabab dilee ka jipengah
Peue na susah meuhei sigra
Meuheui kamoe laju bagah
Cit troh langkah ubak gata

Sare bangta ka teuingat
Seobot leugat nan jen rimba
Na tujoh droe neumeusabat
Bandum leungkap neukheun nama

Pertamaphon bangta kheun ban
Mangindara nan nanggroe Diwa

Nyang keudua Dike Agah
Nanggroe luah pari raya

Teuma keulhee raja Sandang
Nama gampong nanggroe Indra
Mani Kusma nama keupeuet
Geuseubot aneuk jen Jindra

Keulimong aneuk raja jen
Geuhei nan raja Bijangga
Dua droe treuk aneuk Mambang
Nyang tuha nan 'Iran Lila

Jindra lila nama adoe
Bandua droe sisyedara
Bangta seuot ban tujoh droe
Ka jitupeue bandum rata

Raja tujoh jimeukeumah
Ubak ayah dum jiteuka
Lakee izin nibak ayah
'Oh ka sudah laju bungka

Ban tujoh droe laju beurangkat
Ubak daulat bangta muda
Teutap bak jak raja tujoh
Ulon peutroh keu cut bangta

'Oh lheueh bangta meuhei sabat
Teubiet leugat u lua kuta
Geundrang prang yoh nyan ka meusu
Ladom kuyu ladom suka

Nyang beurani sangat girang
Nyang geusuen nyang hate lia
'Oh ban sare meusu canang
Huleebalang dum keulua

Deungon tandra dum pahlawan
Alat sajan beude cokma

Meuteumeung le dua pihak
Deumpuk surak meugumpita

Rotdeh rotnoe jimeutob-tak
Ladom rusak ladom fana
Jimeutob-tak jimeurhom-rhom
Jimeugom-gom jimeuwa-wa

Ladom jirhom ali-ali
Tadeungo ca-ci ban seulingka
Ngon busu bleuet tadeungo ca-ci
Hana khali jigeulawa

Tob ngon sakin plah ngon kapak
Mate rusak han ek kira
Jihei sare ngonjisurak
Sang meuhayak alam donya

Rotdeh rotnoe meusu peudeueng
Let hat ureueng dum binasa
Darah ile ban le paseueng
Mate ureueng dum meukeuba

Rotdeh rotnoe deungo kram-krum
Ketam-keutum beude lila
Nyang su beude han le meutum
Meukrum-krum ban hujeuen teuka

Su meuriang geudham-geudhum
Mate ureueng han ek kira
Putoh gaki putoh jaroe
Ladom sampoe reuloh muka

Rakyat mate dum teupipoe
Kaphe pinoe nyang le fana
Tadeungo kring meusu peudeueng
Surak ureueng hana reuda

That meukalot ureueng muprang
Meukeumang asap lam hawa

Taeu bak ble kilat peudeueng
Su seumeureueng dalam rimba

That meuguncang ureueng muprang
Dum pahlawan teuga-teuga
Darah ile hana peue kheun
Le that ureueng ajai teuka

Raja-raja huleebalang
Teureuban reubah teuhanta
Tunong baroh timu barat
Surak rakyat riyoh subra

Gardan Syah that pahlawan
Geumeuncang beurama sangga
Rakyat kaphe lethat simpan
Sangat girang rakyat bangta

Masa nyan prang that klam kabot
Uroe seupot han jikira
Raja Bahrom ka jisuroh
Ban meulikot jiplueng sigra

Raja Rom Syah yoh nyan geuplueng
Ka geulinteung Bahrom Diwa
Raja Bahrom sabe jiplueng
Seumeureung u dalam kuta

Raja Rom Syah seutot laju
Ka troh ukeue Indra Diwa
Bitpih meunan tan geutupeue
Geulet laju Bahrom Diwa

Sabab mabok deungon darah
Geujak pantah atueh raja
Guda han le ka geupeulheueh
Badan mirah ban keusumba

Ka meulabo deungon darah
Raja Rom Syah troh bak raja

'Oh troh keunan raja Rom Syah
Ka leumah bak Indra Diwa
Yoh nyan jidrob jiboh taloe
Mata uroe hadap muka
Lheueh jiikat ka jisurak
Sang-sang pipak bumoe donya

Mara Karma ka teukeujot
Peue jih ribot hana tara
Ka teudong di teungoh padang
Neupandang ban sieseun lingka

Di jioh kon bangta pandang
Troph le datang saboh guda
Guda Rom Syah dalam padang
Baroh tunong plueng meutaga

Jijak seutot raja Rom Syah
Deungon darah meulabo rata
Jiplueng keunan meuhah-meuhah
That meutuah guda samba

Ban neukalon le Syah Pari
Guda lari sinan lingka
Guda Rom Syah ka geuturi
Geutajo le geudrob sigra

Geuba laju u hadapan
Sultan Mara Karma
Bangta kalon guda Rom Syah
Laju jojah ngon ie mata

Sira neumoe neukheun pantah
Raja Rom Syah jienaya
Bak ri rupa raja Rom Syah
Habeh langkah dalam donya

Bak dali guda meudarah
Nyankeuh riyoh bunoe subra

Yoh nyan nemoe kon bubarang
Sangat sayang Rom Syah tuha

Aneuk rakyat seukalian
Keu raja Rom lakee doa
Beu seulamat raja Syah Rom
Meunan bandum mohon pinta

Cut bangta peuteubiet gajah
Khendak langkah jak pareksa
Syah pari geukalon leumah
Geukheun bagah wahe raja

Bek Tuanku dilee jalan
Bah lontuan jak pareksa
Lon jak dilee kalon dali
Saleh mate Saleh hana

Lheueh Syah Pari lakee izin
Neujak yoh nyan deungon tandra
Geujak laju hingga rab troh
Deuh jioh geukalon rupa

Raja Rom Syah ka jiikat
Dang mupakat keumeung sula
Jimeung Sula dalam padang
Pakri padan dang jikira

Ban geukalon dum meunan buet
Neusurot Syah Pari muda
Cok pusu lam jaroe uneun
Dalam awan geurhom sigra

Na sikeujab teuka asap
Seupot pithat glap gulita
Seupot pithat hana sakri
Han jituri meuntroe raja

Han meuri lawan ngon kawan
Seupot hitam dalam donya

Syah Pari yoh nyan neujak droe
Jak ploh taloe Rom Syah tuha

'Oh sare lheueh geuploh ikat
Geukheun leugat he syedara
Habeh lon ploh nyang meuikat
Beudoh leugat tajak gisa

Rom Syah deungo kheun Syah Pari
Ka geuturi sahbat nyang ka
Tapreh sinoe dilee siat
Na peue hajat lon jak mita

Geubeudoh le laju rijang
Raja Bahrom geujak mita
Ban meuteumeung geuba keunan
Teumpat gob nyan jienaya

Raja Bahrom ka geuikat
Peuduek leugat teumpat nyang ka
Han soe kalon dalam asap
Lheueh nyan leugat jak bak raja

Geujak tajam troh le siat
Ka geudapat maha meukuta
Geucok laju ka geupuwoe
Troph le sampoe bak teumpat nyang ka

Ngon Syah Pari ka meusapat
Beudoh leugat geujak gisa
Troph u lua cut Syah Pari
Puleh sakti neuteupok pha

Asap yoh nyan laju hilang
Peungeuh alam miseue nyang ka
Glong pupanji dalam padang
Deungon alam ban silingka

Di teungoh nyan saboh tihang
Di ujung meukuta raja

Jipeu-ek ateuh bupaleh
Surak jadeh subra donya
Geuheui sare dum pahlawan
Geukheun nyoe ban su meutaga
Soe nyang beuhe peurab bak kee
Jak cok ulee raja Diwa

Nyoe pat kuglong di cong kayee
Nyoe ho ulee raja gata
Soe beurani bak meulawan
Toh nyang jantan ku-eu rupa

Seureuta ngon surak kiam
Sang-sang karam nanggroe raja
Mara Karma yoh nyan neutren
Jak me salen dum peutua

'Oh ka hase woe u mideuen
Bri makanan peue nyang suka
Bandum piyoh bak keurusi
Wet-wet gaki meuseusuka

Teuduek haba dilee siat
Lon riwayat raja Indra
'Oh sare ka gadoh asap
Teukeujot that hana tara

Jideungo su hana macam
Surak kiam that meutaga
Jitren yoh nyan di meuligoe
Jiteubiet droe jipareksa

Ban jikalon meukuta droe
Dalam uroe ka teuhanta
Ka jipeugot keu pupanji
Jipeunari lam blang raya

Lheueh jikalon sinan siat
Laen teumpat jak pareksa

Jijak kalon bak meuikat
Ban jilihah Bahrom Diwa
Yoh nyan ingat lam hate droe
Pakon meunoe jikeurija
Saleh hoka ureueng bunoe
Rakyat kamoe ka jiseksa

Indra Diwa sangat hireuen
Teujanun pike lam dada
Untong hana jipoh mate
Lon nyoe han le daya upaya

Adat hudep rasa mate
Ka jipeucré ngon meukuta
Ka meuploh thon kee bak buet nyoe
Gohlom meunoe kupeurasa

Lheueh teupike meunan macam
Raja Bahrom ka jibuka
Raja Bahrom narit yoh nyan
Ubak sultan jicalitra

Daulat ampon cahi alam
Bek beurang ban neukeurija
Bek peumudah buet dalam prang
Bek neuwahan pura-pura

Kon meung nyoe phon ulon meuprang
Dum pahlawan teuga-teuga
Tapi gohlom meunoe macam
Ampon tuan that seungsara

Indra Diwa malee han ban
Mirah padam ngon ie muka
Jiyue teubiet u dalam blang
rayek seudang muda tuha

Soe jeued mat sakin ngon parang
Teubiet bandum u lua kuta

Ubit rayek muda seudang
Jak bantu prang bandum rata
Bek tatinggai pi meung sidroe
Ulon jinoe pi keulua
Jiteubiet le meuseugumoe
Miseue unoel lam blang raya

Deungo peurintah raja laknat
Teumakot that rakyat dumna
Teungoh jijak dum pahlawan
Geundrang prang ka meusuara

Indra Diwa sangka waham
Ban geundrang prang bantu bangta
Mara Karma pi cit meunan
Sangka geundrang Indra Diwa

Teungoh-teungoh geukalon pat
Deuh geukihat alam raya
Hijo puteh mirah hitam
Berkibaran alam dumna

Jipot angen dirui han ban
Nam ploh macam panji raja
Dum panglima ngon pahlawan
Alat sajan peudeueng cokma

Yub pupanji that analan
Sultan Puspa Indra
Duek bak teumpat nyang keemasan
Hana lawan indah rupa

Geujak laju deungon kandran
Teumpat muprang bangta muda
Mara Karma bri utusan
Tanyong rijang pane tandra

Lheueh neupeugah jiplueng rijang
Ban troh keunan tanyong sigra

Pane tandra teuka keunoe
Raja kamoe yue pareksa

Pene nanggroe teuka keunoe
Lam kawan nyoe soe peutua
Jiseuot le peugah meunoe
Raja kamoe Puspa Indra

Peulinggam Cahya nama nanggroe
Neujak keunoe bak aneukda
Jak u nanggroe Puspa Sari
Mangindan Sari Mara Karma

An jideungo meunan ulah
Jiplueng pantah woe lam kuta
Ubak bangta jijak peugah
Ka troh langkah doli ayahanda

Bangta deungo galak han soe
Jak tueng keunoe pantah sigra
Ban troh keunan mumat jaroe
Bangta pewoe dalam kuta

Raja Angkasa neupreh sinan
Ban meuteumeung neucom meuwa
Peutamong laju u dalam
Sampoe datang u istana

Yoh nyan beudoh tuan putroe
Bandua droe seumbah bunda
Seumbah ayah deungon umi
Cut Khairani putroe Nila

Raja kalon cut putroe ti
Seunang hate hana nyang sa
Geuyue piyoh bak keurusi
Meuceuradi meuh permata

Singkop sange jroh meuhuke
Ranub bate meusuasa!

Habeh ranub dalam babah
Troh le pantah hidang raya
Marit waki teuma pantah
He daulat syah makeuen sigra
Treb-treb siblet keunoe datang
Bu ngon asam eungkot hana

Ban geudeungo haba waki
Teusinyom le bandum rata
Geucok le ie geurhah babah
Kheun bismillah mula-mula

Peuhah hidang dum sinaroe
Makeuen jinoeu dum sineuna
Asoe hidang lethat bagoe
Lon hareutoe hana guna

Suka hate dum sinaroe
Makeuen jinoe peue nyang suka
Rakyat pajoh peue nyang galak
Boh cempeudak boh deulima

'Oh lheueh makeuen seukalian
Boh bee-beewan minyeuk ata
Suka hate dum sibarang
Lheueh nibak nyan teubiet sigra

Pinto kuta bandum geutob
Bek jilob musoh di luar
Na padum droe sinan tinggai
Nyang kawai bak pinto kuta

Laen bandum habeh jalan
Pahlawan deungan peutua
'Oh sare troh u bineh padang
Piyoh sinan sikutika

Peugah haba suka galak
Prang meuhayak that baroe sa

Teungoh peugah dum haba prang
Meusu geundrang di antara

Ngon pupanji han peue peugah
That bahrollah han ek kira
Raja-raja yoh nyan hireuen
Geujak kalon pane tandra

Na siat ka laen datang
Alam kuneng meupeurmata
Meutiara dum meukarang
Siulah ban bintang kala

Hu seumeuloh anteng-anteng
Su jih krang-kring miseue geunta
'Oh jipot angen meuhayon
Indah bangon hana tara

Ngon bee-beewan sangat harom
Di yub alam aneuk raja
Aneuk raja na dua droe
Aduen adoe tren u donya

Na sikeujab di likot nyan
Leumah alam laen rupa
Sireutoh peuet ngon pupanji
Jinari meurak diwangga

Bandum taeu jroh meureumboe
Intan pudoe meutiara
Na ban buleuen lingka bintang
Indah han ban taeu rupa

Hu seumeulhoh cahya intan
Meukarang peuet panca indra
Di likot nyan bandum yakut
Meusalob ngon eumpieng ara

Lom meujampu deungon zamrut
Meuhut-hut bee gahru jeumpa

Peungeuh bandrang ban buleuen trang
Di yub nyan raja Bijangga
Geuduek ateuh waliman trang
That analan aneuk raja
Laju geutren dalam awan
Teureubang keunoe u donya

Na siat lom laen macam
Leumah alam meuh suasa
Ban peuet sagoe jroh meuhuke
Peureumandani meupeurmata

Meutiara dum meuble-ble
Manek gule ban seulingka
Geumeurlapan cahya puteh
Peureuseh ban bintang zahra

'Oh ta pandang cidah habeh
Duek di yub jen Mangindan Indra
Rupa hebat hana lawan
Ban pahlawan gagah perkasa

Miyub manyang 'oh ta pandang
Geutren rijang areueh donya
'Oh habeh nyan ka geupiyoh
Sikureueng ploh laen teuka

Jipo tajam miseue siwah
Alam Khalifah nyang mulia
Reumboe jih meuh bandum sajan
Maknikam ban siseun lingka

Peurmata meuh sikureueng ban
Di miyub nyan aneuk raja
Di likot nyan raja Pari
Duek seundiri ateueh guda

Taeu rupa sangat hebat
Meukilat cahya muka
Geutren laju dalam padang
Di likot nyan laen teuka

Sireutoh dua ploh pupanji
Meuceuradi meuh suasa
Cahya blet-bleut miseue intan
Jroh hana ban taeu rupa
Miseue bungong sigo keumang
Meunan macam dum warna
Jipot angen jroh meuhayon
Di yub nyan Kusna Indra

Duek di ateueh burak teureubang
Meulayang di dalam hawa
Tingkah laku hana lawan
That guransang soe ngieng rupa

Na sikeujab lheueh piyoh nyan
Leumah laen miseue nyang ka
Su meugrum-grum ta deungo riyoh
Sireutoh lhee ploh alam raya

Hijo mirah bertatahkan
Keemasan meutiara
Hu meuble-ble cahya intan
Meukarang peuet sagoe geunta

'Oh meuhantok meusu krang-kring
Keucrang-keucring meusuara
Di yub alam raja sidroe
Jroh han soe Mangindan Indra

Ateueh singa teuduek hebat
Jroh meukilat cahya muka
Cahya badan hu seumeulhoh
Ie gigoe tijoh hana tara

Puteh kuneng cahya bak dhoe
Miseue uroe cahya muka
Laju geutren ateuh bumoe
Teumpat bunoe padang raya

Raja tujoh ka meusapat
Trok le leugat waki bangta

Jak tanyong pane pahlawan
Dalam kawan soe keupala
Geubri jaweueb pantah rijang
Panglima prang tujoh raja
Raja tujoh marit meunoe
Ubak kamoe ka troh haba

Nyang jeued keu troh bandum kamoe
Meujak keunoe bantu bangta
Ban jideungo dum hareutoe
Utusan woe dalam kuta

Troh u dalam angkat jaroe
Jipeugah proe ubak bangta
Daulat ampon tandra bunoe
Geujak keunoe bak meukuta

Geupeugah droe raja tujoh
Geukheun suroh po meukuta
Meunan haba bak lon tuan
Jak bantu prang keunoe teuka

Bangta deungo haba meunan
Jak tueng kaman keunoe sigra
Waki jijak pantah han soe
Jak hareuroe ubak raja

'Oh sare troh beuot jaroe
Jikheun jinoe suroh raja
Suroh bangta nyang sultan
U dalam neuyue neusila

Neuyue tamong troh u dalam
Bek le tuan dong di luar
Insya Allah jaweueb laju
Beudoh pra-pru tamong lanja

U dalam geutamong laju
Bangta jak eu jamee teuka
Raja-raja dum sinaroe
Wazir meuntroe ngon panglima

Peurab bangta mumat jaroe
Ban sinaroe peumeulia
'Oh sare lheueh meumat jaroe
Piyoh jinoe ban sineuna

Bangta kalon teuma dudoe
Ureueng ka dhoe di lua kuta
Ka peunoh blang sampoe u gle
Bangta pike teumpat hana

Bak masa nyan ka teuingat
Malakat jibri le raja
Ban teuingat keu malakat
Teubiet leugat u lua kuta

Tet keumunyan ka neuhasap
Bangta kasat beujeued kuta
'Oh lheueh doa rahob jaroe
Beudoh neuwoe bangta muda

Teudong kuta ngon meuligoe
Manyang sampoe dalam hawa
Meuligoe meuh sangat hebat
Tujoh tingkat jroh meubanja

Di dalam na soe pot-pot
Soe nyang hugob mangat rasa
Jipot angen bacut-bacut
Dirui mangat sang syeureuga

That meukenong taeu laku
Kuta uatu ngon suas
Di lingka beude meuhato
Soe ngieng tahe lale mata

Ngon meuriam saboh sagoe
Meusu keudroe hana reuda
Bangta muda meung khanduri
Jamee fakir urueng teuka

Gesusie lumo deungon keubeue
Cukop dumpue kureueng hana

'Oh ka hase dum hidangan
Marit yoh nyan waki bangta
Dua jaroe angkat lambong
Teungku makeuen bu ngon sira
Eungkot hana kamoe huteuen
Teungku makeuen peue mudah na

Treb-treb siblet keunoe datang
Bu ngon asam eungkot hana
Lagi nanggroe lam susahan
Ulon paban he syedara

Bek weueh hate wahe tuan
Makeuen rijang peue mudah na
Tunggeng geupet basah jaroe
Makeuen beutroe po meukuta

Jiseuot le meunoe jikheun
Pane kureueng dumnoe ka na
Peue leubeh deungan kamoe dum
Pat na kureueng peue nyang hana

Hingga teuma geurhah jaroe
Ban sinaroe makeuen sigra
Makeuen minom lom buahan
Seukalian hate suka

Macam-macam dum makanan
Dalam hidang meubagoe rupa
'Oh lheueh makeuen pinah hidang
Ka troh puan nyang meucintra

Makeuen minom bandum sare
Bak keurusi duek meubanja
Na sikeujab piyoh sinan
Teuma yoh nyan beudoh sigra

Teubiet laju u mideuen prang
Seukalian surak kubra
Raja tujoh dum jinari
Jiyub bangsi ngon biola

Sangat hebat ngon beurani
Dan lagi pahlawan teuga
Po teuraja hate seu-u
Le that bantu lam prang raya

Meuploh ribee dum sidadu
Lom ngon taeu hebat rupa
Bak masa nyan neubri salen
Raja jen ngon rakyat dumna

Bandum rata raja salen
Bri siseun tren bajee ija
'On limeng makanan ulat
Boh langsat makanan musang

AMMA BAKDU wahe sahbat
Bah siat lon balek ragam
Nyoe lon peugah Indra Diwa
Yue pareksa ubak rakan

'Oh troh jiwoe jipeuhaba
Ampon hamba cahi alam
Bak peunyum lon han ek ghaza
Uroe nyoe ka habeh simpan

Uroe nyoe ka gob peumilek
Geutanyoe han ek he sultan
Mara Karma lethat tandra
Tujoh raja dum pahlawan

Sama teungoh padang raya
Lam istana nyang ka misan
Ban jideungo meunan haba
Indra Diwa muka masam

Mirah hu ban bungong kala
Jikheun teuma ngon gurantang
Teubiet jinoe bak lale le
Besar keuci muda sedang

Ngon jidumpek bukon bacut
Hate kuyut huleebalang

Jiteubiet le dum meuree-ree
Bak penghulee keunan datang
Habeh teuka sigala teumpat
Meuntroe meuhat ngon pahlawan
'Oh ka habeh teuka rakyat
Jipeh le dhap palee geundrang

Maseng-maseng meujuara
Dikee raja jikheun nyoe ban
Bek ka takot he syedara
Kalet sigra katak meukhan

'Oh meuhadap ngon geutanyoe
Kaseudoe bek jan jihei wang
Meunyo jiplueng kalet sabé
Nyang mate bahle disinan

Meunan haba dum jimeuproë
Raja nanggroe hate seunang
Raja salén dum sinaroe
Wazir meuntroe huleebalang

Hingga malam le ngon uroe
Dum sinaroe jak tiduran
Habeh malam ka meugantoe
Wazir meuntroe beudoh yoh nyan

'Oh ka hase ngon seunjata
Teubiet sigra poh ngon geundrang
Sangat hebat bak jihato
Santeut baho uleebalang

Na ban riyeukek dalam laot
Meukot meukawan-kawan
Lom jisurak ka-a ka-o
Sang ka talo musoh jicang

Jimat peudeueng dum sinaroe
Dalam uroe han ek teuntang
Tumbak leumbeng dum seunjata
Raja-raja kreh meudulang

Sangat gagah dum panglima
Deungon guda jiberjalan
Ladom gajah ladom singa
Panglima deungon pahlawan

Siploh ribee jak ngon guda
Laen teuma dum berjalan
Jibeuot alam ngon pupanji
Jisurak le subra kiam

Jipeh tambo yub napiri
Jikab bibi ji-ek tajam
Jiyub suleng deungon bangsi
Jipeunari dumna₂ alam

That meutaga surak dumppek
Prang jipeu-ek sangat girang
Bak guda plang dum peutua
Han ek kira ka peunoh blang

Jak di teungoh Indra Diwa
Di lingka dum huleebalang
Hate beuhe that beurani
Alat jibri cokma peudang

Badan raya lagi hebat
Ji-ek leugat dum pahlawan
Jimeugrob-grob jimeuwa-wa
That geumbira hana lawan

Jimeutob tak pura-pura
Bak raja peuleumah ajam
Tak ngon peudeung theun peurise
Raja lale kalon macam

Jimeutak-tak di keue raja
Jilila jiangkat peudang
Tajo keudeh tajo keunoe
Jimeukiloe sabe rakan

Lom jidumpek sang-sang tuloe
Ulah bagoe rasa karam

Siulah sang kiamat nanggroe
Raja pindoe galak han ban

Teutap dijih lam geumbira
Bangta muda lon peuriwang
Ban neudeungo uleh bangta
Indra Diwa teubiet u blang

Lakee izin bak ayahanda
Khendak bala u mideuen prang
Teuma seuot po teuraja
Ulon taba wahe intan

Mara Karma han neurela
Po teuraja yoh nyan neutham
Meunoe neukheun uleh bangta
He ayahanda bek susahan

Meunyo mantong patek hamba
Bek ayahanda teubiet u blang
Meunan narit bangta muda
Po teuraja seungab kalam

Raja neuiem han le haba
U istana neu-ek rijang
Jak duek bak kuta hikmah
Neujak lihat ureueng muprang

Po teuraja sinan teutap
Bangta leugat teubiet u blang
Jireng le raja-raja
Dan sigala pari mambang

'Oh sare troh u teumpat nyang ka
Surak subra hana lawan
Rakyat raja that ceureudek
Laju ji-ek atueuh kandran

Beude cokma dum jitarek
Peudeueng leuntek dum jireugam
U mideuen prang laju ji-ek
Surak dumpek leungo alam

Pahlawan nyang tarek-tarek
Taeu ji-ek sang boh sungkam
Geupoh lawa pantah sigra
Ban cempala meulot di blang

Kusna Indra ngon Bijangga
Gob nyan dua panglima prang
Indra Mangindara Mangindara Diwa
Gob nyan dua sayap kanan

Sayeuep rot wie pangiran Nila
Deungon jindara dua orang
Di keue Agi ngon Syah Diwa
Likot teuma gob nyan peutheun

Jak di teungoh bangta muda
Laen lingka tandra bandum
Ulee iku bandum tandra
Bangta dua di teungoh nyan

Mangindan Sari Mara Karma
Gob nyan dua jeued keu badan
Sangat indah bak geuhato
Sang peuraho laot Sailan

Galak hate soe nyang beuhe
Jeued seungkoe ureueng geuseun nyan
Jikalon le Indra Diwa
Rakyat teuka ka peunoh blang

Ubak meuntroe sabda raja
Kahei sigra dum pahlawan
Jimeusu le raya-raya
Hoka bangta nyang analan

Meunyo bändum gata agam
Nak tarasa kuboh asam
Bek kreueh babah ngon meulikot
Surot-surot lagee bubrang

Bek beuhe dalam leumeueng ma
Jinoe teuma ta meuhadap

Ban geudeungo narit singke
Meulangkah le aneuk meubang-bang
Keudeh sit ka troh sampie
Geukheun meunoe laju yoh nyan
Wahe raja Indra Diwa
Tangieng rupa dalam padang
Soe po ulee atueh kuta
Soe po raja cuba pandang
Sira geukheun geupoh lawa
Berlumba lagee ie paseueng
Troph geulalu dalam tandra
Surak subra bagai tofan
Ban meuteumeung meuncang laju
Peudeueng lalu hana meutheun
Keudeh keunoe peudeueng tajo
Putoh baho ladom reukueng
Ladom ulee ka jirancong
Troph u punggong peudeueng makeuen
Meuseueng-abeueng di teungoh blang
Meutang-ilang hana peue kheun
Meuhue hila keudeh keunoe
Cokma beusoe tadeungo kram-krum
Tamse rimueng juwah han soe
Jeueb-jeueb sagoe surak ureueng
Ladom peudeueng ladom cakcoe
Jimeukiloe hana peue kheun
Nyang ladom ka putoh jaroe
Ladom sampie putoh reukueng
Ladom badan ka jeued dua
Guda-guda ka teugageueng
Le that ureueng ajai teuka
Nyang buet cokma deungon peudueng
Rotdeh rotnoe taeu pantah
Miseue siwah meulet bak ateueng

Nyang ka mate sinan reubah
Ile darah ban ie paseueng
Nyang hudep jimuprang sabe
Nyang ka mate han le peue kheun

Le that fana rakyat kaphe
Taeu bangke sinan kingkeueng
Jipoh keudeh jigrob keunoe
Sideh sinoe dum seulinteueng

Ile darah na ban sungoe
Sang sijak nyoe teuka hujeuen
Di dalam blang taeu mirah
Bangke gajah bangke ureueng

Uroe nyoe prang that meuriah
Rakyat reubah hana peue kheun
Surak dumpek bagoe ribot
Sang beusot u dalam huteuen

Masa nyan prang that klam kabot
Uroe seupot han jitunyum
Ka meuron-ron keudeh keunoe
Miseue geumoe rakyat bandum

Miseue boh trueng dalam jeuee
Miseue kayee angen tofan
Lethat mate nyawong padee
Putoh ulee putoh reukeueng

Reubah kram-krum dum meutimpa
That meuueba mate ureueng
Rotdeh rotnoe mate that le
Ka teusungko dum teulinteueng

Ban dua ho sabe beuhe
Jitajo na miseue rimueng
Nyang di rakyat sabe rakyat
Jeueb-jeueb teumpat tadeungo kram-krum

Jimeulet-let timu barat
Han jitupat mita ruweueng

Rakyat kaphe meunyum arat
Musoh le that han ek peutheun
Jitak keudeh rhom atueh droe
Kaphe pindoe susah bandum
Asap beude tahat meukeumang
U manyang taeu ji-ek dum

Ureueng mupranghana deuh le
Asap beude hana peue kheun
Lethat pana siblah kaphe
Darah ile miseue hujeuen

Dum pahlawan lethat mate
Meugule leumbeng ngon peudeueng
Dum seunjata rhet lam darah
Kreh ngon siwah dum teueng-bayeung

Hanyot laju dalam darah
Bangke gajah ka meusareueng
'Oh ta kalon darah ile
Susah hate bandum ureueng

Bak masa nyan rakyat kaphe
Bak jipike han ek peutheun
Bacut-bacut jisurot le
Hingga akhe laju jiplueng

Yoh nyan jiplueng tandra kaphe
Syah Pari laju neulinteueng
Laju jiplueng tandra kaphe
Nyang mate sinan teugageueng

Gardan Syah siblah kiri
Syah Pari nyang siblah uneun
Geu-ek laju miseue suwe
Rakyat cre-bre cangking-makeueng

Nyang ladom rhet dalam paya
Ladom teuma rhet dalam lueng
Ladom jiplueng lam beuluka
Nyang lam rimba dum teueng-bayeung

Habeh cre-bre plueng meutaga
Ureueng tuha teuma geukheun
Bah tapiyoh dilee siat
Jeh beuleukat ka troh jirhueng

Taboh tanda keudeh siat
Beuleukat yoh mantong seuuem
Malam jula poh dua blah
Bah takeubah bek le takheun

Malam singoh tapeusudah
Si nyak Dolah jeued lon jak tueng
Meunan keuproe haba miseue
Jinoe u keue laju takheun

Jak u pasi pot beuramoe
Ta puwoe ta boh lam raga
AMMA BAKDU teumon bunoe
Haba nyoe ulon peugisa

Rakyat jiplueng keudeh keunoe
Tinggai sidroe Indra Diwa
Bangta kalon raja sidroe
Gajah jinoe neupoh lawa

Jikalon le raja pindoe
That samlakoe indah rupa
Cahya mieng ban mata uroe
Cahya gigoe ban suasa

Muka puteh that juhari
Dan lagi that bijaksana
Dalam hireuen meunoe pike
Saleh pane aneuk raja

Saleh mate kee uroe nyoe
Jikheun meunoe teuma sigra
Wahe bangta nyang sam lakoe
Lon tanyong soe nama gata

Pane gampong keunoe datang
Nyang got intan tajak gisa

Kungieng gata sangat sayang
Tajak riwang bek binasa

Ulon sidroe bek talawan
Ureueng laen tayue teuka
Beuta patch bungong karang
Beuta sayang tuboh nyawa

Lagi gata muda seudang
Sang-sang sayang lon poh gata
Meung tapateh ban lon kheun nyoe
Kubri putroe aneuk raja

Rupa indah hana bagoe
Dalam nanggroe han sapat sa
Meung talawan ulon sidroe
Gata paloe hilang nyawa

Mate gata he samlakoe
Ulon sidroe sayang raya
Ayah gata pithat sayang
Meung ka hilang cahya mata

Nyang got tawoe laju rijang
Beuta sayang ayah bunda
Meunan jikheun raja sitree
Bungong keumbee seuot sigra

Peue kapeugah raja asee
Kameutipee lon kadaya
Peue jeued sayang kadeungo kee
Masa dilee kapeusuna

Nyoe karasa buet jaroe kee
Nujum dilee kayue publa
Jinoe kupoh kah he asee
Kuadee meuntroe panglima

Nyang rakyat kuboh teurajee
Kah kuseubee u yub donya
Meusaboh han le kukeubah
Aneuk mirah keupeufana

Mon kudhoe pisang dum kucah
Han kukeubah biek peusuna
Nujum kah le hoka jiplueng
Pahlawan dum hoka kaba

Kayne teuka keunoe bandum
Mangat jitheun peudeueng raya
Ban jideungo narit singke
Jipusu le atueuh bangta

Miseue hujeuen rhet u bumoe
Keunong asoe han sapat bla
Keumeung balah hana ruweueng
Pusu jiplueng ban boh panta

Teubiet apui laju yoh nyan
Dalam badan Mara Karma
Keunong pusu hana rusak
Bandum ulak keubai raya

Raja kalon han jipajoh
Maken beungeh nibak nyang ka
Jipusu le dalam awan
Apui jitren hu meunyala

Rhet le apui miseue gunong
Jimeung tamong dalam kuta
Rakyat bangta habeh jiplueng
Apui seuuem hana tara

U dalam mon dum jilumpat
Apui seutot hana reuda
Nanggroe bangta habeh tutong
Trok lam gunong apui lingka

Yoh nyan nanggroe miseue kilat
Pusu leugat ka neuhila
Neupusu le dalam awan
Teuka hujeuen sangat raya

Len le apui laju rijang
Seukalian han le nyala

Raja kalon apui tiwah
Beungeh leupah nibak nyang ka
Jirhom pusu siblah barat
Teuka lethat laju naga
Bangta kalon naga le that
Neucok tungkat neugeulawa

Troh gogasi han soe tudum
Jidrob bandum naga raja
Habeh jidrob ka jimakeuen
Nyankeuh umpeuen ureueng rimba

Habeh naga hana lom troe
Ka jipeutoe ubak raja
Ban jikalon naga han le
Raja kaphe beungeh raya

Jicok peudeueng mat di jaroe
Doa meunoe jikheun sigra
Beureukat patong Tuhan kamoe
Ngon peudeueng nyoe bu binasa

'Oh lheueh jikheun doa sihe
Jipeulheueh le peudeueng raya
Peudeueng cokma miseue suwe
Gogasi mate dum meutimpa

'Oh habeh gogasi sinan
Peudeueng yoh nyan seutot bangta
Ban meuteumeung jitajo le
Bangta ahli keunong muka

Han jipajoh uleh peudeueng
Reubah sinan bangta muda
Han le neuthee wie ngon uneun
Reubah pingsan hana haba

Indra Diwa peurab leugat
Ka jiikat bangta muda
Jaroe gaki ka jiikat
Jiba leugat dalam kuta

Jijak seutot bandum rakyat
Bek teumakot jiyue gisa
Musoh sitree ka kuikat
Riwang leugat bandum gata

Meung kon buet ke kupeukeumah
Cit han punah si cilaka
Habeh jiwoe bandum rakyat
Jihei leugat sihe tapa

Peudong kuta lingka nanggroe
Manyang sampoe dalam hawa
Habeh jitop bandum pinto
Jihato meuriam lila

Rakyat kawai jeueb-jeueb pinto
Bek troh lalo musoh teuka
Jicok bangta bak meuikat
Kheun bak raykat pakri daya

Jikeumeueng poh jih lam ikat
Pakri pakat ta keurija
Peudep apui beu raya that
Ta tiek leugat ta grob lingka

Raja Bahrom seuot leugat
Got ta ikat nak jirasa
Balah dilee lon jiikat
Jinoe meuhat jih nyan tadra

Bak simpang peuet jih ta ikat
Soe nyang peurab keunan teuka
Ta yue rhom tujoh neuk batee
Nibak ulee deungon muka

Sidroe jirhom tujoh batee
Hingga paddee jih binasa
Meunan bandum ka sipakat
Riyoh rakyat bangta muda

Jikheun bangta hanle mupat

Beudoh leugat tajak mita
Saleh mate nyawong hilang
Bangta seudang han meuho ka

Raja tujoh miteureubang
Bangta seudang jijak mita
Deuh jikalon lam beureukah
Jirudah u ateuh donya

Teubiet apui dalam bumoe
Seupot nanggroe glap gulita
Teuma jitren jiploh taloe
Ban sinaroe jeueb anggota

Jicok batee jiisyarat
Jirhom bagah ateueh kuta
Ka teupeuro kuta batee
Jeued keu abee ban sineuna

Beudoh bangta neujak leugat
Jak mita pat Indra Diwa
Ban jikalon bangta seudang
Jiteureubang dalam hawa

Ateueh bangta ka jipusu
Ban hujeuen ro di antara
Bangta kalon han got laku
Aneuk pusu han ban publa

Teupok bak pha deungon jaroe
Dalam bumoe teubiet guda
Cukop alat keukang taloe
Po samlakoe neupoh lawa

Guda jipo jiteureubang
Dalam awan troh le sigra
Meurumpok le deungon lawan
Bangta pandang Indra Diwa

Ban meurumpok raja kaphe
Na ban suwe tajam jigisa

Bangta linteueng ban keudidi
Guda nari ban cempala

Wahe raja ho keumeueng plueng
Jinoe kakheun pantah sigra
Bak uroe nyoe nyawong kutueng
Kukoh reukeueng putoh dua

Adat kaek langet tujoh
Jinoe ka troh ajai gata
Ban jideungo narit meunan
Geunta badan si cilaka

Indra Diwa beungeh han ban
Jisuet peudeueng yoh nyan sigra
Peudeueng raya mat di uneuen
Jitak meucréung atueh bangta

Bangta sangka deungon peudeueng
Su seumeureueng dalam rimba
Yoh nyan bangta neugrob lambong
Ka neukeupong atueh raja

Deungon peudeueng ka neusayong
Keunong bak lhong Indra Diwa
Han sigeutu luka asoe
Jitak keunoe atueh bangta

Neutak keudeh jitak keunoe
Ban dua droe sabé teuga
Keunoe han lut keudeh han lut
Miseue kukuet keubeue tuha

Peudeueng meusu tadeungo hat-hut
Miseue seuuem lam blang raya
Indra Diwa meunyum tiwah
Jitren bagah atueh donya

Bangta muda seutot bagah
Bagoe siwah ureueng dua
Miseue suwe di dalam blang

Miseue layang angen bawa
Dua raja meutang ilang
Lom geumeucang troh u donya
Yoh nyan reudok treb-treb sigo
Karonya Po Rabbul Ala

Hujeuen jitren rintek-rintek
Uroe tarek tutong hana
Taeu awan burek-katek
Sang geuculek jroh that warna

Angen jipot bacut-bacut
Dirui mangat jeueb anggota
On kayee luroh meukeumang
Jipo kumbang dalam hawa

Kleueng nyang puteh jiteureubang
Cicem hujeuen' teusama-sama
Jipo keunoe jipo keudeh
Jipileh nyang raya-raya

Meusu cicem di cong kayee
Lutong himee riyoh subra
Jigrob keunoe jigrob keudeh
Di cong kandeh ngon peungata

Langet puteh meungandong mirah
Tanda reubah ureueng meunama
Ie di laot teungoh paseueng
Di dalam krueng dum ie raya

Eungkot ubit dum jiplueng-plueng
Jitaluem le eungkot raya
Eungkot ji-ek troh u darat
Jilumpat meulumba-lumba

Meunyum galak ureueng nanggroe
Mata uroe kuneng cahya
Treb-treb sigo meuble kilat
Sang malakat rhet u donya

Nyan tanda saboh hakeumat
Nyan alamat mate raja
Awan puteh jeued keu hitam
Tanda Tuhan nyang that kaya

Raja kalon bangta seudang
Di hadapan that perkasa
Jitob yoh nyan ngon kreh meuklah
Geutangkeh ngon durpaka

Yoh nyan bangta laju tajo
Miseue tulo lheueh lam cintra
Tajam pantah ban keudidi
Bagoe suwe angen puta

Sabab tajam bangta lumpat
Raja batat han jeued gisa
Han jiteumeung meu-en silat
Neutob meuhat keunong dada

Neutob di pruet beusot u rueng
Seulinteung reubah teuhanta
Keumeueng tamah tob lom siseuen
Yoh nyan jikheun meunoe haba

Wahe bangta muda seudang
Gaseh sayang aneuk hamba
Tagaseh aneuk lon sidroe
Sinyak putroe Nila Cahya

Bu jih tabri buet jih tayue
Si gumbeue taniet sahaya
Bek tapoh jih beuta sayang
Ulon paban ka troh masa

Nibak ulon nyan peuneusan
Aneuk laman tapeulara
Ban neudeungo jikheun meunan
Teuka sayang bangta muda

Dalam sarong kreh neupeulob

Neusurot dua lhee deupa
Bangta seuot neukheun meunoe
Deungo kamoe wahe raja

Sabab paleh gata sidroe
Ateueh kamoe taenaya
Nyan tarasa teuma jinoe
Buet kamoe nyang tan bahagia

Habeh narit raja mate
Jisurak le su meutaga
Jipeh tambo jitet nubat
Alamat ka mate raja

Putroe deungo du jih mate
Yoh nyan rhet le ngon ie mata
Yoh jitren di meuligoe
Jak ngon ma droe lam blang raya

Sira jimoe taloe jalan
Dendayang ban siseun lingka
Dumna judo huleebalang
Ireng sajan putroe dua

'Oh sare troh u dalam blang
Lethat ureueng seutot raja
Ulee ili sira jimoe
Mayet lakoe dum jimita

Ladom adoe ladom aduen
Ladom keumuen ho leupah ka
Riyoh jimoe masa nyan dum
Miseue hujeuen rhet ie mata

Bangta kalon han got bagoe
Neukheun meunoe bak peutua
Gata nyoe dum got tasurop
U likot meung padum deupa

Lam kuta Anta Beurantah
Putroe cidah aneuk raja
Ka jiteubiet jak eu ayah

Jideungo gah tinggai donya
Dum lasykar surot pantah
Troph cut indah Nila Cahya
Jipeurab le ubak ayah
Nyang ka reubah lam blang raya

Jieu muka peunoh darah
Deungon gajah meusapat dua
Jaroe uneuen kreh meudulang
Jaroe wie sang neutob muka

Ulee atueuh bangke gajah
Jipo darah teuntang dada
Ban jikalon le putroe ti
Moe meu'i'i dua ngon ma

Weueh that hate hana bagoe
Jieu lakoe mate fana
Jicok le kreh nibak jaroe
Ka jitob droe teuntang dada

Jipo darah ban ie paseueng
Ka teugageueng le teuhanta
Sinan mate sajan lakoe
Tinggai sidroe Nila Cahya

Ayah ngon ma jih ka mate
Jimeuca-e ngon ie mata
Wahe ayah ma panghulee
Tinggai juree deungon kuta

Adat agam bah lon lawan
Mangat jicang sajan gata
Sabab inong ulon paban
Lon meulawan han kuasa

Neutueng ulon wahe ayah
Bek neukeubah gob enaya
Musoh le that di dalam blang
Meuhat jicang kamoe dumna

Nibak gob poh saket asoe
Bah kutob droe sajan gata
Kreh ka jimat nibak jaroe
Jitob droe keunong bak dada

Kreh meulipat patah sikhān
Dum dendayang laju jiwa
Jireupah kreh nibak jaroe
Pocut putroe hana luka

Jiseumangat meudeh meunoc
He cut putroe bek le rugha
Adat jidrob uleh musoh
Cit han jipoh deungon sigra

Raja han le ka talo prang
Keupeue jicang geutanyoe dumna
Bahle jiteueng dum keu namiet
Meung bek meugriet hilang nyawa

Bekle susah he cut putroe
Gata sidroe lon peulara
Putroe muda Jimoe sabé
Jiwa umi deungon bapa

Soe lom peugah keu lontuan
Mate badan lam seungsara
Jipoh keudeh jipoh keunoe
Bahle kamoe hilang nyawa

Yoh nyan pingsan tuan putroe
Cok jipuwoe dalam kuta
Buet dendayang dum sinaroe
Ka jipuwoe aneuk raja

Bangta neukheun ubak wazir
Raja mate tanom sigra
Ngon istri beumeusapat
Miseue adat raja-raja

Jitanom teuma leugat
Uleh rakyat dum sineuna

Ban nyang adat kanun reusam
Meunan tolan jikeurija

Lheueh teumanom dum kapilah
Raja Rom Syah suroh bangta
Jak lam nanggroe Anta beurantah
Ngon kapilah dum siteuta

Cuba kalon peue angkatan
Cok rampasan dum beurata
Leupah Rom Syah geupeureugi
Mangindan Sari peugah haba

Prang ka seungab talo musoh
Yue sampoh alat seunjata
Hulee balang dum neusurot
Woe seuluroh dalam kuta

Lheueh perintah Mangindan Sari
Sama seukali woe lam kuta
Ngon pehasan yub napiri
Keucapi ngon biula

Laju jiwoe dum sipa-'i
Hana sakri hate suka
Tarek alam hijo biru
Beude meusu leungo donya
Bandum rakyat hate seu-u
Surak 'a-'u sira gisa
Alamat ka talo kaphe
Raja mate tinggai donya

Dumna rakyat bak keurusi
Meukhanduri hate suka
Yoh nyan rakyat salen geubri
Meuntroe wazir dum sineuna
Bandum rata raja salen
Bri siseun tren bajee ija
Mangat hate dum sinaroe
Hana bagoe sucacita

Bukon sayang bungong campli
Malam hari rhet meukeuba
Lon kisah Cahya Khairani
Judo doli bangta muda

Teungoh duek bak keurus
Cut Khairani ro ie mata
Raja Bijangga adek putroe
Bak uroe nyoe neungieng rupa

Yoh nyan laju ka geupeurab
Ban meuhadap putroe saf
Na teukeunoe wahe adoe
Lon teugoe-goe that ke gata

Sabab ka rayek bungong sukon
Tatinggai lon sajan bapa
Rindu that lon wahe adoe
Soe ngon keunoe gata bungka

Bijangga yoh nyan teukeujot
Ngieng u likot leumah cuda
Ubak gaki droe geulungkop
Ie mata rhet meulumba-lumba

Wahe cuda bungong pade
Ho tabade padum masa
Ayah bunda neumoe sabe
Lawet tanle droeneu cuda

Tiep-tiep uroe neumeuncae
Jeueb lungkiek gle neuyue mit.
Tapi sapat hana meugah
Ulon susah that bercinta

Raja bandum hireuen leupah
Ngieng peurintah ureueng dua
Hireuen tahe dum kapilah
Ngieng cut indah ngon Bijangga

Cut Khairani teuma peugah
Asai liyah nibak mula

Yoh jibaplueng le gogasi
Cut Khariani jipeulara

Mantong nyawong Tuhan neubri
Gohlom mate ajai teuka
Hingga datang bangta ahli
Poh gogasi uleh bangta

Hingga sampoe dalam kapai
Sigala hai geucalitra
Di pohon awai hingga akhe
Habeh sare geupeuhaba

Habeh bandum geuhareutoe
Hingga sampoe keunan teuka
Raja-raja dum sinaroe
Geudeungo nyoe dum calitra

Bandum yoh nyan ka habeh moe
Sang geumanoe ro ie mata
Raja Bijangga weueh that hate
Geusujut le ubak bangta

Sireuta ngon geukheun yoh nyan
Ampon laman po meukuta
Beurayek that meueh ampon
Sabab ulon akai hana

Adat hana tuanku sayang
Ka meulang-lang cuda hamba
Ban raja deungo meunan seum^h_h
Ile limpah ro ie mata

Bangta tanyong teuma meunoe
Mantong adoe ibu bapa
Atawa cit ka lheueh mate
Ka hana le dalam donya

Seuot Bijangga alhamdulillah
Rahmat limpah gob nyan dua
Mantong hudep ma ngon ayah
Rindu leupah keu aneukda

Geunap uroe bercintaan
Aneuk badan han meuho ka
Raja Bijangga bri utusan
U gampong ubak ayahanda

Geuyue peugah haba meunoe
Ulon nyoe raja Bijangga
Sajan bangta sideh teumpat
Ka meusapat deungon cuda

Nyang jibaplueng le gogasi
Ngon teukeudi Tuhan Esa
Mara Karma poh gogasi
Tinggai Siti aneuk gata

Nyoe ka geuteueng keu isteri
Meunan jadi tapeuhaba
Bekle susah ma ngon abi
Jak keumbali laju gata

Lheueh geupeugah jijak leugat
Ka keuh teutap 'oh nan haba
Bukon sayang bungong tufah
Nyang le ulah bungong jeumpa

Nyoe Ion peugah raja Rom Syah
Anta Beurantah troh le teuka
Geujak cok dumna rampasan
Lheueh talo prang Indra Diwa

Habeh bandum meuh ngon intan
Dum sibarang pirak suasa
'Oh lheueh geucok seukalian
Puwoe rijang ubak bangta

Tandra raja nyang geutawan
Lam tutopan bandum geuba
Yang ka taklok geuba sajan
Nyang meulawan lam peunjara

Rampasan meulaksa ribee

Tabagi lhee suroh bangta
Saboh bagi bulueng rijang
Huleebalang rakyat dumna

Meuntroe-meuntroe panglima prang
Neuyue bulueng dum beurata
Saboh bagoe pudoe intan
Neuyue bulueng keu po jeumba

Soe nyang taklok han meulawan
Tabri keunan ban sikada
Saboh bagoe nyan tasimpan
Kadang-kadang singoh lom na

Habeh haba bhah rampasan
Laen tolan lom takira
Mara Karma musyawarah
Deungon dolat nyang ayahanda

Sireuta deungo raja laen
Haba kawen neucalitra
Nila Cahya tapeukawen
Putroe canden ngon Bijangga

Parui ulon nyang analan
That sipadan lon eu rupa
Po teuraja seuot rijang
Jroh that meunan wahe bangta

Lagi putroe pika yatim
Tapeukawen laju sigra
Raja laen pikheun meunan
Bak lontuan that sireuta

Hingga bandum ka meupakat
Bangta dolat hate suka
'Oh sare lheueh musyawarat
Bangta leugat hei peurdana

Hai peurdana deungo lon peugah
Rakyat takrah uleh gata

Taeu kuta dalam nanggroe
Ban peuet sagoe patna cupa
Pat nyang ka brok tayue gantoe
Ban peuet sagoe dalam lúa
Sabab hajat meung khanduri
Kawen Siti Nila Cahya

Nila Cahya ion peukawen
Ngon aneuk jen Maliga Sana
Raja Bijangga linto baro
Nyankeuh judo Nila Cahya

'Oh lheueh bangta neupeugah proe
Beudoh jinoe lem peurdana
Bak masa nyan rakyat geukrah
Treh le pantah keunan teuka

Geuyue peugot pat nyang reuloh
Ban nyang suroh bangta muda
Ureueng nanggroe pubuet sunggoh
Pat nyang reuloh peugot sigra

Padum lawet peugot sabé
Hingga hase bandum lingka
Bangta deungo buet ka keumah
Jak peugah bak ayah bunda

Neujak jinoe u Anta Beurantah
Neujak peugah buet keurija
Po teuraja neumeuhase
Neupeugah le bak peurdana

Neuyue kawai kuta nanggroe
Ban sinaroe dalam lúa
Lheueh nyanbeudoh neuberjalan
Sultan ngon putroe muda

Tuan putroe sangat girang
Geutamong lam mangkong gaca
Nek keubayan tanyong meunoe
Wahe putroe ho neubungka

Nila Kasom seuot meunoe
Nek kamoe ka rab na dua
Meubri judo linto seudang
Pakri reumbang nek bak gata

Teuma seuot nek Keubayan
Bitkeuh beuklam leumah raha
Leumah lumpoe beuklam saboh
Uleue coh ulon nibak pha

Nyankeuh makna he putroe jroh
Jinoe ka troh lumpoe hamba
Meunan neukheun nek Keubayan
Inong agam khem teutawa

Sabab utoh hana lawan
Nek Keubayan bak meucakra
Habeh haba geubeurangkat
Bandum rakyat balantandra

'Oh sare troh u Anta Beurantah
Geuhei pantah rakyat dumna
Geupeugah le geukhanduri
Kawen Siti Nila Cahya

Dengon raja nyang juhari
Nan geuras i raja Bijangga
Geume leumo nyang teumbon-teumbon
Dum meuron-ron rakyat teuka

Yue meujaga peuet ploh malam
Meupehasan raja-raja
Maseng-maseng ban lakuan
Dum pehasan keunan jiba

Ladom peh gong ladom geundrang
Ladom pasang atueuh guda
Nyang ladom yub seurune kale
Ladom nari meu-en dansa

Nyang yub suleng deungon bangsi
Keucapi deungon nukira

Bunyi-bunyian tadeungo tunye
Nyang rame bak sandiwara

Leupah gura dum peliasan
Ureueng pandang hate suka
Watee seupot meutanding bhan
Aneuk agam muda-muda

Saman inong saman agam
Tieb-tieb malam pithat gura
Han ek peugah buet pehasan
Macam-macam taeu rupa

Nyang rapa-i deungon daboh
Tadeungo riyo hana tara
Hingga sampoe uroe peuet ploh
Yoh nyan teudoh han le kubra

Raja Bijangga raja salen
Ban siseuen tren bajee ija
Peukayan nyang haloh licen
Sang ceureumen hu meucanya

Mara Karma peungui linto
Dara baro ka lheueh gaca
Nila Kasom Cahya Khairani
Peungui Siti Nila Cahya

Peusok le gleueng deungon subang
Meureuntang pawon bak dada
Nibak takue manek gule
That meuble-ble jiplueng cahya

Soe nyang kalon galak hate
That juhari putroe muda
Peusok bajee nyang meujuhang
Ija pinggang samarinda

Ayeuem singke ayeuem gumbak
Ija sawak simplah dada
Jibapot bee that meuhayak
Keulumbak ngon minyeuk ata

Keutang-keuting jimeusu gleueng
 Tahe hircuen jingieng rupa
 Elok paras hana peue kheun
 Miseue buleuen teungoh purnama

 Culop hase ngon peukayan
 Geuarakkan linto geuba
 Tujoh reutoh wie ngon uneuen
 Rame ureueng ireng raja

 Putroe muda preh di pinto
 Dara baro geucok sigra
 Ka geupeu-ek deungon linto
 Dara baro rhet ie mata

 Yoh nyan jimoe puteh leumat
 Teuingat ayah ngon bunda
 Putroe jimoe meusok-meusok
 Bungong tajok hate luka

 Teuma geumat nibak jaroe
 Geukheun meunoe he meutia
 Bek le tamoe bintang pari
 Ulon ini nyang peulara

 Gantoe ayah deungon umi
 He nyak ti bek duka-cita
 Bek taingat nyang ka mate
 'Oh nan janji dalam donya

 Nyang meujawong bandum mate
 Awai akhe rijang jula
 Meunan keudum geubujok-bujok
 Hanle dawok putroe muda

 Seungap putroe hanle dawok
 Geusugot ok teuma sigra
 Nila Kasom nyang sugot ok
 Nyang boh beudak cit teumuda

 Nila Kasom ngon Khairani
 Sajan cut it Nila Cahya

Boh minyeukek ok dara baro
Sabab linto ka troh geuba

Maken leubeh nibak bunoe
Muka putroe that meucáhya
Ka geupeuduek bak keurusi
Siblah kiri bangta muda

Geundrang raya yoh nyan jipeh
Leubeh-leubeh suleng jawa
Deungon rakyat keunan dum troh
Ta deungo kiroh dalam kuta

Rakyat teuka toe ngon jioh
Habeh peunoh mideuen raja
Meusak-sak lam kuta mideuen
Bangta neukheun meunoe haba

Mara Karma yoh nyan neukheun
Ubak ureueng dum sineuna
Wahe teungku nyang sinoe dum
Uroe nyoe lon gantoe raja

Gantoe raja nyang ka han le
Ka lheueh mate tinggai donya
Bak uroe nyoe ulon gantoe
Judo putroe Nila Cahya

Bijangga nama geupakoe
Nyankeuh jinoe raja muda
Pakri pakat bak gata nyoe
Takheun jinoe soe han rila

Dumna rakyat seuot pantah
Bak kamoe sah sangat suka
Hana dakwa deungon bantah
Kamoe keubah di jeumala

Ban nyang titah cahi alam
That sukaan kamoe dumna
Yoh nyan rakyat jaroe seuon
Jak junjong raja Bijangga

Bandum rakyat ka meuhimpon
Geumohon keu dolat raja
Lheueh dolat meuhei sare
Geutet beude ngon meutaga

Tujoh kali tujoh meuriam
Rasa nyum lham banda raja
Bandum rakyat suka hate
Jihei sare that guranta

Cahi alam kuta dolat
Kamoe angkat di jeumala
Beurayek meu'ah dolat ampon
Kamoe bandum akai hana

Sang kira na kamoe salah
Dolat syah ampon deungon dra
Ban tuanku dum peurintah
Hana bantah kamoe dumna

Meunan narit dum sinaroe
Rakyat nanggroe hate suka
Mangat hate hana bagoe
Judo putroe jeued keu raja

Lheueh nyan bangta salen rakyat
Ban nyang adat dilee nyang ka
'Oh lheueh neubri persalenan
Rakyat yoh nyan lakee doa

Lheueh meudoa ngon khanduri
Linto le yoh nyan bangta ba
Siblah uneuen Mangindan Sari
Siblah kiri Mara Karma

Peu-ek laju u rumoh inong
Bak cut bungong Nila Cahya
Geupeuduek le atueuh kaso
Dara baro seumbah raja

'Oh lheueh seumbah teungku linto
Dara baro duek le sigra

Putroe jiduek di geunireng
Sampeng-sampeng deungon raja
Bijangga deungon putroe canden
Ka teukhem-khem rumeh muka
Yoh nyan teuma geupeusunteng
Putroe canden deungon raja

Nila Kasom ngon Khairani
Geupeurab.le laju sigra
Ngon bu leukat dalam leumueng
Jak suleueng keu linto muda

Ban nyang adat dilee jameun
Hana lon kheun panyang haba
Keudeh keunoe seupot uroe
Troh sampoe bak watee isya

Ureueng laen minah sinoe
Tinggai putroe deungon raja
Mara Karma lom khanduri
Peujamee paki rakyat dumna

Troh le rakyat dum jiile
Sangat rame keunan teuka
Mara Karma nyang preh jamee
Troh meure-rec ban ie raya

Ri nyang troh geubri teumpat
Ka geuangkat ngon hidang sigra
Troh le laen keunan leugat
Lom geuangkat miseue nyang ka

Hingga habeh bandum rakyat
Rame sangat keunan teuka
Troh lhee uroe meung khanduri
'Alem paki habeh teuka

'Oh sare lheueh bet khanduri
Geupumandi linto muda
Seumanoe bak tilam putroe

Peuet sagoe panca warna
'Oh lheueh hase dum sileusoe
Bandua droe meuseusuka
Nila Cahya nyang sambinoe
Ngon judo droe raja Bijangga
Meugaseh that hana bagoe
Geunap uroe rumeh muka
Nila Cahya hanle susah
Hate dahsyah dalam dada
Hanle ingat bunda ayah
Putroe indah judo kana
Bijangga judo cut indah
Nyang peurintah gantoe ayahanda
Dalam nanggroe Anta Beurantah
Nyan khalifah mat neuraca
Teutap raja peurintah nanggroe
Cut putroe peutimang raja
Ureueng laen ka habeh woe
U rumoh droe laju gisa
Raja-raja pika geuwoe
U nanggroe droe maseng jeumba
Alhamdulillah ka seuleusoe
Tamat 'oh noe nyoe calitra
Mara Karma haba indah
'Oh noe sudah tamat haba
Deungon tulong poku Allah
Tamat kisah ulon rika
Pat nyang karot deungon salah
Harap meuah bandum rata
Lagee ulon dungu leupah
Hana cidah bak meurika
Hana utoh lon seumurat
Mantong singkat kalam lon ba

Dalam naskah ulon dapat
Nyoe hikayat purbakala
Hijo-hijo tawo reuhat
Nyang hijo that tawo buga

Ulon peugot nyoe hikayat
Ke ibarat soe nyang baca
Jampang taduek beuranggapat
Beuet hikayat keu gura-gura

Hate susah puleh siat
Haba mangat penghibur duka
Lagi haba lam seujarah
Buet ureueng cidah nyang bijaksana

Nyang got tatueng taboh nyang salah
Haba seujarah sangat berguna
'Oh noe mumada haba lon peugah
Alhamdulilah ka seumpurna

Daweuet lon top kalam lon keubah
Ka tamat kisah seujarah lama

TAMAT

Jakarta 31 Desember 1980.
Dialih aksarakan dari naskah huruf
Arab, milik pusat dokumentasi dan
informasi Aceh.

Ramli Harun.



bp

PN BALAI PUSTAKA — JAKARTA

